

## Tuhun vaha naçahyí Mateo sahá ña naçaja Jesucristo

### *Chichi naquixi Jesucristo (Lc. 3:23-38)*

<sup>1</sup> Ña yóho cúu quiivi na naçacuu tásáhnu jícó Jesucristo, mé a naquixi chichi David xihín chichi Abraham:

<sup>2</sup> Abraham naçacuu tátá Isaac ta Isaac naçacuu tátá Jacob ta Jacob naçacuu tátá Judá xihín java ga ñani da.

<sup>3</sup> Judá naçacuu tátá Fares xihín Zara ta náná ndíví da yóho naçananí ña Tamar. Ta Fares naçacuu tátá Esrom ta Esrom naçacuu tátá Aram.

<sup>4</sup> Ta Aram naçacuu tátá Aminadab ta Aminadab naçacuu tátá Naasón ta Naasón naçacuu tátá Salmón.

<sup>5</sup> Ta Salmón naçacuu tátá Booz, da cúu jahyi ñá naní Rahab. Booz naçacuu tátá Obed ta Obed yóho naçacuu da jahyi ñá naní Rut cán. Ta mé Obed yóho naçacuu tátá Isaí.

<sup>6</sup> Ta Isaí naçacuu tátá rey David ta rey David yóho naçacuu tátá Salomón, da cúu jahyi ñá naçacuu ñájíhí Urías nu cuítí cán.

<sup>7</sup> Ta Salomón naçacuu tátá Roboam ta Roboam naçacuu tátá Abías ta Abías yóho naçacuu tátá Asa.

<sup>8</sup> Ta Asa naçacuu tátá Josafat ta Josafat naçacuu tátá Joram ta Joram naçacuu tátá Uzías.

<sup>9</sup> Ta Uzías naçacuu tátá Jotam ta Jotam naçacuu tátá Acáz ta Acáz naçacuu tátá Ezequías.

<sup>10</sup> Ta Ezequías nasacuu tátá Manasés ta Manasés nasacuu tátá Amón ta Amón nasacuu tátá Josías.

<sup>11</sup> Ta Josías nasacuu tátá Jeconías xihin java ga ñani da. Ta nasacuu da tiempo tá natiin soldado na Israel já nasandaca ñahá da na cán ñuu Babilonia.

<sup>12</sup> Ta tá nasanduu na Israel ñuu Babilonia cán já nacacu Salatiel ta tátá Salatiel nasacuu Jeconías. Ta Salatiel nasacuu tátá Zorobabel.

<sup>13</sup> Ta Zorobabel nasacuu tátá Abiud ta Abiud nasacuu tátá Eliaquim ta Eliaquim nasacuu tátá Azor.

<sup>14</sup> Ta Azor nasacuu tátá Sadoc ta Sadoc nasacuu tátá Aquim ta Aquim nasacuu tátá Eliud.

<sup>15</sup> Ta Eliud nasacuu tátá Eleazar ta Eleazar nasacuu tátá Matán ta Matán nasacuu tátá Jacob.

<sup>16</sup> Ta Jacob nasacuu tátá José, da nasacuu yí María. Ta María cúú ñá nasacuu náná Jesucristo, mé a nachindahá Ndióxi cacomí a cuéntá sahá ñayivi.

<sup>17</sup> Ñá cán quéa janda tá nacasáhá cácu jahyi Abraham janda quiahva naxinu coo a quivi nacasáhá cácu jahyi David já nayaha uxu comi generación. Ta tá quiahva nacasáhá cácu jahyi David janda quiahva natiin na Babilonia na Israel já ñéhe ñahá na cuahan na nayaha inga uxu comi generación. Ta nayaha inga uxu comi generación nani nasanduu na Israel ñuu Babilonia janda quiahva naxinu coo quivi nacacu Jesús, mé a nachindahá Ndióxi cacomí a cuéntá sahá ñayivi.

### *Tá nacacu Jesús*

*(Lc. 2:1-7)*

<sup>18</sup> Joho nasahin tá nacacu Jesucristo: Mé María, ñá cacuu náná Jesús cán sa nasahan ñá tuhun ñá

ñā tandaha ñá xihín José. Joo tá cámaní coo da xihín ñá já nacandaa ini da ñā ñúhu jahyi ñá. Ta ñā yóho nasacuu a ñā nacaja ínima yii Ndióxi.

<sup>19</sup> Ta José, da cacuu yíi María cán cúú dá da cája ndinuhu ñā ndaa. Ta nacahan da ñā nasahiin ñá xihín inga dataa joo coó naxeen da cahan núu da saha ñá nuú ñayivi. Saha ñā cán quée nasacu ini da jándacoo jehé da ñā.

<sup>20</sup> Ta nani cáhvi ini da saha ñā caja da anda jávi naquixi in sani nu dá ta nandaca náha in táto Ndióxi nu dá. Ta tañu mé sani cán nacahan xihín dá. Já nacachi a já:

—José, da naquixi chichi David, a cáyhvi tohún tandahún xihín María jan jáchi nacaja ínima yii Ndióxi ñā ñúhu jahyi ñá.

<sup>21</sup> Ta tá sa nacacu jahyi María já chicaan ndó quivi á ná cananí a Jesús jáchi jácacu a ñayivi nuú cuachi tá ná candeé ini na mé á —nacachi a.

<sup>22</sup> Tóco ndihi ñā yóho nayaha ñā ná xinu coo nuú tuhun Ndióxi ñā nacahyi in profeta sanahá ndivaha cán ta já nacachi da cán já:

<sup>23</sup> Vaxi quivi cañuhu jahyi in ñá tacú, ñá a ñáha coo ta xihín.

Ta tá sa nacacu jahyi ñá cán já cacu na quivi á cananí a Emanuel.

Ta tuhun yóho cúní cachi a: ín Ndióxi xohó.

<sup>24</sup> Ta tá nandicaxí ini José já nacaja da tá ín nacachi táto Ndióxi cán xihín dá. Ta já natandaha dá xihín María.

<sup>25</sup> Joo coó nasahiin da xihín ñā tá quiahva ín in dataa xihín ñájíhí da janda quiahva cacu jahyi María. Ta tá nacacu a cán já nasacu José quivi á cananí a Jesús.

## 2

### *Tá naxito nihni na ndichí Jesús*

<sup>1</sup> Ta n̄acacu Jesús in ñuu naní Belén ña ndácaan estado Judea. Ta mé tiempo cán n̄asacomí rey Herodes cuéntá sahá nación Israel. Ta mé tañu já n̄axinu c̄oo java na ndichí ñuu Jerusalén. Mé na ndichí yóho cúú ná na jácuaha xihín quimi ta n̄aquixi na chí nu cána candii.

<sup>2</sup> Ta tá n̄axinu c̄oo na ñuu Jerusalén já n̄andaça tuhún na ñayivi já n̄acachi na já:

—Ndájá íin da loho n̄acacu viti jan, da cacuu rey nuú na Israel. Jáchi n̄axini nde n̄aqueta quimi nuú nde ta xihín rí yóho sa n̄acandaa ini nde ña sa n̄acacu da. Ta viti vaxi nde yóho caja cáhnu nde da —n̄acachi na ndichí cán ndáca tuhún na.

<sup>3</sup> Ta tá n̄axini joho rey Herodes ña yóho já n̄acasáhá da ndíhi ndivaha ini da ta quiahva já n̄acasáhá ndíhi ini tóco ndihi ñayivi ñuu Jerusalén cán.

<sup>4</sup> Sahá ña cán quéa n̄acana rey Herodes cán tóco ndihi na sacuaaha nuú jutú xihín na jánaha ley Moisés cán. Ta já n̄andaça tuhún da na saha ndá ñuu cúú nu cáchí tuhun Ndióxi cacu da n̄asahan Ndióxi tuhun a chindahá a cacomí a cuéntá sahá ñayivi.

<sup>5</sup> Já n̄acachi na cán já xihín dá:

—Ñuu Belén, ña ndácaan estado Judea cán cúú nuú cáchí tuhun Ndióxi cacu da jáchi quiahva já n̄acahyí in profeta sanahá tá n̄acachi da já:

<sup>6</sup> Vati ñuu Belén, ña ndácaan estado Judea, cúú á in ñuu loho ndivaha tañu ñuu náhnu cán joo íin sahá a,

jáchí tañu ñayivi ñuu cán ndindita in da cacomí cuéntá sahá na Israel, na cúu cuéntá Ndióxi, já naçahyí in profeta sanahá.

7 Tá nandihí já naçana xóo rey Herodes na ndichí cán ta já nandaca tuhún da na cán saha ndá quivi nanaha quimi cán mé rí nu ná.

8 Anda já naçindahá da na ñuu Belén. Já naçachi da já xihín ná:

—Cuáhán ndo ñuu Belén cán ta ndaca tuhún vaha ndó ndaja cáa sahá ta loho naçacu jan. Ta tá sa nandiñehe ndó a já quixi ndó çaxi tuhun ndó xihín i já ná cuhun ri yehe va caja cáhnu i ña —naçachi Herodes xihín na.

9 Ta xihín ña yóho naçuee na ndichí cuahan tucu na. Ta quimi, rí naçini na nu cuítí cán já ndaca tucu rí na cuahan na. Ta tá naçinu rí chí nuú ín mé a loho cán anda já naçandichí rí.

10 Ta cájii ndivaha ini na tá xini na mé quimi cán.

11 Tá nandihí já naquihvi na ini vehe já naçini na mé a loho cán xihín María, náná a. Ta já naçaxítí na nu á ta já naçaja cáhnu na ña. Ta tá nandihí já naçuná na yuhú saço ñehe na ta já najoco na jiuhun cuáán nuú a xihín jusa vaha xihín in ña támi sahan naní mirra nu mé a loho cán.

12 Tá nandihí já naquixi in sani nu ná ta xihín mé sani cán naçachi Ndióxi xihín ná ña ná a ndicó çoo na chí nu ín rey Herodes. Sahá ña cán quéa nandijama na íchi cuánuhu ná ñuu na.

### *Tá ñehe na Jesús cuahan na Egipto*

13 Ta tá sa naçuee na ndichí cán cuahan na já naquixi in sani nuú José ta nandaca náha in táto Ndióxi nu dá. Já cáhí a já xihín dá:

—Cuándacoún ndiquehe ña loho jañ xihín María, náná a ta cunún cuhun xihín ná chí ñundáhyi nación Egipto. Ta cán coún xihín ná janda quiahva ná caxi tuhun i xuhun. Jáchi caca nuu Herodes ndinducú da ña loho jañ ña cahní ñahá da — ñacachi tátō Ndióxi cán xihín José.

<sup>14</sup> Anda já ñandacoo José já ñaquehe da Jesús xihín María, náná a já ñaqueta ñuú ña cuahan ña chí Egipto.

<sup>15</sup> Ta cán ñasanduu na janda quiahva ñaxihí Herodes. Tóco ndihi ña yóho ñayaha já ná xinu coo nuú tuhun ñacachi Ndióxi sanahá tá ñacahyí in profeta já: “Ñasahin jahyi i nación Egipto ta ñacana i da ná ndicó coo da”, cáchi tuhun Ndióxi.

*Tá ñasahnda Herodes chuun ña ná cahní ña ña valí*

<sup>16</sup> Ta ndaja coo ñaxini Herodes cán ña najándahvi ña ndichí cán da sahá ña coó ñaxinu ga ña nu dá. Ña cán quéa a juú quiahva ñaxojo ini da. Ta chí ñasahnda da chuun ña ná cahní ndihi na ña valí, ña ivi cuiá chí ninu, mé ña ndúu ñuu Belén xihín ñuu valí cátañan xihín á. Jáchi sa ñacaxi tuhun ña ndichí cán xihín dá ña ñaxini na mé quimi anda tátuhun ivi cuiá.

<sup>17</sup> Ta tá ñandihí ñaxihí ña valí yóho já ñaxinu coo nuú tuhun ñacahyí profeta Jeremías sanahá ndivaha tá ñacahyí da já:

<sup>18</sup> Ñuu Ramá jandá joho ndáhvi tácu cáyuhú cóhó ñañáha sácu ña.

Ta ña sácu yóho cúu ña Raquel. Sácu ña sahá jahyi ña.

Ta cō cún̄i ñá ndico ini ñá jáchi naxih̄i jah̄yi ñá, cách̄i tuhun Ndióxi.

<sup>19</sup> Joo tá sa naxih̄i Herodes já naquixi tucu sani nuú José nu ín da nación Egipto cán. Ta nandaca náha in tátō Ndióxi nu dá já cách̄i a já xih̄in dá:

<sup>20</sup> —Cuándacoún ta ndiquehe Jesús xih̄in María, náná a ta cuáhán ndicó cōo xih̄in ná chí ñundáhyi Israel. Jáchi sa naxih̄i va na ndúcú cah̄ní ña loho jan —cách̄i tátō Ndióxi.

<sup>21</sup> Anda já nandico José ta ñéhe da Jesús xih̄in María, náná a cuahan na ndicó cōo na chí ñundáhyi Israel.

<sup>22</sup> Joo tá ñáhehe da tuhun ña nandicojo Arquelao chuun cacuu da rey nu Herodes, tátá da já nayih̄ví José cuhun da chí estado Judea. Ta sahá ña sa nacaxi tuhun tátō Ndióxi tañu sani nu dá sahá ña cán quéa nandijama da ích̄i ta cuahan da chí estado Galilea.

<sup>23</sup> Ta naxinu cōo na in ñuu naní Nazaret nuú nasanduu na. Ta xih̄in ña yóho naxinu cōo nuú tuhun nacah̄yí na profeta sanahá ña cacuu Jesús da ñuu Nazaret.

### 3

*Tá nacasáhá Juan, da jácandúta ñayivi cáhan ndojó da yucú ích̄i cán*

*(Mr. 1:1-8; Lc. 3:1-9, 15-17; Jn. 1:19-28)*

<sup>1</sup> Mé tiempo cán Juan, da jácandúta ñayivi naxinu da yucú ích̄i cuéntá estado Judea cán. Ta nacasáhá jána ha da ñayivi.

<sup>2</sup> Já cách̄i da já xih̄in ná:

—Xíní ñúhú jándacoo ndó ña núu cája ndó ta ndicó cōo ini ndó nu Ndióxi jáchi sa nacayati quivi

cacomí Ndióxi cuéntá sahá ñayivi —cáchi da xihin ná.

<sup>3</sup> Mé Juan yóho cúú dá da naçahan profeta Isaías saha tá naçahyí da já:

Vaxi quivi tá çahan cóhó in da tañu yucú íchí ta cachi da já xihin ñayivi:

“Caja tiaha ndó íchi nuú quixi xitoho í, ta cuná ndó in íchi ndacú nu mé á ña ná ndihvi a ínimá ndo”, cáchi tuhun Ndióxi.

<sup>4</sup> Ta jáhma nasandixi Juan yóho nasacuu a ña naçavaha na xihin íji camello ta nasandico in nií jáhndá tóco da. Ta naixixi da tica xihin ñuñu yucú.

<sup>5</sup> Ta naqueta ñayivi ndúu ñuu Jerusalén xihin na ndúu estado Judea xihin na ndúu ñundáhyi yati yuta Jordán cán naçaa na nu Juan taa johó na nu çahan da.

<sup>6</sup> Ta tá nanahma na cuachi na nu Ndióxi já najácandúta Juan na ini yuta Jordán.

<sup>7</sup> Joo tá naixini Juan ña janda johó xínu çoo cuahá na fariseo xihin na saduceo nu dá ña ná jácandúta da na já naçasáhá xójó ndivaha ini da ta já naçachi da já xihin ná:

—Mé ndó cúú ndó tátuhun çoo jáchi cúú ndó na quini. Cáhán ndo ña a jándoho ga Ndióxi ini ndó sahá cuachi ndó tá ná candúta ndo vatí cája tá cája ndó cuachi.

<sup>8</sup> Xíní ñuhú caja ndó ña vaha já ná cuni ñayivi ña mé a ndaa táhyí najándicoo ndó ña núu nasacaja ndó jihna.

<sup>9</sup> Ta a cáhán ndo ña jáçacu Ndióxi ndohó sahá ña cúú ndó na naquixi chichi Abraham. Jáchi çoo saha toho ña jan nu Ndióxi tá ço jándacoo ndó cuachi ndó. Jáchi mé a ndaa ná çahan i xihin ndó



ñā janda yuu ndúu nu ñúhu jan cuu caja Ndióxi ñā ná nduu a ñayivi quixi chichi Abraham.

<sup>10</sup> Mé ndó cúú ndó tátuhun in yító, dó sa ñatiin na hacha cuahan na cahnda na. Ta tóco ndihi yító, dó co sáhan cuihi vaha nuu, tahnda do ta quee dó nu ñúhu cayi do. Quiahva já caja ri Ndióxi xihin ndó tá co cuni ndó ndicó coo ini ndó nu mé á.

<sup>11</sup> Mé a ndaa caja ndúta i ndóhó xihin ticuii ta xihin ñā yóho náha ñā nandicó coo ini ndó nu Ndióxi. Joo vaxi inga da ta da cán cúú da jándicutú ínimā ndo xihin ínimā yii Ndióxi ta ñā cán cacuu a tátuhun ñúhu cáyi. Ta da cán ín cuaha chága ndée dá a juú ga yehe. Ta chí coó sahá i ndica xití i nu dá ñā ndaxí i correa ndusa da.

<sup>12</sup> Mé da vaxi cán caxi da ñayivi vaha tañu ñayivi quini. Cúú á tátuhun in dataa tá jáxixi da trigo xihin pala já ná quee xehe á já cacu vaha da ñā. Ta xehe ñacana cán cuhun a cayi a xihin ñúhu ita ñā a ndáhva toho —cáchi Juan xihin na cán.

### *Tá ñacandúta Jesús*

*(Mr. 1:9-11; Lc. 3:21-22)*

<sup>13</sup> Naquee Jesús chí estado Galilea cuahan yuta Jordán nu ndácaan Juan jácandúta dá ñayivi ñā ná jácandúta da mé á.

<sup>14</sup> Joo nu cuítí coó ñaxeen toho Juan jácandúta dá Jesús. Ñā cán quéa ñacachi da já xihin Jesús:

—Yóhó cúú da ndítahan jácandúta yehe. Ta cáa johu vasún yóho ñā ná jácandúta i yohó —ñacachi Juan cán xihin Jesús.

<sup>15</sup> Já nanducú nehe Jesús tuhun nu dá já ñacachi a já xihin dá:

—Candehé. Quiahva já ndítahan coo ña yóho viti jáchi ndítahan nu yo jáxinu coo i tóco ndihi ña ndaa ña nasacu ini Ndióxi coo —nacachi a.

Xihín ña yóho nacandúsa Juan ta chí najácandúta dá Jesús.

<sup>16</sup> Ta tá nandihí nacandúta Jesús já naqueta ini ticuúí cán. Anda já nanuna indiví ta naxini Jesús nanuu ínima yii Ndióxi jatá ta nasacaá tá quiahva cáa in ndijata.

<sup>17</sup> Tá nandihí já naxini johó a cáhan in a indiví ta já cáchí a cán já:

—Yóhó cúun jahyi maní i ta cájii ndivaha ini i xuhun —nacachi a.

## 4

### *Xíto ndojó tiñáhá sacuahá Jesús*

*(Mr. 1:12-13; Lc. 4:1-13)*

<sup>1</sup> Tá nandihí já ndáca ínima yii Ndióxi Jesús cuahan chí yucú íchí nuú co ndúu ñayivi já ná coto ndojó tiñáhá sacuahá mé á.

<sup>2</sup> Ta cán nasahin a tixi ivi jícó quivi. Ñuú ta ndiví coó naxixi a ta tá nandihí já naxinu joco nu á.

<sup>3</sup> Já nacayati tiñáhá sacuahá nuú Jesús ña coto ndojó ñahá ri já nacachi rí já xihin á:

—Tá ta jivi ndusa jahyi Ndióxi cúun cahnda chuun ña ná nduu yuu yóho pan —nacachi rí cán xihin Jesús.

<sup>4</sup> Anda já nacachi Jesús já xihin rí:

—Já cáchí tuhun Ndióxi: “A juú pan cuití cuhu ñayivi já catacu na, vaha. Xíní ñúhú ri a caja na ña sáhdá tuhun Ndióxi nu ná já quéa cuu catacu na nu Ndióxi” —nacachi Jesús xihin rí.

<sup>5</sup> Tá nandihí já ndáca tiñáhá sacuaḥa cán Jesús cuahān xihín rí ñuu Jerusalén, ña yíi cán ta já najándaa rí a nu jícó jiní veñuhu cáhnu ndácaan cán.

<sup>6</sup> Ta já naçachi rí já xihín á:

—Tá ta jivi ndusa jahyi Ndióxi cúun jácana mún chí ninu jáchi já cáchí tuhun Ndióxi:  
Cahnda Ndióxi chuun nu tátō mé á ña ná candaa na yohó.

Ta ndinehe ndáha na yohó,  
já quéa ná a ndicuehe saḥun tá ná cachihin saḥun xihín yuy, já cáchí tuhun Ndióxi —naçachi rí xihín Jesús.

<sup>7</sup> Ta já nanducú nehe Jesús tuhun nu rí já naçachi a já xihín rí:

—Cáchí tucu tuhun Ndióxi já: “A cóto ndojó tohún Ndióxi, xitohún” —naçachi Jesús xihín rí.

<sup>8</sup> Ta tá nandihí já ndáca tucu tiñáhá sacuaḥa cán Jesús naṣahān xihín rí in jiní yúcu jícó ndivaḥa. Ta já naṇaḥa rí ndaja táhan ñuu ndúu ñuyíví nu á ta najánaḥa rí tóco ndihí ña náhnu ndúu cán nu á.

<sup>9</sup> Ta já naçachi tucu rí já xihín Jesús:

—Tóco ndihí ña yóho quiahva i nuun tá ná caxítún nuú i caja cáhnún yehe —naçachi rí quini cán xihín Jesús.

<sup>10</sup> Anda já naçachi Jesús já xihín rí:

—Satanás, cuahán caxoo jáchi já cáchí tuhun Ndióxi: “In túhún Ndióxi, xitohún ndítahan caja cáhnún ta in túhún mé á ndítahan caja ndívún nuun” —naçachi Jesús xihín rí cán.

<sup>11</sup> Tá nandihí já naçaxoo tiñáhá sacuaḥa cán cuahān rí. Ta já naxinu java tátō Ndióxi chindeé na Jesús.

*Tá naçasáhá cáxi tuhun Jesús tuhun Ndióxi nuú na estado Galilea*

*(Mr. 1:14-15; Lc. 4:14-15)*

<sup>12</sup> Tá nanehé Jesús tuhun ña nachicaan na Juan, da jácandúta ñayivi vecaa já naquee a cán cuahan chí estado Galilea.

<sup>13</sup> Joo coó naçandoo a ñuu Nazaret chí naquee a cuahan coo a chí ñuu Capernaum ña ndácaan yuhú tañuhú, dó ndácaan ñundáhyi cuénta na naquixi chichi Zabulón xihín na naquixi chichi Neftalí.

<sup>14</sup> Tóco ndihi ña yóho nayaha ña ná xinu coo nuú tuhun naçahyí profeta Isaías sanahá tá naçahyí da já:

<sup>15</sup> Ñayivi ndúu ñundáhyi Zabulón xihín na ndúu ñundáhyi Neftalí, ña ñúhu inga xoo yuta Jordán yati yuhú tañuhú, ta jári na ndúu Galilea, mé estado nu ndúu ñayivi, na co cúu chichi Israel,

<sup>16</sup> mé na cán nasanduu na nuú naá ndivaha ta viti naxini na in ñaha yéhe ndivaha.

Jándiyehé á nu ná ña ná a quívi na, joo catacu na anda ama cáa quívi nu in Ndióxi, naçahyí Isaías sanahá.

<sup>17</sup> Ta chí mé tiempo já naçasáhá Jesús cáhan ndojó a nuú ñayivi ta já cáchi a já xihín ná:

—Xíní ñuhú jándacoo ndó cuachi cája ndó ta ndicó coo ini ndó nu Ndióxi jáchi sa naçayati quívi cacomí a cuénta sahá ñayivi —naçachi Jesús.

*Tá cána Jesús comí da tává tiyacá ña ná caca tuun da xihín á*

*(Mr. 1:16-20; Lc. 5:1-11)*

<sup>18</sup> Tá xíca Jesús cuahan yuhú tañuhú Galilea, nandinehé a ivi taa, da cúu ñani. In da naní Simón

ta cáhan na Pedro xihin dá. Ta da inga cán nani da Andrés. Ndívi da yóho cúu dá da tává tiyacá ta ñúhu na jácana na ñúnu ná ini tañuhú cán.

<sup>19</sup> Já ñacachi a já xihin ndívi da:

—Naha quíi ndó candico ndó yehe caca tuun ndó xihini. Táva ndó tiyacá viti joo caja i ña ná cuu tavá ndo ñayivi tañu cuachi —cáchi a.

<sup>20</sup> Ta chí ivi laá najándacoo da ñúnu da ta nandico da Jesús.

<sup>21</sup> Ta nani xíca Jesús cuahan chága chí nuu já naxini a inga ivi tucu taa, da cúu ñani. In da nani Jacobo ta inga da nani Juan, da cúu jahyi Zebedeo. Ta ndívi mé da yóho ñúhu da ini barco da xihin tátá da ndája vaha da ñúnu dá. Ta ñacana Jesús ndívi da yóho.

<sup>22</sup> Ta chí ivi laá najándacoo da barco da xihin tátá da ta ñacasáhá xíca tuun da xihin Jesús.

*Jánaħa Jesús nuú cuahá ndivaha ñayivi  
(Lc. 6:17-19)*

<sup>23</sup> Níi cúu estado Galilea naxica nuu Jesús cáhan tuhun vaha nuú ñayivi ini veñuhu in in ñuu cán. Cáxi tuhun a nu ná ña sa nandindaa quívi cacomí Ndióxi cuéntá sahá ñayivi ñuyívi. Ta ñandaja vaha Jesús na quíhvi tá nuú cuehe ndóho na.

<sup>24</sup> Ta níi cúu ñundáhyi cuéntá Siria nandicuita nuu tuhun sahá ña cája Jesús. Sahá ña cán quea néhe na na quíhvi, na ndóho tá nuú cuehe vaxi na nu á ña ná ndaja vaha mé á na ta néhe na na ñúhu ínimá quini ini xínu na nu á ta ndijáá na xihí yihí xihín na quíhvi saħa néhe na vaxi na nuú Jesús. Ta ñandaja vaha mé á na.

25 Ta cuahá ndivaha ñayivi ndíco na Jesús. Cúu ná na naquixi estado Galilea xihín na ndúu uxu ñuu cuéntá Decápolis xihín na ñuu Jerusalén xihín na estado Judea xihín na naquixi ñundáhyi chí xoo oriente nu ndácaan yuta Jordán cán.

## 5

### *Tá cáhan ndojó Jesús jini yúcu (Lc. 6:20-23)*

1 Tá naxini Jesús ña ndíco cuahá ndivaha ñayivi mé á já nandaa jini yúcu ta já nasacoo a cán. Ta nacayati na xíca tuun xihín á nu á.

2 Ta já nacasáhá jánahá nu tóco ndihi na ndúu cán já nacachi a já xihín ná:

3—Tahví nacuu ñayivi tá ndícuni na xíní ñúhú na ña chindeé Ndióxi na jáchi na cán cúu na cacomí Ndióxi cuéntá saha.

4 Tahví nacuu na ndúu cuéha jáchi na cán cúu na quiahva Ndióxi tuhun ndée ini.

5 Tahví nacuu na co ndíñehe jíco mé jáchi na cán cúu na ñehe táhvi ndiquehe na ña nasahan Ndióxi tuhun a quiahva nu ná.

6 Tahví nacuu na xíca ini caja ña cuni Ndióxi. Na cán cúu na caja Ndióxi ña ná xinu nuú ña cúu ini na.

7 Tahví nacuu na cándahví ini sahá ñayivi jáchi na cán cacuu na cándahví ri ini Ndióxi saha.

8 Tahví nacuu na co ndácaan quini ínima jáchi na cán cúu na cuni Ndióxi.

9 Tahví nacuu na ndíhi ini ña ná coo vaha na xihín ñayivi jáchi na cán cúu na cáchi Ndióxi cúu ná jahyi mé á.

10 'Tahví n̄acuu n̄a ndóho ini sahá ñ̄a cája na ñ̄a sáhndá Ndióxi n̄u ná caja na jáchi n̄a cán cúu na cacomí Ndióxi cuéntá saha.

11 'Tahví n̄acuu ndó tá cánahá ñ̄ayivi xih̄in ndó ta cája xíxi na xih̄in ndó sahá ñ̄a cándeé ini ndó yehe. Ta tahví n̄acuu ndó tá jácojo na cuachi jíquí jata ndó sahá ñ̄a cándeé ini ndó yehe.

12 'Xíní ñ̄úhú cajji ndivaha ini ndó ta coo vaha ini ndó jáchi ndiquehe ndó in ñ̄a vaha ndivaha caja Ndióxi indiví. Xíní ñ̄úhú ndicuhun ini ndó ñ̄a quiahva já n̄acaja xíxi na xih̄in n̄a profeta, n̄a nasanduu sanahá.

*Cúu yó tátuhun ñ̄úhu jándiyeh̄e nuú ñ̄ayivi ñ̄uyíví  
(Mr. 9:50; Lc. 14:34-35)*

13 'Mé ndó cúu ndó tátuhun ñ̄ijí yívi na. Sa xíní ndó ñ̄a cája ñ̄ijí ñ̄a ná ndihaji ñ̄aha xíxi ndó. Ta quiahva já cája ndó xih̄in ñ̄ayivi ñ̄uyíví. Joo tá ná ndihi ñ̄a ohva ñ̄ijí cán a cúu ga ndicó coo a cahohva tucu a sahá ñ̄a cán quéa jándá cuita va íchi cuani nihni ñ̄ayivi ñ̄a jáchi coo chuun toho a.

14 'Jári mé ndó cúu ndó tátuhun ñ̄úhu jándiyeh̄e nuú ñ̄ayivi ndúu ñ̄uyíví. Ta mé ñ̄úhu cán cúu á tátuhun in ñ̄uu cánúu jata in yucú jíco ta a cúu toho ndácaan jehé a.

15 Jáchi co chíñúhu ná in lámpara ta tá n̄u ndihí já chíjehé n̄a ñ̄a tixi in sato. Ñ̄a cája na xih̄in á quéa chínúu jíco n̄a ñ̄a já ná jándiyeh̄e a n̄u tóco ndihi na ndúu vehe.

16 Quiahva já xíní ñ̄úhú ndihi ini ndó caja vaha ndó ñ̄a ná cacuu ndó tátuhun in ñ̄úhu cáyi nuú ñ̄ayivi. Jáchi tá ná cuni na ñ̄a vaha cája ndó já quéa cuu caja cáhnu na Ndióxi, tátá yo, ñ̄a ín indiví.

### *Jánaḥa Jesús saḥa ley Moisés*

17 'A juú caḥán ndó ña naquixi i ñuyívi yóho ña cacu xóo i ña naṣahnda ley Moisés xihín ña najánaḥa na profeta, vaḥa. Co váxi toho i cacu xóo i ña. Vaxi i nu ndó jáxinu coo i tóco ndihi ña cáchí mé ley já ná naḥa i nu ndó ndíá cúu ndusa ña.

18 Mé a ndaa ná caḥan i xihín ndó ña a ndíhi saḥa mé ley nani ín indiví xihín ñuyívi yóho. Ni in túhún toho tuhun, a ndíhi saḥa janda quiaḥva ná yaḥa tóco ndihi ña ndítahan yaḥa.

19 Saḥá ña cán quéa ndá na co cúni caja ña sáhdá ley Moisés vatí cúu á ña loho ndivaḥa ta ni co cúni na jánaḥa na ñayivi ña ná caja na ña cáchí a já quéa cacuu na in na coo cuaḥa saḥa tañu na cacomí Ndióxi cuéntá saḥa. Joo na cája ña cáchí mé ley ta jánaḥa na ñayivi ña ná caja na ña, mé na cán cacuu na na cáhnu ndivaḥa tañu na cacomí Ndióxi cuéntá saḥa.

20 Mé a ndaa ná caḥan i xihín ndo ña tá ná caja cuití va ndó tá quiaḥva cája na jánaḥa ley Moisés xihín na fariseo já quéa a cúu ndihvi ndó nuú cacomí Ndióxi cuéntá saḥá ñayivi.

### *Jánaḥa Jesús ña co ndítahan cojo ini ñayivi (Lc. 12:57-59)*

21 'Mé ndó sa xini ndo ña naçachi Moisés xihín tásáhnú jíco ndo saḥahá tá naçachi da já: "A cáhni ndó ndii jáchi ndá na ná cahní ndii tandaa quivi caja vií jutixia saḥa ná."

22 Joo yeḥe cáchí i xihín ndó viti ña ndá na ná caja cueḥe xihín ñani táhan na tandaa quivi caja vií jutixia saḥa ná. Ta jári na cánaḥá xihín ñani táhan na, á cáchí na cúu ná ñayivi taçhi já vaxi quivi tá



candichi na nu juéxe cáhnu ta cuu cuhun na indayá sahá.

<sup>23</sup> 'Sahá ña cán quéa tá ta ñéhe ndó in ñaha cuahan ndó joco ndó nu náa Ndióxi ta nani cuahan ndo cán ndicuhun ini ndó ña íin in ñani táhan ndó ta co cúni táhan vaha na xihin ndo

<sup>24</sup> já quéa mé jan yati nu náa ndítahan jándacoo too ndó ña ñéhe ndó joco ndó jan. Ta ndítahan quee ndó cuhun ndó ndique táhan máni ndó xihin ñani táhan ndó cán. Ta tá ná ndihi já cuu ndicó coo tucu ndó nu náa Ndióxi joco ndó ña najándacoo ndó jan.

<sup>25</sup> 'Tá sácú in na saha ndó cuhun ndó vecaa ta cúni na candaca na ndohó cuhun ndó nu juéxe, xíní ñúhú nducú ndó ndá quiahva ndique táhan máni ndó xihin ná nani núná nu ndó caja ndó ña. Já quéa ná a ndiquiahva na cán ndohó ndáha juéxe jáchi cuu ndiquiahva juéxe cán ndohó ndáha na policia ta chicaoan na ndohó vecaa.

<sup>26</sup> Mé a ndaa cáhí i xihin ndó ña cañuhu ndó cán jandá quiahva ná चाहvi ndó tóco ndihi jjuhún yicá ndo.

*Jánaħa Jesús sahá cuachi cája in dataa tá cúni da coo da xihin in ña co cúu ñájíhí da*

<sup>27</sup> 'Mé ndó sa xíní ndó ña ñasahnda ley Moisés chuun sanahá ta já ñacachi a já: "Coto a cóo ndó xihin ñájíhí á yí ñani táhan ndó."

<sup>28</sup> Joo yehe cáhí i xihin ndó viti ña ndá da sándehé in ñañáha ta cáhvi núu ini da xihin ña já quéa cómí tá cómí da cuachi nu Ndióxi jáchi cúu á tátuhun sa íin da xihin ña.

<sup>29</sup> 'Ña cán quéa cáhí i xihin ndó ña tá nduchú núu cuáha ndó quéa jándacava ndohó nuú cuachi,

tavá ndó ña jácana xícá ndó ña ná cuhūn a jáchi vaha chága ña ná ndihi sahá in nduchú núú ndó a juú ga ña ná cuhūn in ní yiquí cuñu ndó ini indayá.

<sup>30</sup> Ta tá ndahá cuáha ndó quéa caja ña ná ndacava ndó nuú cuachi, chitúhūn ndó ña ta jácana xícá ndó ña ná cuhūn a jáchi vaha chága ná ndihi saha ndáha ndo a juú ga ña ná cuhūn ní yiquí cuñu ndó ini indayá.

*Jánaḡa Jesús ña cō ndítahan nuú dataa jándacoo da ñájíhí da*

*(Mt. 19:9; Mr. 10:11-12; Lc. 16:18)*

<sup>31</sup> Ta mé ndó sa xíní ndó ña nasahnda ley Moisés chuun sanahá já cáchí a já: “Ndá da cūnī jándacoo ñájíhí da ndítahan cavaha da in tutu quiahva da nu ña ta sa ín vaha va cuu jándacoo da ña.”

<sup>32</sup> Joo yehe cáchí i xihūn ndo viti ña ni in túhūn toho ta cō ndítahan jándacoo da ñájíhí da. Jáchi ndá da jándacoo ñájíhí da cája da ña ná caja ña cuachi tá ná tandaha tucu ñá. Jári da tandaha xihūn ñá cómí ri da cuachi nu Ndióxi. Joo tá ná candaa ini da ña ín ñájíhí da xihín inga dataa já quéa cuu ndusa jándacoo da ña.

*Jánaḡa Jesús ña ndítahan caja na tá sahan na tuhun na nuú ñayivi*

<sup>33</sup> Mé ndó sa xíní ndó ña nasahnda ley Moisés chuun sanahá já cáchí a já: “Xíní ñúhú jáxinu cō ndó tóco ndihi ña nasahan ndó tuhun ndó caja ndó tá tává ndo quivi Ndióxi.”

<sup>34</sup> Joo yehe cáchí i xihūn ndó viti ña ná quiahva ndó tuhun ndó nuú ñayivi joo a tává ndó quivi ni

in ñaha. A tává ndó quiví indiví jáchi indiví cúú nu in coo Ndióxi.

<sup>35</sup> Ta ni a tává ndó quiví ñundáhyi jáchi ñundáhyi cúú nu sáni mé á ta ni a tává ndó quiví ñuu Jerusalén jáchi cúú á ñuu naxaxi Ndióxi, mé á cúú á rey cáhnu ndivaha.

<sup>36</sup> Ta ni a tává ndó quiví yiquí jíní ndó tá sáhan ndó tuhun ndó nuú ñayivi jáchi co ndéé ndó ndaja yaa ndó á ndaja tuún ndó ni in túhún ijí jiní ndó.

<sup>37</sup> Tá sáhan ndó tuhun ndó nuú ñayivi xíní ñúhú cachi ndó: “Ajan, caja i ña.” Á tá coó xíní ñúhú cachi ndó: “Uhun, a cúú caja i ña.” Jáchi tá cachi ndó inga tuhun já caja ndó ña cúni ña quini.

*Jánaha Jesús ña ndítahan caja cáhnu iní saha táhan ñayivi*

*(Lc. 6:29-30)*

<sup>38</sup> Mé ndó sa xíní ndó ña nasahnda ley Moisés chuun sanahá já cáchí a já: “Tá quiahva cája ñayivi xuhun quiahva já caja ri yóhó va xihin ná. Ta tá ná cani in da nduchú núún já quea ndítahan cani mún nduchú núú da. Tá ná tavá da nuhún já ndítahan nuun tavá ri yóhó va nuhú da”, cáchí ley Moisés.

<sup>39</sup> Joo yehe cáchí i xihin ndó viti: A cája ihvi ndó xihín ñayivi, na cája núu xihin ndó. Ta ndá na ná cani in xoo sajóho ndó, cata ñee ndó inga xoo sajóho ndó nu ná ña ná cani na a.

<sup>40</sup> Ta tá cúni in na candaca na ndohó cuhun ndó nu juéxe sahá ña cúni na candaa na cotó ndó já quea quiahva ndó ña nu ná ta janda cotó ndéé ndó quiahva ndó nu ná.

41 Ta tá vaxi in soldado nu ndó ta tá cahnda da chuun ña ná cojo ndó ñaha da in kilometro, xini ñuhú cojo ndó ña anda ivi kilometro cuhun ndo.

42 Ta ndá na ná caça in ñaha nu ndó quiahva ndó ña nu ná. Ta ndá na xíca too ñaha nu ndó, quiahva too ndó ña nu ná.

*Xini ñuhú quihvi ini na co cuni mi  
(Lc. 6:27-28, 32-36)*

43 'Mé ndó sa xini ndo ña nasahnda ley Moisés chuun sanahá já cáchi a já: "Quihvi ini ndó na xini táhan vaha xihin ndó ta candají ndó na co cuni táhan xihin ndo", cáchi ley Moisés.

44 Joo yehe cáchi i xihin ndo viti: Ndítahan quihvi ini ndó na co cuni táhan xihin ndó. Ta cahan vaha ndó xihin na canahá xihin ndó. Ta caja vaha ndó xihin na candají ndohó. Ta caça tahví ndó nu Ndióxi sahá na cája xixi xihin ndo.

45 Jáchi xihin ña yóho náha ña cúu ndó jahyi Ndióxi, tátá yo, mé á in indiví. Ta mé á cája ña ná cana candii jatá ñayivi quini xihin jatá ñayivi vaha. Ta mé á jácuun javi jatá ñayivi ndaa xihin jatá na co cája vaha.

46 A cáhan ndo ña caja Ndióxi cuahá ñamaní xihin ndo tá quihvi ini cuití ndó na quihvi ini ndohó va jáchi jandá ñayivi quini, na játaca jiuhún cuéntá impuesto cája na já.

47 Ta a cáhan ndo ña nacaja ndó cuahá ña vaha tá ná cahan Ndióxi cuití ndó xihin ñani táhan ndó jáchi jandá ñayivi co xini Ndióxi cája na já.

48 Xini ñuhú caja ndaa ndó xihin tóco ndihi ñayivi tá quiahva cája ndaa Ndióxi, tátá yo, mé a in indiví —nacachi Jesús.

## 6

*Jánaha Jesús ña ndítahan chindeé yo na ndahví*

<sup>1</sup> Já ñacachi tucu Jesús já:

—A ndúcú ndó caja vaha ndó nuú ñayivi sahá ña ná cuni táhyí na ña cája ndó já candoo vaha ndó nu ná. Jáchi tá ná caja ndó já coó toho ñaha ñehé táhvi ndó nu Ndióxi, tátá ndo ín indiví.

<sup>2</sup> Sahá ña cán queá tá chindeé ndó ñayivi, na ndímaní ñaha nuu, a cáca nuu ndó cahan lándá ndó ña nuú ñayivi tá quiahva cája na co cúu ná tá quiahva ndáa na. Jáchi na cán sahan na ñaha nuú na ndahví ini veñuhu xihín nu táca ñayivi íchi já ná cuu cuni táhyí tóco ndihi ñayivi ña vaha cája na. Jáchi na cán cuni na ña ná caja cáhnu ñayivi na. Mé a ndaa cáchi i xihín ndó ña sa yahvi na cúu mé ña cája cáhnu ñayivi na.

<sup>3</sup> Ña ndítahan caja ndó tá chindeé ndó na ndímaní ñaha nuu queá caja ndó ña ná a cándaá ini ni in ñayivi ña cája ndó

<sup>4</sup> ta xíní ñúhú caja jehé ndó ña. Ta Ndióxi, tátá ndo sándehe a ña vaha cája ndó xihín ñayivi ta mé á queá चाहvi a sahá ña cája ndó jan.

*Jánaha Jesús ñayivi ndaja caça tahví na nu Ndióxi (Lc. 11:2-4)*

<sup>5</sup> Tá xíca tahví ndo nu Ndióxi a cája ndó tá quiahva cája na co cúu ná tá quiahva ndáa na jáchi cátóo na candita na veñuhu xihín cáyé ña caça tahví na nu Ndióxi ña ná cuni táhyí ñayivi na. Mé a ndaa ná cahan i xihín ndo sa yahvi na cúu mé ña xíní ñayivi na.

<sup>6</sup> Joo ndóhó, tá xíca tahví ndó nu Ndióxi, tátá ndo ín indiví ndítahan quihvi ndó ini vehe ndó ta

chicaji tuun ndó yéhé a ta jan cuu caca tahví jehé ndo nu Ndióxi. Jáchi jan ín Ndióxi, tátá ndo xihin ndo taa joho a nu cáhan ndo ta caja mé á ñamaní xihin ndó.

<sup>7</sup> Ta tá xíca tahví ndó nu Ndióxi, a cáhan tucu tucu ndó mé tuhun ña coó saha jáchi ñayivi, na co xini Ndióxi cán cája na já. Ta cáhan na táa joho Ndióxi na sahá ña cuaha cáhan na joo a juú ña ndaa.

<sup>8</sup> Joo a cája ndó tá quiahva cája na cán jáchi Ndióxi, tátá ndo sa xini va mé á ndá quea xini ñúhú ndo janda tá camani caca ndó ña nu á.

<sup>9</sup> Ña yóho quea ndítahan cachi ndó tá xíca tahví ndó nu Ndióxi:

Tátá Ndióxi, ña ín indiví,  
cáhnú ná cacuu quivi ndó.

<sup>10</sup> Ná tandaa quí quivi cacomí ndó cuéntá sahá nde.

Ta ná coo tá ín cuni mé ndó coo ñuyivi yóho tá quiahva ín indiví cája ndó.

<sup>11</sup> Quiahva ndó nuú nde ña ndímaní nuú nde cuxu nde in in quivi.

<sup>12</sup> Caja cáhnú ini ndó sahá cuachi nde tá quiahva cája cáhnú ini mé nde sahá ña núu cája ñayivi xihín nde.

<sup>13</sup> Ta a quiahva ndó ñamaní ña ná coto ndojó tiñahá sacuaha ndehe já ná a cája nde cuachi nu ndó.

Jáchi cómí ndó cuéntá saha tóco ndihi ñayivi,  
ta cúu cája ndó tóco ndihi ñaha,

ta cáhnú cúu mé ndó anda ama cáa quivi.

Já ná coo, quiahva já cachi ndó tá xíca tahví ndó nu Ndióxi.

14 'Jáchì tá cája cáhnu ini ndó sahá ña núu cája inga na xihìn ndo já quéa cája cáhnu ri ini Ndióxi, tátá ndo, mé a ñin indiví sahá ndo.

15 Ta tá co cúnì ndo cája cáhnu ini ndó sahá ña núu nacaja inga na xihìn ndó já quéa a cája cáhnu ini Ndióxi sahá cuachi cája ndó.

*Jánaha Jesús ndaja ndítahan cája na tá cajuhun na*

16 'Tá cajuhun ndó a cája ndó tá quiahva cája na co cúu ná tá quiahva ndáa na. Na cán cúnì na ña ná cuni táhyí tóco ndihi ñayivi ña xíjuhun na sahá ña cán quéa cája cueha nuu na já ná ndiñehe jíco ñahá na. Mé a ndaa cáhí ñi xihìn ndo ña sa yahvi na cúu ña xínì ñayivi na.

17 Joo ndóhó, tá ná cajuhun ndó ndítahan cuchú nuú ndo ta ndaja vií ndó mé ndó.

18 Já quéa ná a cúnì ñayivi ña xíjuhun ndó ta in túhún Ndióxi, tátá ndo, mé a ñin tuun xihìn ndó cánda a ini ña mé a ndaa xíjuhun ndó ta mé á quéa चाहvi a sahá ña cája ndó ñan.

*Indiví cúu nu ndítahan ndaja tútú ñayivi ña vaha  
(Lc. 12:33-34)*

19 'A ndúcú ndó játaca cuahá ndivaha ndó ña cuicá canduu nu ndo ñuyíví yóho jáchì yóho cúu nu quihvi tiquijí ñaha ndó jándihi rí sahá ta já tívì ndihi ñaha ndó. Ta jári cuu quihvi ta cuihná cája cuihná da ña.

20 Vaha chága ná játaca ndó ña vaha indiví jáchì cán coo quihvi toho tiquijí jándihi rí sahá ñaha ndó. Ta mé cán ni in ñaha co tívì ta ni ta cuihná a cúu ndihvi cája cuihná.

21 Jáchì nuú nandaja tútú ndo ña ndáyahvi nu ndó, cán coo ri ínimá ndo.

*Nduchú núú yọ cúú á tátuhun lámpara ña jándiyehẹ nū xíca í  
(Lc. 11:34-36)*

<sup>22</sup> 'Nduchú núú yọ cúú á tátuhun in lámpara jándiyehẹ nū yó já xíní yọ nū xíca í. Ta tá tívi vaha nduchú núú yọ já cuu candehé vaha í nū xíca í.

<sup>23</sup> Joo tá cọ tívi nduchú núú yó já queá xíca yó nū naá ndivaha. Ta tá cáhán yọ ña cúú yó ña xíca nū yéhe ndivaha ta cáa ví yó cája í cuachi já queá cúú yó tátuhun ña xíca nū naá ndivaha.

*In ñaha cúú Ndióxi ta inga ñaha cúú jiuhún  
(Lc. 16:13)*

<sup>24</sup> 'Ni in túhún ñayivi a cúu caja chúun nuú ivi xitoho na jáchi candají ña in xitoho na ta inga xitoho na quihvi ini chága ña. Á tá cọó ta caja ndíví vaha na chuun nuú in xitoho na ta inga ña cán a cája chúun vaha na nuu. Ta quiahva já íin ri xihin ndóhó va jáchi a cúú caja cáhnu ndó Ndióxi tá chínúu ndó ínimá ndó jatá jiuhún ndo.

*Ndaá Ndióxi ña cúú cuéntá mé á  
(Lc. 12:22-31)*

<sup>25</sup> 'Candehé ndo ña cáhan i xihin ndó yóho: A ndícani ini ndó sahá ña cuxu ndó ta ni sahá ña coho ndó ña catacu ndó in in quivi. Ta ni a ndícani ini ndó saha jáhma candixi ndó. Jáchi tá tácu ndo, ña jan cúú ña cáhnu chága a juú ga ña cuxu ndó. Ta íin chága saha yiquí cuñu ndó a juú ga jáhma ndíxi ndó jan.

<sup>26</sup> Candehé ndó laa ndáchí nū táchi jan: rí jan ni cọ xútu rí ta ni a vája sáhan rí jáquee rí ta ni cọ yáca rí nū táán vaha rí nuni rí. Ta Ndióxi, tátá ndo, mé a íin indiví sáhan ña xíxi rí jan nū rí. Á cọ xíni ndó ña



ín chága saha mé ndó a juú ga laa cán. Saha ña cán quea quiahva mé á ña xini ñuhú ndó catacu ndó.

27 Ta coo saha toho ña ndicani nahá ini ndó jáchi a cuú ndaja jíco ndó mé ndó java metro chága sahá ña ndicani ini ndó.

28 Ta ni co ndítahan ndicani ini ndó saha jáhma candixi ndó. Candehé ndo ndá quiahva ndató sáhnú itá yucu. Mé ita jan ni co cája chúun a ta ni co cávaha jáhma á.

29 Joo mé a ndaa ná cahan i xihin ndo ña ñuchí chága ita yóho nacaja Ndióxi a juú ga jáhma vaha ndivaha nasandixi rey Salomón sanahá, da nasahiin cuahá ñaha cuíca.

30 Candehé ndó ndaja ndaa vaha Ndióxi yucu ita vatí ín tóo a viti ta itaan cáyi a jándihi sahá. Ndaja ga ví caja Ndióxi xihin ndóhó ña quiahva mé á tóco ndihi ña xini ñuhú ndó catacu ndó. Joo mé ndó co cándúsa ndó ña candaa mé á ndohó.

31 Ña cán quea a ndicani ini ndó saha ndá ña cuxu ndó á sahá ña coho ndó á sahá ña candixi ndó.

32 Jáchi na co xini íchi cuéntá Ndióxi, na cán cúu na ndicani cuahá ini saha tóco ndihi ña yóho. Joo cúu ndó cuéntá Ndióxi, tátá ndo ín indiví ta xini vaha mé á ña ndímaní nu ndó catacu ndó.

33 Joo ndítahan nu ndó ndiquiahva ndó mé ndó ndáha Ndióxi ña ná cacomí mé á cuéntá saha ndó ta já quiahva mé á ña ndímaní nu ndo catacu ndó.

34 A ndicani ini ndó sahá ña quixi nu ndó inga quiví itaan jáchi Ndióxi cuití va xini a ndía vaxi nu ndó quiví itaan ta coo sahá ndicani ini ndó sahá ña ndoho ndó itaan.

## 7

*Cō ndítahan candehé ndaa yó ñayivi*  
(Lc. 6:37-38, 41-42)

<sup>1</sup> 'A cándehé ndaa ndó ñayivi já ná a cándehé ndaa Ndióxi ndohó.

<sup>2</sup> Jáchi tá quiahva cája ndó xihín inga ñayivi quiahva já caja ri Ndióxi xihín ndohó va. Sahá ña cán quéa tá quiahva sándehé ndaa ndó ñayivi quiahva já caja ri Ndióxi xihín mé ndó.

<sup>3</sup> Jáchi ndá cuéntá quéa sándehé ndó ña núu cája ñani táhan ndó ta cō sándehé ndó ndá quiahva náhnu chága ña núu cája mé ndó. Cúu á tátuhun ndácaan in xehe loho nduchú núu ñani táhan ndó nani ndácaan in yító ndúhu cáhnu ini nduchú núu ndó.

<sup>4</sup> Ta tá a cuú cuni ndó yitó cáhnu ndácaan ini nduchú núu mé ndó ndaja caja ndó cachi ndó xihín ñani táhan ndó: “Ñani i, ná tavá loho i xehe ndácaan nduchú núuñ jan.”

<sup>5</sup> Jándahvi ndó mé ndó xihín ña cája ndó. Xíní ñúhú tavá ndó yitó cáhnu ndácaan nduchú núu mé ndó jan já ná nuna nu ndó cuni vaha ndó já ná cuu tavá ndó xehe loho ndácaan nduchú núu ñani táhan ndó.

<sup>6</sup> 'A quiahva ndó ña yii cuéntá Ndióxi nuú ñayivi quini. Jáchi tá cája ndó já cúu á tátuhun tá ná quiahva ndó ñaha yii nuú tina ta tiahva náá ndicó cōo rí tiin rí ndohó. Ta jári cúu á tátuhun tá ná quiahva ndó ñaha yahvi ndivaha tátuhun perla nu cóchí jáchi cuu cuani nihni rí ña.

*Ndaja caja í caca í ñamani nu Ndióxi*  
(Lc. 11:9-13; 6:31)

<sup>7</sup> Ndá ñaha ndímanj nū ndó xíní ñúhú caca ndó ña nū Ndióxi ta já quiahva mé á ña nū ndo. Ndinducú ndó ña cúnj ndo ta ñeñe ndó ña caja Ndióxi. Cúú á tátuhun catí ndáha ndo yéhé ta já nuna yéhé nū ndo.

<sup>8</sup> Jáchj na xíca in ñaha, na cán cúú na ñeñe va. Ta na ndúcú ñaha, na cán cúú na ndíñeñe ña. Ta na catí ndáha yéhé, na cán cúú na ndínuna yéhé nuu.

<sup>9</sup> Ta ndá ndó, na ndúu jahyi ta tá xíca jahyi ndó pan cuxu a nū ndo, ama cuéhé ri ndó quiahva ndó yuu nū á ña ná caxí a.

<sup>10</sup> Ta ama ná quiahva ri ndó in coo nū á caxi tá xíca tiyacá nū ndó cuxu a. Co cája ndó já.

<sup>11</sup> Candehé ndó. Vatí mé ndó cúú ndó ñayivi cája cuachi joo xínj vaha ndó quiahva ndó ña vaha nuú jahyi ndó. Ndaja ga ví cája Ndióxi, tátá ndo, mé a ín indiví xihín ndo. Quiahva mé á ña vaha nū ndo tá ná caca ndó ña nū mé á.

<sup>12</sup> Candehé ndó. Tá quiahva cúnj ndó caja ñayivi xihín ndo quiahva já ndítahan caja ri ndóhó va xihín ná jáchj ña yóho quéa sáhdá ley Moisés xihín ña naçahyí na profeta caja ndó.

*Yéhé táhán cúú nuú quihvi na cuhun indiví  
(Lc. 13:24)*

<sup>13</sup> Cúú á tátuhun ín ivj yéhé. In yéhé cúú á ña táhán ndivaha ta xíní ñúhú ndinducú ndó ndihvi ndó cán. Jáchj inga yéhé cúú á ña ndíca ndivaha nuú ndihvi na cuhun indayá. Ta cuahá ndivaha ñayivi cúú na xíca íchj ndíca cuahan na indayá nuú ndihi saha ná.

<sup>14</sup> Joo ña cúú íchj ña ndáca ñayivi yéhé táhán nū ndihvi na indiví cúú á ichí táhán ndivaha ta yáncá

ndivaha caca nuu í nu á. Ta chá ndivaha cúu na ndíhvi cán.

*Xihín cuihi cúun nuú in yító cuu ndicuní ndá yító cúu dó*

*(Lc. 6:43-44)*

<sup>15</sup> Cuéntá coo ndó xihín na tuhún, na cáhí cáhan na cuéntá Ndióxi jan. Jáchi uun ndivaha cása na nu ndo. Joo cúu ná tátuhun ndivahyí quini ndivaha vatí náha na tátuhun ndicachi loho.

<sup>16</sup> Cúu ndicuní ndó na xihín ña cája na. Jáchi ñayivi quini co cája vaha toho na. Cúu á tátuhun tá a cúu cuun uva nuú tohíñú ta ni a cúu jáquee ndó titó ñuhú nuú tohíñú.

<sup>17</sup> Ña cán quéa tóco ndihi yító vaha ndinuhu cuihi vaha cuití cúun nu do. Joo yító quini ndinuhu cuihi quini cuití cúun nu do.

<sup>18</sup> Dó cúu yító vaha cán a cúu toho cana cuihi quini nu do ta ni yító quini cán a cúu cuun cuihi vaha nu do.

<sup>19</sup> Ta tóco ndihi yító, dó co cána cuihi vaha nuu, tahnda do ta quee dó nu cándaha ñuhu ña cayi do.

<sup>20</sup> Sahá ña cán quéa xihín ña cája ñayivi já cuu ndicuní ndó á cúu ná ñayivi vaha á cúu ná na quini.

*A juú ndihi toho ñayivi ndihvi na nuú cacomí Ndióxi cuéntá saha ná*

*(Lc. 13:25-27)*

<sup>21</sup> A juú ndihi toho na cáhí cúu yehé xitoho na cuhun na nuú cacomí Ndióxi cuéntá saha ná. Na cája ña sáhdá Ndióxi, tátá i, mé a iin indiví na cán cuití cúu na cacomí mé á cuéntá saha.

<sup>22</sup> Jáchi tá ná xinu coo quivi caha vii Ndióxi sahá ñayivi já quéa casáha cahán cuhá ndivaha ñayivi

xihín i ta já cachi na já: “Jesús, mé ndó cúú xitoho nde ta xihín quivi mé ndó naxica nuu nde cáhan nde tuhun Ndióxi xihín ñayivi ta xihín quivi mé ndó ñatavá nde rí quini ñasañuhu ínimá ñayivi ta xihín quivi mé ndó ñacaja cuahá ndivaha nde ña xituhún”, cachi na xihín i.

<sup>23</sup> Ta anda já nducú ñehe e tuhun nu ná já cachi i já xihin ná: “Cọ xini toho i yo cúú ndóhó. Caxoo ndó nuú i jáchi ndinuhu ña quini cája ndó”, cachi i xihin ná.

*Sácú Jesús quiahva sahá ivi da ñacavaha vehe  
(Mr. 1:22; Lc. 6:47-49)*

<sup>24</sup> 'Ndá na xini joho ña cáhan i ta cája na ña, na cán cúú ná tátuhun in dataa, da íin xini túni ta ñacavaha da vehe da jata in tóto.

<sup>25</sup> Ta tá naxinu javi já ñasahnu yuta ta naxinu tachi quini jatá vehe cán joo cóo ñandicava vehe da jáchi tóyíí cándichi vehe da jata tóto cán.

<sup>26</sup> Joo na xini joho nu cáhan i ta có cája na ña, na cán cúú ná tátuhun in dataa, da có xini túni ta ñacavaha da vehe da nuú ñutí.

<sup>27</sup> Tá ñandihi já naxinu javi já ñasahnu yuta ta naxinu tachi quini jatá vehe cán. Anda já ñandicava vehe da ta chí ñandihi saha chí uun — ñacachi Jesús jánaḥa ñayivi.

<sup>28</sup> Ta tá ñandihi ñacahan Jesús ña yóho já tóco ndihi ñayivi ñacatóntó na xini joho na ndá quiahva jánaḥa mé á

<sup>29</sup> jáchi tá jánaḥa mé á nu ná cáhan tá quiahva cáhan in da íin saha cahnda chuun ta có cáhan toho a tá quiahva cája na jánaḥa ley Moisés.

## 8

*Tá nandaja vaha Jesús in da ndóho cuehe táhyi  
(Mr. 1:40-45; Lc. 5:12-16)*

<sup>1</sup> Tá nanuu Jesús jata yucu nuú nasanúu a cán já ndíco cuahá ndivaha ñayivi jatá cuahan.

<sup>2</sup> Ta ndaja coo já nacayati in dataa, da ndóho cuehe táhyi nu á. Ta já nacaxítí da nu á já nacachi da já xihin á:

—Cuu ndaja vaha ndó yehe, xitoho i tá cuni ndó —nacachi da xihin Jesús.

<sup>3</sup> Tá nandihí já nacani ndaa ndáha Jesús da já nacachi a já xihin dá:

—Cuni ña ná ndivahún ña cán quéa nandivahún viti —cáchi a xihin dá.

Tá nacachi Jesús já chí ivi laá nandindaa cuehe táhyi nandoho da cán.

<sup>4</sup> Anda já nacachi Jesús já xihin dá:

—Candehé. A cáxi tuhun tohún ña yóho xihin ni in tuhún ñayivi. Cuahán ndacún nahun mún nuú jutú. Ta ndítahan jocún ñaha nu Ndióxi tátuhun sáhdá ley Moisés sanahá caja na sa nandivaha. Já ná candaa ini tóco ndihí ñayivi ña sa nandindaa va cuehe nasandohún —nacachi Jesús xihin da cán.

*Tá nandaja vaha Jesús in da cája chuun nuú in jefe soldado  
(Lc. 7:1-10)*

<sup>5</sup> Tá nandihvi Jesús ñuu Capernaum já nacayati in da sáhdá chuun nuú soldado naquixi ñuu Roma nu Jesús jáchi cuni da caca da in ñamani nu á.

<sup>6</sup> Já nacachi da já xihin á:

—Á cō cúnĭ ndó caja ndó ñamanĭ ndaja vaha ndó mozo ĭ, datacú jáchi cándúhu dā vehe quíhvi dā naxihĭ tuchu yiquí cuñu da ta a juú quiahva cáhĭhvi yiquí cuñu da —ñacachi dā cán xihĭn Jesús.

<sup>7</sup> Já ñacachi Jesús já xihĭn dá:

—Vaha va, cūhun ĭ ndaja vaha ĭ dā —ñacachi Jesús.

<sup>8</sup> Anda já ñacachi tucu dā sáhndá chuun nuú soldado cán já xihĭn Jesús:

—Candehé ndó. Coó saha toho yehe ña ná ndihvi ndó vehe e. Joo cahnda cuití ndó chuun jandā nu ĩn ndó yóho ta já ndivaha va mozo ĭ.

<sup>9</sup> Jáchi ndúu java na náhnu chága sáhndá chuun nuú ĭ. Ta ndúu ri soldado sáhndá ri yehe va chuun nuu. Ta tá chindahá ĭ in da ña ná cūhun dā nu cúnĭ mí ĭ cūhun dā ta cuahan dā. Ta tá sáhndá ĭ chuun nuú inga dā ña ná quixi dā nuú ĭ ta vaxi da nuú ĭ. Ta tá sáhndá ĭ chuun nu mozo ĭ ña ná caja da ña sáhndá ĭ ta cája da ña —ñacachi dā cán.

<sup>10</sup> Tá naxini johó Jesús ña yóho já ñacatóntó a já ñacachi a já xihĭn na ndícō cuahan cán:

—Mé a ndaa ná cahan ĭ xihĭn ndo ña a ñáha cuni ĭ tañu na Israel in dā cándeé cáhnu nahá ini Ndióxi tá quiahva cándeé cáhnu ini dā yóho Ndióxi.

<sup>11</sup> Candehé ndo ná cahan ĭ xihĭn ndo ña quixi ñayivi ndijáá níí cúú saha ñuyívĭ ta cacōo na cuxu na xihĭn Abraham ta xihĭn Isaac ta xihĭn Jacob indivĭ nu ĩn Ndióxi cómĭ a cuéntá sahá ñayivi.

<sup>12</sup> Joo cuahá na Israel, na nanditahan nuu coo cán a cóo toho na cán. Ña caja Ndióxi xihĭn na cán queá cuitā na jatā véhe cūhun na nuú naá ndivaha. Ta cán cuacu ndivaha na jandā quiahva chicáhná mé nuhu ná —cáchi Jesús.

13 Tá nandihí já nacaḥan tucu Jesús xihín da sáhdá chuun nuú soldado cán já nacachi a já xihín dá:

—Cuanúhu vehún. Nandivaha mosún tá quiahva cúnun jáchi nacandúsún yehē —nacachi Jesús xihín dá.

Chí mé hora já nandivaha mozo da cán.

*Tá nandaja vaha Jesús ñá cúu xojo Pedro  
(Mr. 1:29-31; Lc. 4:38-39)*

14 Naṣaḥan Jesús vehe Pedro ta tá naxinu a cán cándúhu ñá cúu xojo Pedro quíhvi ñá jáchi chícaan cáhni ndeé ña.

15 Anda já ñatiin Jesús ndáha ñá quíhvi cán ta chí nandindaa cáhni ña. Ta já nandacoo ñá cán cája ndíví ñá nu ná.

*Tá nandaja vaha Jesús cuahá ndivaha na quíhvi  
(Mr. 1:32-34; Lc. 4:40-41)*

16 Ta tá nacuaá já ñéhe cuahá ndivaha na na quíhvi xihín na ñúhu ínimá quini ini nuú Jesús. Ta xihín in túhún tuhun nacaḥan mé á ñatavá ínimá quini ñúhu ínimá ñayivi ta jári nandaja vaha mé á tóco ndihi na quíhvi.

17 Ta tóco ndihi ña yóho ñayaha já ná xinu cōo nuú tuhun ña nacaḥyí profeta Isaías tá nacachi da já: “Mé á nandiquehe ndihi a ña cávitá iní ta naxojo ndihi a cueḥe yo”, cáchí tuhun Ndióxi.

*Ná cúni candico Jesús  
(Lc. 9:57-62)*

18 Tá naxini Jesús ña a juú quiahva cándíhi táhan ñayivi ndúu na xihín á já naṣahnda chuun ña ná cojo cava na inga xoo tañuhú cán.



19 Joo naçayati in da jánaḥa ley Moisés nu á já naçachi da já xihin á:

—Maestro, cúni candico i ndohó ndá naçuu nuú cuhun ndo —naçachi da xihin á.

20 Já nanducú ñehe Jesús tuhun nu dá já naçachi a já xihin dá:

—Ndicuii cúu rí ta vaṭi iin cáva ñúhu rí. Ta laa cúu rí ta vaṭi iin táca ñúhu rí. Joo yeḥe, da naçindahá Ndióxi nduu ñayivi, chí ni nuú cuju mí i coó va —naçachi Jesús xihin dá.

21 Ta inga da sa xíca xihin á naçachi da já xihin á:

—Maestro, quiaḥva jihna ndó ñamaní nuú i ña ná cuhun i jánduxu tátá i já quixi i candico i ndohó —naçachi da xihin á.

22 Já naçachi Jesús já xihin dá:

—Xíni ñúhú candicún yeḥe viti jáchi ná cuhun mé ñayivi, na a ñáha cacu ndaa ínima jánduxu na ndii jan —naçachi Jesús xihin dá.

*Tá najácatáji Jesús tachi xihín tañuhú tá ndícojo do*

*(Mr. 4:35-41; Lc. 8:22-25)*

23 Ta ndaja coo naquihvi Jesús ini in barco ta cátahan na xíca tuun xihin á cán cuahan na.

24 Ta nani xíca na nuú tañuhú cán cuahan na ta in náa cuití naxinu in tachi quíni ndivaha nuú tañuhú cán. Ta a juú quiaḥva ndeé naçasahá ndícojo ticuúí cán janda quiaḥva nandichutú ticuúí ini barco cán. Joo cándúhu Jesús ini barco quíji va.

25 Anda já ndáva na xíca tuun xihin á cán naṣahan na ndíñehe na ña. Já naçayuhú na já cáchí na xihin á:

—Chindeé ndó ndehe, xitoho nde. Jáchi cácoo barco cahá tañuhú cuahan do —nacachi na xihin á.

<sup>26</sup> Anda já nanducú ñehe Jesús tuhun nu ná já nacachi a já xihin ná:

—Ndá cuéntá quéa yíhvi nahá ndo. Ndá cuéntá quéa co cándeé ini ndó yehe —nacachi a.

Já nandacoo a ta jánani a tachi quini cán xihin tañuhú cán ta já nacatáji uun tóco ndihi a cán.

<sup>27</sup> Tá naxini na xica tuun xihin á cán ña yóho já nacatontó na ta nacasáhá ndáca tuhún táhan na já cáchi xihin táhan na já:

—Ta ndá da cúu dataa yóho ña janda tachi xihin tañuhú cándusa nu cáhan da —cáchi xihin táhan na cán.

*Tá naqueta ivi da ñuhu ínimá quini ini nuú Jesús  
(Mr. 5:1-20; Lc. 8:26-39)*

<sup>28</sup> Tá naxinu coo Jesús inga xoo tañuhú cán nu ín ñundáhyi cuéntá Gadara já naqueta ivi da ñuhu ínimá quini ini tañu nu ndúxu ndii. Ta nacayati da nuú Jesús. Ndívi mé da ñuhu ínimá quini ini yóho cúu dá tátuhun quiti, rí cuehe ndivaha. Sahá ña cán quéa ni in túhún ñayivi a cúu yaha chí íchi cán.

<sup>29</sup> Tá naxini da Jesús já nacasáhá da cáyuhú da nu á já cáchi da já xihin á:

—Ndá cuéntá quéa vasún quihvi nuún xihin nde, Jesús, da cúu in túhún jini já jahyi Ndióxi. Á vasún jándoho yachún ini nde tá cámaní yii ndinda tiempo ndoho ini nde —nacachi rí quini cán xihin Jesús.

<sup>30</sup> Ta ndaja coo yati cán nasanduu cuahá ndivaha cóchi xixáhan rí.

<sup>31</sup> Ta mé rí quini ñúhu ini ndíví daṭaa cán naxica taḥví rí nu Jesús já cáchí rí já xihín á:

—Tá ta ná tavún ndeḥe ini da yóho, quiahva ñamani nuú nde ña ná cuḥun nde ndihvi nde ini cóchí ndúu cáa —naçachi rí xihín Jesús.

<sup>32</sup> Anda já naçachi Jesús já xihín rí:

—Cuáhán ndó, dá já.

Chí naqueta rí quini cán ini ndíví daṭaa cán já naṣahan rí nandihvi rí ini cóchí cán. Ta chí ivi laá xínu tóco ndihi cóchí cán cuahan rí núu rí nu ndáyi yuhú tañuhú cán. Ta najáqueta nuu rí mé rí ini tañuhú chí naçandaa rí ticuij já naxihí rí.

<sup>33</sup> Ta chí a juú quiahva nayihví da ndáa cóchí chí naxinu ndivaha da cuahan da. Ta tá naxinu da ñuu já naçasáhá da ndícani da ndaja cáa ña nayaha xihín ndíví da naṣañuhu ínima quini ini cán.

<sup>34</sup> Anda já naqueta tóco ndihi ñayivi ñuu cán cuahan na candehé na Jesús. Ta tá naxini na mé á já naxica taḥví na nu á ña ná queue a cuḥun a.

## 9

*Tá nandaja vaha Jesús in da naxihí tuchu saha  
(Mr. 2:1-12; Lc. 5:17-26)*

<sup>1</sup> Tá sa nayaha tóco ndihi ña yóho já nandaa Jesús jatá in barco ta já naxojo cava inga xoo tañuhú cán janda quiahva naxinu çoo a ñuu mé á.

<sup>2</sup> Ta cán ñéhe na in da quíhvi, da naxihí tuchu saha ta cánduhu da nu yívi loho ñéhe na naçasaa na nu á. Ta tá naxini Jesús ndá quiahva cándeé ini da cán mé á já naçachi a já xihín da quíhvi cán:

—Candehé, jahyi a. A ndícani toho inún jáchí cája cáhnu ini i sahá cuachún viti —naçachi Jesús xihín dá.

<sup>3</sup> Java táhan da jánahá ley Moisés nacasáhá da cáhán da já: “Mé da yóho ndája núu da Ndióxi xihín tuhun cáhan da jáchi ni in túhún toho ñayivi a cuú caja cáhnu ini sahá cuachi.”

<sup>4</sup> Joo sa nacandaa ini Jesús ña cáhvi ini da cán sahá ña cán quéea nandaca tuhún a da já nacachi a já xihín dá:

—Ndá cuéntá quéea cáhvi núu ini ndó sahá yehe.

<sup>5</sup> Á cáhán ndo ña ihvi chága cachi i xihín da yóho: “Nacaja cáhnu ini i sahá cuachún viti.” Á tá coó ta cachi i xihín dá: “Cuándacoo ta cuáhán.”

<sup>6</sup> Candehé vaha ndo ná nahá i nu ndo ña ín sahá i, da nachindahá Ndióxi nduu ñayivi caja cáhnu ini i sahá cuachi cája ñayivi ñuyíví yóho —nacachi Jesús xihín dá.

Tá nandihí já nandicahan tucu a xihín da naxihí tuchu saha cán:

—Ta viti cáhan i xuhun cuándacoo ndiquehe xito lohún ta cuanúhu vehún —nacachi Jesús xihín dá.

<sup>7</sup> Chí ivi laá nandacoo da quíhvi cán ta já naquee da cuanúhu dá.

<sup>8</sup> Tá naxini ñayivi ndúu cán ña nacaja Jesús yóho já nayihví na ta nacasáhá cája cáhnu na Ndióxi sahá ña nasahan ndée mé á nuú ñayivi ña ná cuu caja na ña xitúhún.

*Tá nacana Jesús Mateo ña caca tuun da xihín á  
(Mr. 2:13-17; Lc. 5:27-32)*

<sup>9</sup> Tá nandihí já naquee Jesús cuahan ta nani xíca cuahan já naxini a in dataa naní Mateo, da ín coo nu sácoo da jataca jiuhún cuéntá impuesto. Ta nacana Jesús da já nacachi a já xihín dá:

—Naha quíi candicún yehe.

Anda já nandaca ndichi Mateo ta nacasáhá ndíco da Jesús.

<sup>10</sup> Tá nandihi já íin coo Jesús xíxi a vehe da cán ta cán naxinu coo cuahá táhan na játaca jiuhún cuéntá impuesto xihín java ga ñayivi cája cuachi. Nasacoo na xíxi na xihín Jesús ta cán ndúu coo ri na xíca tuun xihín a cán.

<sup>11</sup> Ta tá naxini na fariseo ña ndúu na cán xíxi na xihín Jesús já nacasáhá na ndáca tuhún na na xíca tuun xihín Jesús cán já:

—Ndá cuéntá quéa xíxi xitoho ndó xihín na játaca jiuhún cuéntá impuesto ta xihín java ga na cája cuachi —nacachi na fariseo cán.

<sup>12</sup> Joo tá naxini johó Jesús ña yóho já nacachi a já xihín na fariseo cán:

—Ñayivi íin vaha coo xíní ñúhú toho na da cája tátá ñahá joo na quíhvi, na cán cúu na xíní ñúhú da cája tátá ñahá.

<sup>13</sup> Ta yehe coo vaxi toho i cana i na sa íin vaha. Vaxi i cana i ñayivi, na cája cuachi ña ná jándacoo na cuachi cája na. Xíní ñúhú cuhun ndo jácuaha vaha ndó ña cúní cachi tuhun Ndióxi tá cáchí a já: “Ña cúní quéa ná candáhví ini ndó ñayivi jáchi vaha chága ña yóho a juú ga ña ná joco ndó quítí nuú i”, cáchí tuhun Ndióxi —cáchí Jesús xihín ná.

*Cáhan Jesús ndá saha quéa cajuhun na  
(Mr. 2:18-22; Lc. 5:33-39)*

<sup>14</sup> Tá nandihi na xíca xihín Juan, da jácandúta ñayivi cán naxinu coo na nu Jesús. Já nacasáhá ndáca tuhún na mé á já nacachi na já xihín á:

—Ndávaha cō xíjuhun toho na xíca xih̄in yóhó nani cuahá ndivaha xíjuhun mé nde xih̄in na fariseo —n̄acachi na cán xih̄in Jesús.

<sup>15</sup> Anda já n̄anducú ñehe Jesús tuhun nu ná já n̄acachi a já xih̄in ná:

—Á cáhán ndo canduu cuéha na ndúu in vicó tándaha nani ín mé da tándaha cán xih̄in ná. Uhun. Jáchi cájii ini na. Joo xinū cōo quiví candaa na da tándaha cán anda jáví casáhá cajuhun na. Ta cáchí i xih̄in ndo ña vaxi quiví candaa na yehe nuú na yóho ta anda jáví casáhá na xíca tuun xih̄in i cajuhun na —n̄acachi Jesús.

<sup>16</sup> Ta nasacu Jesús inga quiahva nu ná já cáchí a já:

—Ama ná jándaha ñayivi jahmá yatá xih̄in in tuhun jáhma saá jáchi tá n̄andih̄i ndíndí a, sáhdá chága ví a jahmá yatá cán ta jándacáhn̄u chága ví a yávi ña n̄andicahmá na cán.

<sup>17</sup> Ta ni cō táán na vino saá ini vósō ní yatá jáchi jácáhd̄i mé vino cán ní ta cujta mé vino cán ta tívi vósō ní cája dó. Sahá ña cán quéa ndítahan taán yo vino saá ini vósō ní saá ná a ndíhi saha vino xih̄in vósō —cáchí Jesús.

*Tá n̄andaja vaha Jesús jahyi jíhí Jairo xih̄in in ña n̄acani ndaa ndáha jáhma á*

*(Mr. 5:21-43; Lc. 8:40-56)*

<sup>18</sup> Ta nani cáhan Jesús cándichi a naxinu cōo in da sáhdá chuun nuú na Israel. Já n̄acaxítí da nu á ta já n̄acachi da já xih̄in á:

—Jaca naxih̄i uun ña loho cúu jahyi jíhí i joo tá ná caja ndó ñaman̄i quixi ndó vehe e ta chinúu ndó

ndáha ndó jata ña já nditacu tucu ñá –nacachi da cán xihín Jesús.

19 Anda já naquee Jesús cuahan xihín da cán ta ndaca na xica tuun xihín á cán cuahan na.

20 Ta ndaja coo cán iin in ñáñáha, ñá ndítahví nijí ñá tixi uxu ivi cuia. Ta nacayati ñá chí jata Jesús já nacani ndaa ndáha ñá yuhú jáhma á.

21 Jáchí nacahán ña: “Tá ná cani ndaa cuití ndáha í jáhma Jesús já ndivaha í”, nacahán ña.

22 Joo nandicoto nihni jata Jesús nu ñá ta tá naxini a ñá já nacachi a já xihín ña:

—A cáyihví tohún, jahyi a. Nandivahún jáchí nacandúsún yehe —nacachi Jesús xihín ñá.

Ta chí mé hora já nandivaha ñá.

23 Ta tá naxinu coo Jesús vehe da sáhdá chuun nuú na Israel cán já naxini a ña sa ndúu música cán ña ná cuhun na jánduxu na jahyi da cán. Ta naxini a jándá johó sácu cóhó ñayivi ndúu na.

24 Ta chí já nacachi a já xihín tóco ndihi na cán:

—Cuahán queta ndó jata véhe. Jáchí coo naxihí toho ñá loho yóho. Quíjé cuití va ñá —nacachi Jesús xihín ñayivi ndúu cán.

Joo nacasáhá na cán sácu ndaa ñahá na.

25 Ta chí natavá Jesús na jata véhe. Ta tá nacayati a nu ñá cán já natiin a ndáha ñá chí ivi laá nandaco ñá.

26 Ta níí cúú ñundáhyi cán nandicuíta nuu tuhun sahá ña nacaja Jesús cán.

### *Tá nandaja vaha Jesús ivi da cuaá*

27 Tá naquee Jesús cuahan já ndíco ivi da cuaá jata cuahan da já nacasáhá cáyuhú cóhó da já cáchí da já xihín á:

—Jesús, da naquixi chichi David caja ndó ñamani candáhví loho ini ndó ndehe —cáchi da cáyuhú da jatá Jesús.

28 Ta ndaja coo naquihvi Jesús ini in vehe ta já nacayati ndívi da cuaá cán nu á. Já nacasáhá ndáca tuhún a da cán já nacachi a já xihín dá:

—Á cáhán ndo ña cuu caja i jándiyehē nuu ndo — nacachi Jesús xihín da cán.

—Ajan, xitoho nde. Cándúsa nde ña cuu caja ndó ña —nacachi ndívi da cuaá cán xihín Jesús.

29 Tá nandihí já nacani ndaa ndáha Jesús nduchú núu da cán ta já nacachi a já xihín ndívi da cán:

—Ná coo tá quiahva cúni ndo jáchi cándeé ini ndó yehē —cáchi a.

30 Tá nandihí já nacasáhá sándehe ndívi da cuaá cán. Ta nasahnda Jesús chuun nu dá ña ná a cáxi tuhun da nuú ñayivi sahá ña najaja mé á xihín dá.

31 Joo tá jacá naqueta uun da cán já nacasáhá da ndícani da nuú ndijáá ñayivi ndúu ñundáhyi cán sahá ña najaja Jesús xihín dá.

### *Tá nandaja vaha Jesús in da níhi*

32 Nani naquee da cuaá cán cuahan da já nasaa java ñayivi nu Jesús ñéhe na in da níhi, da ndácaan ínimá quini ini.

33 Ta tá natavá Jesús ínimá quini ini da cán chí ivi láá nacasáhá cáhan da. Ta a juú quiahva nacatóntó ñayivi ta já cáchi na já:

—Ni in tuhún tañu coó naxini nde in ñaha tátuhun ña yóho ñundáhyi Israel —nacachi na cán.

34 Joo na fariseo cán nacasáhá cáchi na já:



—Rí cúú tiñáhá sacuaḥa nu rí quini sáhan rí ndée rí nuú Jesús yóho ña ná tavá a ínima quini ini ñayivi —ñacachi na fariseo cán.

### *Táhnda ini Jesús sahá ñayivi*

<sup>35</sup> Ndijáá ñuu náhnu xihín ñuu válí naxica nuu Jesús jánaḥa tuhun Ndióxi ini veñuhu na cán. Ta naçaxi tuhun a tuhun vaḥa xihín ñayivi ña sa naçayati quivi cacomí Ndióxi cuéntá saḥa ná. Ta nandaja vaḥa mé á tá nuú cueḥe ndóho ñayivi.

<sup>36</sup> Ta tá naxini Jesús ñayivi cuaḥa cán já natahvi ini a saḥa ná jáchi ndóho ini na ta cávitá ini na tátuhun ndicachi, rí coó ña candaa ñahá.

<sup>37</sup> Anda já ñacachi Jesús já xihín na xica tuun xihín a cán:

—Mé á ndaa ndúu cuaḥá ndivaḥa ñayivi, na cuni cuni johu tuhun Ndióxi joo chá cuití na cuni cuhun na caḥan na ña xihín ñayivi. Cúú á tátuhun ín cuaḥá ndivaḥa ní ña xini ñuhú jáquee joo ndímaní ñayivi jáquee na ña.

<sup>38</sup> Sahá ña cán queá xini ñuhú caça tahvi ndó nu Ndióxi ña ná chindahá mé á chága na cája chúun cuéntá mé á —cáchi Jesús xihin ná.

## 10

*Chindahá Jesús na xica tuun xihin á ña ná cuhun na caḥan na tuhun Ndióxi xihin ñayivi*

*(Mr. 3:13-19; Lc. 6:12-16)*

<sup>1</sup> Tá nandihí já naçana Jesús ndíhuxu ivi na xica tuun xihin á cán. Ta já naṣaḥan ndée nu ná ña ná cuu tavá na ínima quini ini ñayivi. Ta naṣaḥan ndée nu ná ña ná ndaja vaḥa na tá nuú cueḥe ndóho ñayivi.

<sup>2</sup> Ña yóho cúú quiví ndíhuxu ivi na cúú apóstol xíca tuun xihín á cán: Da nu cuítí cán naní da Simón ta cáhan ri na Pedro xihín dá. Ta inga da cán cúú Andrés ñani da. Ta inga da cúú Jacobo xihín ñani da, Juan. Ndíví da yóho cúú dá jahyi Zebedeo.

<sup>3</sup> Tañu na cán ndácaan ri Felipe xihín Bartolomé xihín Tomás xihín Mateo, da najátaca jiuhún cuéntá impuesto. Ta cán ndácaan ri Jacobo, da cúú jahyi Alfeo xihín Lebeo, da cáhan ri na Tadeo xihín.

<sup>4</sup> Ta cán ndácaan ri Simón, da naxica cuéntá na cananista xihín Judas Iscariote, mé da najicó túhún Jesús tá nu ndíhí cán.

<sup>5</sup> Tá nachindahá Jesús ndíhuxu ivi na cán já nacachi a já xihín ná:

—Coto a cūhun ndó chí ñuu ñayivi tóho, na co cúú na Israel. Ta ni a quíhvi ndó ñuu ñúhu chí estado Samaria.

<sup>6</sup> Vaha chága ná cūhun ndó cahan ndó tūhun Ndióxi xihín na Israel jáchi cúú ná tátūhun ndicachi, rí nandiñúhú.

<sup>7</sup> Cuáhán ndó caxi tūhun ndó xihín ná ña sa nacayati quiví cacomí Ndióxi cuéntá sahá ñayivi.

<sup>8</sup> Ta ndaja vaha ndó na quíhvi ta jánditacu ndó ndi ta ndaja vaha ndó na ndóho cuehe táhyi. Ta tavá ndó rí quini ñúhu ínimá ñayivi. Ta a quehe ndó yahvi sahá ña cája ndó jáchi coó naxeen ndó ndé ñéhe ndó jan.

<sup>9</sup> A cáñehe toho ndó ni jiuhun cuáán ni jiuhun cúxú ni jiuhún caa cuáhá caca nuu ndó.

<sup>10</sup> Ta ni a cáñehe ndó yátí cūhun ndó íchi. Ta ni a cáñehe ndó inga naha jáhma ndó cūhun xihín ndo. Ta ni a cáñehe ndó inga ndusa ndó cūhun ndo. Ta

ni garróte a cáñehe ndó cūhun ndo. Jáchi nditahan nuú ñayivi quiahva na ña nu ndo.

11 Tá ná xinu coo ndó in ñuu cáhnu á ñuu loho, xini ñúhú ndinducú ndó in ñayivi, na cuu candeé ini ndó ta vehe na jan canduu ndó janda quiahva ná xinu quivi quee ndó cūhun ndo.

12 Ta tá ná xinu coo ndó vehe jan cahan Ndióxi ndó xihin ná.

13 Ta tá ná ndiquehe vaha ñayivi vehe jan ndohó já quea cachi ndó xihin ná ña ná coo vaha ini na. Joo tá co cuni na ndiquehe vaha na ndohó já quea a cahan ndo xihin ná ña ná coo vaha ini na.

14 Ta tá co cuni na ndiquehe vaha na ndohó ta ni co cuni na cuni joho na nu cahan ndo já quea cuahán queta ndó vehe jan á ñuu jan ta catí ndó ña yacá saha ndó já ná naha ña cuahan cuachí na cán jata mé va na.

15 Jáchi mé a ndaa ná cahan i xihin ndo ña tá ná xinu coo quivi caja vii Ndióxi sahá ñayivi ndúu ñuyivi já quea jándoho chága Ndióxi ini ñayivi ñuu jan a juú ga tá quiahva najándoho a ini na ñuu Sodoma xihin ñuu Gomorra sanahá sahá ña coo nandiquehe na ndohó.

*Vaxi quivi caja xixi ñayivi xihin na xica cahan tūhun Ndióxi*

16 Candehé ndo. Yehe chindahá i ndohó cūhun ndó tañu ñayivi quini. Cúú ndó tátūhun ndicachi válí tañu ndivahyí ña cán quea xini ñúhú cuénta vaha coo ndó tá quiahva cája coo. Ta xini ñúhú coo mánsó ndo tá quiahva cája ndijata.

17 Cuéntá coo ndó jáchi tiin na ndohó ta ndiquiahva na ndohó ndahá na jutixia. Ta cani na ndohó ini veñuhu.

18 Ta saha mí i cañehe na ndohó cūhun ndó nuú na cúu gobernador á nuú na cómi cuéntá sahá in nación. Ta já ná cuu ndicani ndó sahá i nuú na cán ta xihín nuú na tóho, na co cúu na Israel.

19 Joo a ndicani ini ndó saha ndá tuhun cahan ndó tá ná ndiquiahva ñayivi ndohó ndahá na cán. Jáchi tá ná ndindaa hora cahan ndó xihín ná já queá quiahva mé va Ndióxi tuhun nu ndó ña ná cuu cahan ndó sahá i nuú na cán.

20 Jáchi a juú jiní mé ndó quixi ña cahan ndo. Ínima yíi Ndióxi cacuu ña quiahva tóco ndihi ña cahan ndo.

21 Ta java ta jicó túhún da ñani da ta java da jicó túhún da jahyi da ña ná cahní ñahá na. Ta java na ndicuíta na cani táhan na xihín tátá na ña ná cahní ñahá na.

22 Ta ndaja táhan ñayivi ndúu ñuyíví yóho candají na ndohó sahá yehe. Joo ndá na ná candico tuun íchi mí i janda ná xinu quivi quivi na, na cán cacuu na cacu ndaa ínima.

23 Tá ná ndicuíta na caja xíxi na xihín ndó in ñuu já cunu ndó cūhun ndó inga ñuu. Jáchi mé a ndaa ná cahan i xihín ndo ña tá sa xinu coo tucu yehe, da nachindahá Ndióxi nduu ñayivi já a ñaha caca nuu ndó ndijáá ñuu ndácaan ñundáhyi Israel.

24 Candehé ndo. Ni in túhún toho da xíca jácuaha tiahva chága da nu mé dá jánaha ñahá cán. Ta ni in túhún mozo co cúu dá da cáhnu chága nuú xitoho da.

25 In da jácuaha ndítahan cajii íní da tá sa xíní ndihi da ña xíní maestro da. Ta da cúu mozo ndítahan cajii ini da tá ná xinu da cacuu da cáhnu tátuhun xitoho da. Candehé ndo. Tá ná cachi ñayivi xihín da cúu xitoho ndó ña cúu da Beelzebú, rí cúu tiñáhá sacuahá ndaja ga ví cachi na xihín ndóhó.

*Yo já ndítahan cayihví yo*

*(Lc. 12:2-7)*

26 Candehé ndo. A cáyhví toho ndó ñayivi jáchi ni in túhún toho ñaha cája ñayivi a cúu coo jehé nahá jáchi vaxi quivi tá ndáca náha nu á. Ta vatí cáhan jehé ñayivi tuhun joo vaxi quivi tá candaa ini ñayivi sahá.

27 Ña cáhan yehe xihín ndó nuú naá xíní ñúhú cáhan ndó ña ndiví táhyí nani yehe candii. Ta ña cáhan jehé e xihín ndo xíní ñúhú ndaa ndó jiní véhe cayuhú ndó ña.

28 A cáyhví toho ndó ñayivi, na cuu caja cahní yiquí cuñu ndó jáchi ni in ñaha a cúu caja na xihín ínimá ndo. Ndióxi quéa xíní ñúhú cayihví ndo jáchi mé á cuu jándihi a saha yiquí cuñu ndó ta cuu jácana mé á ínimá ndo ini indayá anda ama cáa quivi.

29 Candehé ndo. Laa válí ndáchí rí nu táchi ta núu ndivaha jícó na rí. Joo ni in rí cán co cýu nu ñúhu ña quivi rí tá co sahan Ndióxi, tátá ndó ñamaní.

30 Ta viti caja ndó cuéntá xihín mé ndó. Janda ijí jiní ndó jan ndáhvi tá in tá in a nu Ndióxi.

31 Ña cán quéa a cáyihví toho ndó jáchi ndíyahvi chága ndo nu Ndióxi a juú ga cuahá ndivaha laa váli.

*Tá cahan cáxi ñayivi ña cúu ná cuénta Jesús  
(Lc. 12:8-9)*

32 Ndá na cáxi tuhun nuú ñayivi ña cuahan na cuénta mí i já quéa cachi mí i sahá na nu Ndióxi, tátá i, mé a ín indiví, ña mé a ndaa cúu ndusa na cán cuénta mí i.

33 Joo ndá na ná cachi xihín ñayivi ña co xini toho na yehe já quéa ni yehe a ndícuni toho i na ña cúu ná cuénta mí i nu Ndióxi, tátá i, mé a ín indiví.

*Cája Jesús ña sáhdá java táhan ñayivi  
(Lc. 12:51-53; 14:26-27)*

34 A cahan toho ndó ña naxinu i ñuyívi yóho caja i ña ná coo vaha ini ñayivi. Co caja i já. Jáchi ña vaxi yehe caja i quéa ná cahnda java táhan na.

35 Vaxi i jácani táhan i dataa xihin tátá da sahá yehe. Ta vaxi i jácani táhan i in ñáñáha xihin náná ña sahá yehe. Ta vaxi i jácani táhan i ña cúu sanu xihín xojo ña sahá yehe.

36 Ta ndaja vehe mé ñayivi ndicuíta na cani táhan na sahá yehe.

37 Ta ndá na cuni chága tátá na á náná na a juú ga yehe já quéa coo saha toho na cacuu na cuénta mí i. Ta ndá na quíhvi ini chága jahyi yíi na á jahyi jíhi na a juú ga yehe já quéa coo saha toho na cacuu na cuénta mí i.

38 Ndá na co cuni ndoho ini sahá ña candico na yehe ta co ín tihva na quivi na sahá i já quéa coo saha toho na cacuu na cuénta mí i.

39 Jáchí ndá na cátóó coo chága na ñuyíví yóho, na cán cúú na ndihi saha. Joo na sáhan ndeé ini quivi sahá i, na cán cúú na ñehe táhvi na catacu na anda ama cáa quivi.

*Ña quiahva Ndióxi nuú ñayivi*  
(Mr. 9:41)

40 'Ndá na ndíquehe vaha ndohó, ndíquehe vaha ri na yehe va. Ta ndá na ndíquehe vaha yehe, ndíquehe vaha ri na Ndióxi, mé a nachindahá yehe vaxi i ñuyíví yóho.

41 Ndá na ndíquehe vaha in profeta vaxi cuéntá Ndióxi já quéa tá quiahva coo yahvi ndiquehe profeta cán quiahva já coo ri yahvi ndiquehe na cán. Ta ndá na ndíquehe in ta vaha sahá ña cúú dá ñayivi vaha já quéa ndiquehe na cán yahvi na tá quiahva cáa yahvi ndiquehe ta vaha cán.

42 Ta ndá na ná quiahva ñaha vatí in yáxi ticuñi nuú in na cúú jahyi i yóho sahá ña ndíco na íchi cuéntá mí i, mé a ndaa ná cahan i xihin ndó ña chahvi Ndióxi sahá ñamaní cája na xihin ná —cáchi Jesús.

## 11

*Juan, da jácandúta ñayivi nachindahá da java da xíca xihin dá nuú Jesús*  
(Lc. 7:18-35)

1 Tá nandihí nanaha Jesús nuú na xíca tuun xihin á cán ña ndítahan caja na já naquee a cuahan jánaha nuú ñayivi ta cáxi tuhun a tuhun Ndióxi nuú ñayivi ndúu ñundáhyi cán.

2 Mé tiempo já nasandacaan Juan vecaa, mé dá cúú dá da jácandúta ñayivi. Ta cán nañehe

dá t̄uhun sahá ña náhnu cája Jesús. Anda já nachindahá da java na xíca xih̄in dá nu á

<sup>3</sup> ña ná ndaça t̄uhun na Jesús á jivi ndusa cúu á Cristo, mé a chindahá Ndióxi cacomí a cuénta sahá ñayivi, á ndítahan candati na inga ga quixi.

<sup>4</sup> Tá nandih̄i nandaca t̄uhun da cán Jesús sahá ña yóho já nacachi Jesús já xih̄in ná:

—Cuáhán ndó ndicani ndó nu Juan tóco ndih̄i ña naxini ndó cája i xih̄in tóco ndih̄i ña naxini joh̄o ndó cáhan i.

<sup>5</sup> Ta ndicani ndó nu dá ña ndínuna nuú na cuaá ta ndícaca na rénc̄o cája i. Ta ndaja vaha i na ndóho cuehe táhyi. Ta jándinuna i joh̄o na joh̄o já ná cuni joh̄o na. Ta jánditacu u ndii. Ta cáxi t̄uhun i t̄uhun Ndióxi nuú na ndahví já ná cuu cacu ndaa ínima ná.

<sup>6</sup> Tahví nacuu na c̄o jándacoo ña cándeé ini na yehe —nacachi Jesús.

<sup>7</sup> Tá naquee na nachindahá Juan cán cuaahan na já nacasáhá Jesús cáhan xih̄in ñayivi já cáchí a já xih̄in ná:

—Ndía nacaahán ndo cuni ndó tá naqueta ndó nasahan ndó sándehe ndo Juan yucú íchí cán. A juú da cán cúu t̄aa láhá já quíji nuu da tátuhun quíji nuu in tóyoó cája tach̄i.

<sup>8</sup> Ndía naqueta ndó candehé ndó. A juú da cán cúu t̄aa ndíxi jahmá lánd̄a ndivaha. Sa xini vaha ndó ña c̄o ndúu toho da ndíxi jahmá lánd̄a yucú íchí. Ndá da ndíxi jahmá lánd̄a cúu da ndúu vehe rey cuití va.

<sup>9</sup> Ndía nasahan ndó candehé ndó cán. A c̄o nasahan ndó cuni joh̄o ndó nu cáhan in da cúu profeta nu ndo. Mé a ndaa da cán cúu dá in profeta



ta ín chága saha dá a juú ga inga profeta nasanduu sanahá.

<sup>10</sup> Jáchi mé Juan cúú dá da cahan tuhun Ndióxi saha tá cáchi a já:

Chindahá i in da canúú cahun nu mún,  
já ná caja tiahva da íchi nuú quisún, já nacyhi a sanahá.

<sup>11</sup> Candehé ndo ná cahan i xihin ndo. Tañu tóco ndihi ñayivi coó ga inga profeta cahnú chága a juú ga Juan, mé da jácandúta ñayivi. Joo ndá na sanandiquiahva mé ndáha Ndióxi ña ná cacomí a cuénta saha ná, vatí cúú ná na coó saha, na cán cúú na cahnú chága a juú ga Juan.

<sup>12</sup> Janda quiví naxinu Juan, da jácandúta ñayivi ta janda viti ñúhú ndíhi ndivaha ini ñayivi ndiquiahva na mé ná ndáha Ndióxi. Ta na sahan tuhun ndeé ini, na cán cúú na ñehé táhvi cacomí Ndióxi cuénta saha.

<sup>13</sup> Janda tá camani xinu Juan tóco ndihi ña nacyhi na profeta xihin ña nacyhi Moisés cahan ña vaxi quiví cacomí Ndióxi cuénta saha ñayivi.

<sup>14</sup> Ta tá cuni ndo candúsa ndó ña nacyhi na cán sanahá já cuu candaa ini ndó ña Juan cúú dá da nacyhan na cán saha tá nacyhi na ña ndítahan quixi tucu profeta Elías ñuyiví yóho.

<sup>15</sup> Na ín johó, ná cuni johó na.

<sup>16</sup> Ná cahan i xihin ndó ndaja ín ñayivi ndúu tiempo viti. Cúú ná táthun na valí sácoo sájíquí na nuú yahvi ta cáyuhú na nuú java ga na valí ndúu cán ta já cáchi na já:

<sup>17</sup> “Nativí nde tótiví nu ndo joo coó naxeen ndó cata sáhá ndo. Ta naxita cuéha ndivaha nde nu ndo ta ni coó nasacu ndó.”

18 Quiahva já íin ñayivi ndúu tiempo viti jáchi tá naquixi Juan, da jácandúta ñayivi ta naxijuhun da ta ni coó naxihi da vino joo ñacachi ndó saha dá ña ndácaan ínima quini ini da.

19 Ta tá naxinu yehe, da ñachindahá Ndióxi nduu ñayivi ta xíxi i pan ta xíhi i vino já ñacasáhá cáchí ndó sahá i ña cúu u in taa ndehé ndivaha ta xíhi ndivaha i. Ta cáchí ndó ña cátoó ndivaha i cacuu amigo na cája cuachi xihín na játaca jiuhún cuénta impuesto. Joo na cúni cándaá ini ña ndaa, na cán cúu na cándaá ini ña cája Juan ta cája ri yehe ña ndaa —ñacachi Jesús xihín ná.

*Ñayivi saá ini coó cúni na caja na ña cúni Ndióxi  
(Lc. 10:13-15)*

20 Tá ñandihí já ñacasáhá Jesús jáñani a ñayivi ndúu ndíjáá ñuu nuú ñacaja cuaha chága mé á ña xituhún. Jáchi vatí ñacaja cuaha mé á ña xituhún nu ná coó ñandicó coo ini na nu Ndióxi. Ña cán quéa ñacachi Jesús já xihín ná:

21 —Ndáhví ñahá ñacuu ndó, na ñuu Corazín. Ta ndáhví ñahá ñacuu ndó, na ñuu Betsaida. Cuahá ndivaha ña náhnu ñacaja i nu ndo joo coó ñaxeen ndó ndicó coo ini ndó jándacoo ndó cuachi ndó. Sanahá najándihí Ndióxi sahá ñuu Tiro xihín sahá ñuu Sidón sahá cuachi na. Tá ná sahan i caja i ña náhnu nuú na cán tá quiahva ñacaja i nu mé ndó, sa najándacoo va na cán cuachi na, nduu. Ta chí ivi laá ndaca ndixi na jahmá ndii ta jácuyu na yaa yiquí jíní na, nduu. Jáchi xihín ña yóho jáñaha na ña ñandicó coo ini na sahá cuachi na.

22 Mé a ndaa ná cahan i xihín ndo tá ná xinu quiví caja víi Ndióxi sahá ñayivi já ndoho chága ini

mé ndó, na ñuu jan a juú ga tá quiahva nandoho ini ñayivi nasanduu ñuu Tiro xihín ñuu Sidón sanahá.

<sup>23</sup> Ta viti cáhan i xihín ndó, na ndúu ñuu Capernaum. Janda indiví cúní ndó cuhun ndó joo sahá ña sáa ini ndó cuhun ndó janda indayá, caja Ndióxi. Jáchí tá ná caja i ña xituhún nuú ñayivi ñuu Sodoma tá quiahva nacaja i nu ndóhó ta ni a ndíhi sahá ñuu cán, nduu.

<sup>24</sup> Mé a ndaa ná cáhan i xihín ndo ña tá ná xinu quiví caja vií Ndióxi sahá ñayivi já ndoho chága ini mé ndó, na ñuu jan a juú ga tá quiahva nandoho ini ñayivi nasanduu ñuu Sodoma sanahá — nacachi Jesús.

### *Tá nacajii ndivaha ini Jesús*

*(Lc. 10:21-22)*

<sup>25</sup> Mé tiempo cán nacahan Jesús já nacachi a já:

—Cája cáhnu i ndohó, tátá Ndióxi, ña cúu xitoho tóco ndihi ñaha ndúu indiví xihín ñuyiví. Jáchí najánaha ndó ña ndíchí ndivaha nuú ñayivi, na coó cuahá saha nuú java ga na. Ta nacaja ndó ña ná a cuú candaá ini na ndíchí xihín na tácu ini ñaha mé ndó.

<sup>26</sup> Já nacaja ndó jáchí já nasacu ini ndó caja ndó —nacachi Jesús.

<sup>27</sup> Anda já nacachi a já xihín na ndúu cán:

—Nandiquiahva tátá i tóco ndihi ñaha ndahá i ña ná cacomí i cuénta sahá. Ta ni in túhún toho ñayivi co xini vaha na yehe, da cúu in túhún jiní já jahyi Ndióxi. Mé Ndióxi, tátá i cuití va xini vaha yehe. Ta ni in túhún toho na co xini vaha na yo cúu tátá i. In túhún yehe, da cúu jahyi a xini vaha i yo cúu mé á. Ta yehe cúu da caxi ndá ñayivi jánaha i nuu sahá Ndióxi, tátá i já ná candaá vaha ini na yo cúu mé á.

28 Naha ndihi ndó nuú i, na sa nacanaá cája chún. Taxi ndó ña ndójo ndó jan nuú i ta já yehe caja i ña ná ndiquehe ndée ndo.

29 Yehe cúni ña ná ndiquiahva ndó mé ndó ndahá i. Ta ña yóho cúú á tátuhun in yúcu chínú na sahá jiqui tindiqui. Ta xíní ñúhú catiahva ndó caja ndó tá quiahva cája yehe. Jáchi coo cama jiní i xihín ñayivi ta cúú u ta manso ndivaha. Quiahva já caja ndó já ñehe íní ndo ndiquehe ndée ndo.

30 Jáchi yúcu chínú i jata ndo xihín ñaha jácojo i jata ndo cúú á ña cama ñúhú laá —nacachi Jesús.

## 12

*Ña nacaja na xica tuun xihín Jesús in quivi ndiquehe ndée ñayivi*

*(Mr. 2:23-28; Lc. 6:1-5)*

1 Ta ndaja coo in quivi ndiquehe ndée ñayivi xica Jesús cuahan tañu nuú naxutu na trigo. Ta sahá ña cuico na xica tuun xihín Jesús sahá ña cán quéa nacasáhá na túhún na java yucu jiní trigo cán ta tává na trigo sáxí na.

2 Tá naxini na fariseo ña yóho já nacasáhá na cáhan cuachí na nuú Jesús. Já cáchí na já:

—Candehé. Na xica tuun xuhun jan cája na chuun ña co ndítahan caja ñayivi quivi ndiquehe ndée yó —nacachi na xihín Jesús.

3 Já nanducú ñehe Jesús tuhun nu ná já nacachi a já xihín ná:

—Á a ñaha toho cahvi ndó nuú tuhun Ndióxi nu cáhan sahá ña nacaja David sanahá tá nacuico da xihín na xica xihín dá.

<sup>4</sup> Ña ñacaja da quéa ñaquihvi da ini veñuhu Ndióxi ta ñaxixi da pan ña yí. Ta ni nu mé dá ta ni nuú ña xíca xihín dá cán cō cáni a nuú cuxu na pan cán. In túhún jutū cuití va cáni a nuú cuxu na pan cán.

<sup>5</sup> Ta á a ñáha toho cahvi ndó ña ñacahyí Moisés nu ley tá ñacahyí da ña cō cája toho jutū cuachi nu Ndióxi vatí cája chúun da veñuhu quivi ndíquehe ndée ñayivi.

<sup>6</sup> Mé a ndaa ná cahan i xihín ndo ña ín chága sahá i, da cándichi yóho a juú ga sahá veñuhu nu cája cánu na Ndióxi jan.

<sup>7</sup> Mé ndó cō cándaá toho ini ndó ña cúní cachi tuhun Ndióxi tá cáchí a já: “Yehe cúní ña ná candáhví ini ndó ñayivi jáchí vaha chága ña yóho a juú ga ña ná joco ndó quítí nuú i”, cáchí tuhun Ndióxi. Jáchí tá ná cándaá ini ndó tuhun yóho, nduu ta a chícáan toho ndó cuachi jatá ñayivi, na cōó cuachi.

<sup>8</sup> Candehé ndó. Yehe, da ñachindahá Ndióxi nduu ñayivi, ín sahá i cahnda i chuun sahá quivi ndíquehe ndée ñayivi —ñacachi Jesús.

*Tá ñandaja vaha Jesús in da ñahichi ndáha  
(Mr. 3:1-6; Lc. 6:6-11)*

<sup>9</sup> Tá ñandihí já ñaquee Jesús cuahan já ñandihvi a veñuhu mé ñuu cán.

<sup>10</sup> Ta cán ñasandacaan in dataa, da ñahichi ndáha. Ta sahá ña ndúcú ña fariseo ndúu cán ndá quiahva cajú na já ná cuu chícáan ña cuachi jatá Jesús sahá ña cán quéa ñandacá tuhún ña mé á já ñacachi na já:

—Á sáhan Ndióxi ñamaní ndaja vahún na quíhvi quívi ndíquehe ndée yo —nacíchi na cán xihín á.

<sup>11</sup> Anda já nacachi Jesús já xihín ná:

—Candehé ndó. Tá ín in ndicachi loho jana ndo ta tá ná ndicava rí ini in táhvi quívi ndíquehe ndée yo, ama ná a cühun ndó tavá ndó rí.

<sup>12</sup> Ta ndíyahvi chága ñayivi a juú ga ndicachi. Ña cán quéa sáhan Ndióxi ñamaní cája í ña vaha quívi ndíquehe ndée yo —nacíchi Jesús xihín ná.

<sup>13</sup> Tá nandihí nacachi a já xihín dataa, da nahichí ndáha cán já:

—Jándacaa ndáhun —nacíchi a xihín dá.

Tá najándacaa da ndáha dá já nandivaha ndáha dá. Ta cáa tá quiahva cáa inga ndáha da cán.

<sup>14</sup> Joo tá naqueta na fariseo cán já nacasáha na jándique táhan na tuhun na ña cahní na Jesús.

### *Ña cáhan Isaías sahá Jesús*

<sup>15</sup> Tá nañehé Jesús tuhun ña ndúcú na cán cahní ñahá na já naquee a cuahan va ta cuahá ndivaha ñayivi ndíco jatá cuahan. Ta ndaja táhan na quíhvi nandaja vaha Jesús.

<sup>16</sup> Ta nasahnda Jesús chuun nuú na sa nandivaha cán ña ná a cáxi tuhun na nuú ñayivi yo cúu mé á.

<sup>17</sup> Tóco ndihí ña yóho nayaha já ná xinu cõo nuú tuhun nacahyí profeta Isaías tá nacahyí da já:

<sup>18</sup> Yóho ín da cája chúun cuéntá mí i, mé dá nacaxi i.

Quíhvi ndivaha ini i da ta cáji íní i xihín ña cája da. Ta jáchutu ndaa i ínimá dá xihín ínimá yií mí i, ña ná jánaha da nuú ñayivi ndúu ñuyiví ndá quiahva cája víi i saha ná.

19 Ta ni a cáhan cuachi toho da ta ni a cáyuhú cóhó da,

já quéa a cúní johó ñayivi xíca cállé nu cáhan da.

20 Tá quiahva a jácuachi toho da ndoo, dó sa natahnu,

quiahva já a jácuachi toho da ñayivi, na cávitá ini.

Ta quiahva já ni a ndáhvá toho da tití ñúhu loho, ña sa cúní ndahva janda quiahva ná quee vaha ña ndaa xihín ña ihvi.

21 Ta ndaja táhan ñayivi ndúu ní cúu ñuyiví tandaa candeé ini na mé dá, nacañyí Isaías sanahá.

*Jácojo na cuachi jatá Jesús ña cája chúun a xihín ndée tiñáhá sacuaña*

*(Mr. 3:20-30; Lc. 11:14-23; 12:10)*

22 Java ñayivi ñéhe na in da cuaá ta cúu dá da níhi jáchi ndácaan rí quini ini da. Ta tá nandaja vaha Jesús da já nasandehé da ta nandicañan da.

23 Tá naxini ñayivi ndúu cán ña yóho já nacaatontó ndivaha na já nacasáhá ndaca tuhún táhan na já cáchí na já:

—Á a juú da yóho cúu da naquixi chichi rey David —cáchí xihín táhan na.

24 Tá naxini johó na fariseo ña cáhan ñayivi cán já nacasáhá cáchí mé na fariseo cán já:

—Taa yóho cúu tává da rí quini ñúhu ini ñayivi jáchi mé Beelzebú, rí cúu tiñáhá sacuaña nu rí quini cán sáhan rí ndée rí nu dá cája da ña —nacachi na.

25 Ta sa xini va Jesús ña cáhvi ini na cán sahá ña cán quéa nacachi a já xihín ná:

—Tá sáhdá java táhan ñayivi ndúu in nación ta ndúu na cuaha táhdá já cásáhá cáni táhan ndaja táhan mé va na já cama chá ndihi sahá nu ndúu na

cán. Ta quiahva já yaha ri xihín in ñuu á in vehe tá sáhndá java táhan ndaja táhan mé ná já queá jándihi na saha ná.

<sup>26</sup> Ta quiahva já yaha xihín Satanás, rí cúu tiñáhá sacuahá. Ta tá ná tavá rí inga rí quini ini ñayivi á tá ná cani táhan ndaja táhan mé rí já queá ndihi saha ndée ña cómí rí.

<sup>27</sup> Mé ndó cáhí ndo ña tává i rí quini ini ñayivi xihín ndée Beelzebú, rí cúu tiñáhá sacuahá. Joo tá mé a ndaa cúu ndusa ña cáhí ndo sahá i jan, ndáchí quehe na cúu cuéntá mé ndó jan ndée tavá na rí quini ini ñayivi. Ama ná cachi ndó ña tává ndo rí quini xihín ndée tiñáhá sacuahá. Ña yóho náha ña co cáhvi ndaa ini ndó.

<sup>28</sup> Candehé ndo. Yehe tává i ínima quini ini ñayivi xihín ndée ínima yii Ndióxi. Ta xihín ña yóho náha cáxí a ña sa naxinu coo quivi cacomí Ndióxi cuéntá saha ndó.

<sup>29</sup> Candehé ndo. Sácú u in quiahva nu ndo. Ni in dataa a cúu ndihvi da caja cuíhná da ñaha vehe in da ndacú joo tá ná cató da da ndacú cán já cuu quehe da ñaha da cán.

<sup>30</sup> 'Ndá na coo cuahan xoo i, cúu ná na co cúní yehe. Jáchi ndá na co chindeé yehe xihín ña cája i, cúu ná na sájí nuu nuú i.

<sup>31</sup> Ña cán queá cáhí i xihín ndo ña caja cáhnu ini Ndióxi saha tá nuú cuachi cája ñayivi xihín saha tá nuú tuhun quini cáhan na. Joo tá ná cahan núu na saha ínima yii Ndióxi já queá a cája cáhnu toho ini Ndióxi sahá ña naja na.

<sup>32</sup> Caja cáhnu ini Ndióxi janda saha ndá na ná canahá xihín yehe, da nachindahá Ndióxi nduu ñayivi joo tá ná canahá na xihín ínima yii Ndióxi



já quéa a caja cáhnu toho ini Ndióxi saha ná ni nani tácu na ndúu na ñuyívi yóho ta ni tá cuhun na cavií saha ná nu Ndióxi.

*Xihín cuihi cúun nuú in yító cuu ndicuní ndá yító cúu dó*

*(Lc. 6:43-45)*

<sup>33</sup> Xíní ñúhú jándee ndó yító vaha ña ná cuun cuihi vaha nu do. Jáchi tá ná jándee ndó yító núu já quéa cuihi núu cuun nu do. Jáchi xihín cuihi cúun nuú in yító cuu ndicuní ndá yító cúu dó.

<sup>34</sup> Mé ndó cúu ndó tátuhun coo jáchi cúu ndó na quini sahá ña cán quéa cáhan ndó tuhun quini ta a cuú cana tuhun vaha yúhu ndo. Jáchi yúhu ñayivi cána tóco ndihi ña nandicutú ñúhu ínimá ná.

<sup>35</sup> In ta vaha cáhan da ndinuhu ña vaha jáchi ndinuhu ña vaha ñúhu ínimá dá. Ta in ta quini cáhan da ndinuhu ña núu jáchi ña núu quéa ndácaan ínimá dá.

<sup>36</sup> Mé a ndaa ná cahan i xihín ndo ña tá ná ndinda quívi caja víi Ndióxi sahá ñayivi ndúu ñuyívi anda jávi ndiquiahva ñayivi cuénta nu Ndióxi sahá ndaja táhan tuhun núu naçahan na ñuyívi yóho.

<sup>37</sup> Jáchi saha mé tuhun naçahan ndó jan caja víi Ndióxi saha ndo. Ta xihín ña jan cachi Ndióxi ña á íin cuachi ndó á coo cuachi ndó —cáchi Jesús.

*Xíca ñayivi quini ña ná caja Jesús ña xitúhún nu ná*  
*(Mr. 8:12; Lc. 11:29-32)*

<sup>38</sup> Java na fariseo xihín na jánaha ley Moisés naçahan na xihín Jesús já naçachi na já xihín á:

—Maestro, cuni nde ña ná caja ndó in ñaha xitúhún nuú nde já ná cuni nde —naçachi na xihín Jesús.

39 Já nanducú ñehe Jesús tuhun nuú na cán já nacachi a já xihín ná:

—Ñayivi quini, na co cúní cándúsa Ndióxi, na yóho cúu na cúní cuni ña xitúhún. Joo a cúní toho na ña. Ña cuni ndusa na quéa ña ndoho i tá quiahva nandoho Jonás, da nasacuu profeta sanahá.

40 Jáchí tá quiahva nasandacaan Jonás uní quivi xihín uní ñuú tixi tiyacá cáhnu tá nacocó rí da quiahva já ndacaan ri yehe, da nachindahá Ndióxi nduu ñayivi tixi ñundáhyi uní quivi xihín uní ñuú.

41 Ta ñayivi nasanduu Nínive sanahá cán ndacuíta na chicaan na cuachi jata ndó tá ná xinu quiví caja víi Ndióxi sahá cuachi ñayivi ndúu viti. Jáchí mé na nasanduu ñuu Nínive cán najándacoo na cuachi cája na tá nacaan Jonás xihín ná ña nacachi Ndióxi coo. Ta yehe ín chága sahá i a juú ga Jonás joo co cándúsa ndó yehe.

42 Jári tá ná xinu quiví caja víi Ndióxi sahá cuachi ñayivi ndúu tiempo viti anda já ndacuíta in ña nasacomí cuénta sahá ñayivi ndúu chí xoo sur sanahá ta chicaan ña cuachi jata ñayivi ndúu tiempo viti. Jáchí mé ña cán vatí nasahin xíca ndivaha ña nu rey Salomón sanahá nasahan ña cuni johó ña tuhun ndíchí cáhan da. Ta yehe ín chága sahá i a juú ga Salomón joo co cándúsa ndó yehe.

*Jánaqa Jesús ña cuahá tañu ndícó coo tucu ínima quini ini ñayivi vatí sa naquee rí*

*(Lc. 11:24-26)*

43 Tá quéta in ínima quini ini in dataa já quée rí cuahan rí xíca nuu rí ndijáa yucú íchí ndínducú rí

nuú candoo rí. Ta tá co ndíñehē rí ña já cásahá cáhvi ini rí já:

<sup>44</sup> “Coho ndicó coo tucú ini da nuú nasandacaan í cán jáchí cúú á tátuhun vehé”, cáhán rí. Ta tá xínu coo rí ini da cán já sáñdehé rí ña íñ vií va ini da cán tá quiahva vií ini vehe tá ñatíhví á ta nandaca ndójó vaha tóco ndihi ñaha ini a.

<sup>45</sup> Anda já quee tucu mé rí quini cán cuahan rí quehe rí usa ga rí quini chága a juú ga mé rí já xínu ndihi rí ndíhví rí ini dataa cán. Ta mé da cán ndiquini chága da a juú ga tá nasandacaan in taláa rí ini da. Quiahva já ndoho rí ñayivi quini ndúu tiempo viti —cáchi Jesús.

*Nána Jesús xihín ñani a cúní na cuni na a*  
(Mr. 3:31-35; Lc. 8:19-21)

<sup>46</sup> Nani cáhan yí va Jesús xihín ñayivi já ñaxínu coo nána Jesús xihín ñani a ña ná cahan na xihín á cúní na. Joo ñacandoo na ndíta na jata véhe.

<sup>47</sup> Já ñasahan in na cáxi tuhun na nuú Jesús já cáchi na já xihín á:

—Jata véhe cáa íñ nánún xihín ñanún ta cahan na xuhun cúní na —ñacachi na xihín Jesús.

<sup>48</sup> Joo nanducú ñehē Jesús tuhun nuú na cán já ñacachi a já xihín ná:

—Cáhan í xihín ndó ndá na cúú ndusa nána í xihín ñani í —ñacachi Jesús xihín ná.

<sup>49</sup> Anda já ñanahá ndáha mé á na xíca tuun xihín á cán já ñacachi a já:

—Na yóho cúú ná tátuhun nána í xihín ñani í.

<sup>50</sup> Jáchí ndá na cája ña cúní Ndióxi, tátá í, mé a íñ indiví, na cán cúú ná tátuhun ñani í xihín quiahva í xihín nána í —ñacachi Jesús xihín na cán.

# 13

*Sácú Jesús quiahva sahá in da sátá tata  
(Mr. 4:1-9; Lc. 8:4-8)*

<sup>1</sup> Sa mé quivi já naqueta Jesús vehe cán já nasahan nasaco a yati yuhú tañuhú cán.

<sup>2</sup> Ta sahá ña nataca cuahá ndivaha ñayivi nu á sahá ña cán quéa nandaa mé á jatá in barco loho ta nasaco a jatá do cán nani ndúu ñayivi ñutí yuhú tañuhú cán.

<sup>3</sup> Anda já nacasáhá jánaha cuahá ñaha nu ná ta nasacu a quiahva nu ná já nacachi a já xihin ná:

—In da sátá tata naquee da cuahan da cata da ña.

<sup>4</sup> Ta tá sátá da ña cuahan da já nacuyu java ña íchi ta cán naxinu laa ta nasaxí rí ña.

<sup>5</sup> Ta java ña nacuyu a tañu yuu nuú coó cuaha ñuhú. Ta cama chá nanduta mé tata jáchi co cúná ñuhú nuú nacuyu a.

<sup>6</sup> Joo tá naqueta candii já najáhichi ñahá sahá ña coó cuaha yoho a chí nandihí sahá.

<sup>7</sup> Ta java tata nacuyu tañu tohíñú ta tá nasahnu tohíñú cán já nanditáha ndihi a nacaja tohíñú.

<sup>8</sup> Ta java tata nacuyu a nu ñuhú vaha ta já nasahan cuahá ñaha ña jáquee na nu á. Java ña nasahan in ciento a nuú in in tata ta java ña nasahan uní jícó uxu a ta java ña nasahan oco uxu a nuú in in tata.

<sup>9</sup> Na ín johó, ná cuni johó na —nacachi Jesús.

*Ndicani Jesús ndá saha quéa nasacu a quiahva nu  
ná  
(Mr. 4:10-12; Lc. 8:9-10)*

10 Na xíca tuun xihín Jesús cán nacayati na nu á já nacasáhá ndáca tuhún na mé á ndá cuéntá quéa jánaḥa mé á xihín quiahva cuití va nuú ñayivi.

11 Anda já nacachi Jesús já xihín ná:

—Ña coo nacandaa ini ndó jihna ña cán cándaa ini ndó viti jáchi nasuná Ndióxi xíní túní ndo cándaa ini ndó ndá quiahva cacomí mé á cuéntá sahá ñayivi. Joo na a ñaha cacomí Ndióxi cuéntá saha, na cán cúu na sácú u quiahva nuu.

12 Jáchi ndá na sa ín ñaha nuu, ñeḥe táhví na coo chága ñaha nu ná. Joo na co á ñaha nuu, janda ña chá ín nu ná ndindaa.

13 Sahá ña cán quéa cáhan i xihín ndinuhu quiahva xihín mé ndó jáchi vatí sándeḥé na joo cúu ná tátuhun na co tívi nuu. Ta vatí xíní johó na joo cúu ná tátuhun na johó jáchi co cándaa ini na ña cáhan i xihín ná.

14 Ta xihín ña yóho xínu coo nuú tuhun nacachi profeta Isaías sanahá ndivaha tá nacachi da já: Vatí xíní johó na joo cúu ná tátuhun na johó jáchi co cándaa ini na ña cáhan i xihín ná.

Ta vatí sándeḥé na joo cúu ná tátuhun na co tívi nuu.

15 Jáchi nandaji xíní túní tóco ndihi ñayivi ñuu yóho. Ta ndájí tuun johó na ta ndájí tuun nduchú núu na.

Ña cán quéa a cuú cuni johó na,

ta ni a cuú candehé na,

ta ni a cuú cándaa ini na ña xíní johó na.

Ta xihín ña yóho co ndícó coo na nuú i ña ná ndaja vaha i na, nacahyí Isaías sanahá.

16 Joo táhví nacuu ndó jáchi cándaa ini ndó ña sándeḥé ndó xihín ña xíní johó ndó.

17 Mé a ndaa ná caħan i xihin ndo ña cuahá ndivaha na profeta xihín cuahá ndivaha ñayivi vaħa naħica ini na cuni na ña xíní ndó yóho viti joo coó naħini na ña ta naħica ini na cuni joħo na ña xíní joħo ndó yóho joo coó naħini joħo na ña.

*Ndicani Jesús ña cúni cachi quiahva nasacu a nu ná*

*(Mr. 4:13-20; Lc. 8:11-15)*

18 Cuni joħo ndó ña cúni cachi quiahva nasacu u saħá da sátá tata cán.

19 Ñayivi, na xíní joħo tuħun vaħa saħá ña sa nacayati quiví cacomí Ndióxi cuéntá saħá ñayivi joo co cándaā ini na ña, na cán cúú ná tátuhun tata ña nacuyu íchi cán. Jáchi xínu tiñáhá sacuaħa ta tává ri tuħun Ndióxi cán ínima ná.

20 Ta tata ña nacuyu tañu yuu cán náħa ndá quiahva ín ñayivi, na cájii ndivaha ini ndíquehe tuħun Ndióxi.

21 Joo saħá ña co ñéħe íní yóho a cuħun cúná a saħá ña cán queá chá tiempo cuití va cándúsa na tuħun Ndióxi. Jáchi tá casáhá ndóho ini na saħá tuħun Ndióxi chí jándacoo va na ña.

22 Ta tata ña nacuyu tañu tohínú cán náħa ndá quiahva ín ñayivi, na xíní joħo tuħun Ndióxi joo co jándacoo na íchi naħica na jihna. Ta casáhá ndicani ini na saħá ñaha ñuyiví yóho ta casáhá na cátóó na canduu cuahá ñaha cuicá nu ná ta casáhá ndicají ini na caja na ña núu. Saħá ña cán queá cúú á tátuhun tata ña co cána ñaha jáquee na nuu jáchi coó nasahnu na xihín tuħun Ndióxi.

23 Joo tata ña nacuyu nuú ñuhú vaħa cán náħa ndá quiahva ín ñayivi, na xíní joħo tuħun Ndióxi ta

cándaa ini na ña ta cája na ña cájii ini Ndióxi xihin. Java na cúu ná tátuhun yucu trigo ña nasahan in ciento a nuú in in tata. Ta java na cúu ná tátuhun tata ña nasahan unj jico uxu a nuú in in tata. Ta java na cúu ná tátuhun tata ña nasahan oco uxu a nuú in in a —nacachi Jesús xihin ná.

*Sácú Jesús quiahva sahá yucu quini nána tañu trigo*

<sup>24</sup> Anda já nasacu Jesús inga quiahva nuú ñayivi ndúu cán já nacachi a já xihin ná:

—Tá ná casahá cacomí Ndióxi cuéntá sahá ñayivi já cacuu a tátuhun tá naxutu in dataa trigo ña vaha nu ñúhu dá.

<sup>25</sup> Joo tá sa ndúu ndihi na quíji na já naxinu coo in da co cúní táhan xihin dá ta nachihin da tata yucu quini tañu trigo cán já naquee da cuahan da.

<sup>26</sup> Ta tá nasahnu trigo cán ta nacasahá cána yoco a já nanduta ri yucu quini cán.

<sup>27</sup> Anda já nasahan na cája chúun cán cáhan na xihin xitoho na já nacachi na já: “Candehé ndo. Tata vaha quea nachihin ndó nu ñúhu ndo joo co cándaa ini nde ndáchí naquixi yucu quini nanana xihin á yóho”, nacachi na cán xihin xitoho na.

<sup>28</sup> Anda já nanducú ñehe da cán tuhun nu ná já nacachi da já xihin ná: “Ndá da co cúní yehe, da cán cúu da nacaja ña yóho”, nacachi da. Anda já nacachi na cája chúun nu dá cán já xihin dá: “Á co cúní ndó ña ná quihvi nde tuhun ndihi nde yucu quini cáa tañu trigo”, nacachi na xihin dá.

<sup>29</sup> Anda já nacachi da já xihin ná: “Ná coo mé á jáchi tiahva náá nani tuhun ndó yucu quini jan cuu tuhun ndó yucu trigo xihin á.

<sup>30</sup> Vaha chá ná quiahva í ñamanj cuahnu a xihin trigo janda quiahva ná ndindaa tiempo jáqueé trigo. Ta tá sa jáqueé já cahnda i chuun nuú na jáquee ña ná tavá xoo na yucu quini jihna ñúhú ta ná cató na ña tá nuhni tá nuhni ña ná chicaoan ñúhu ná ña. Ta anda jáví ná jataca na trigo taán vaha na ini yaca ñaha i”, nacachi da —cáchi Jesús sácú a quiahva nu ná.

*Sácú Jesús inga quiahva saha ndiqui mostaza  
(Mr. 4:30-32; Lc. 13:18-19)*

<sup>31</sup> Ta nasacu Jesús inga quiahva nu ná já nacachi a já xihin ná:

—Tá ná xinu cõo quivi cacomí Ndióxi cuéntá sahá ñayivi já cúú á tátuhun in ndiqui mostaza ña chíhin in dataa nu ñúhu da.

<sup>32</sup> Cúú á ndiqui loho chaga nu tóco ndihi ndiqui válí in ñuyiví. Joo sáhnua a janda quiahva ndúu a in yito, dó cáhnua nu ndihi yito nu xinu cõo laa cávaha rí choho ri nu ndaha do —cáchi Jesús.

*Sácú Jesús quiahva sahá yusá naxaa  
(Lc. 13:20-21)*

<sup>33</sup> Ta nasacu Jesús inga quiahva nu ná já nacachi a já xihin ná:

—Tá ná cacomí Ndióxi cuéntá sahá ñayivi já cacuu a tátuhun tá cává táhan in ñáñaha unj táhnda náhnua harina xihin loho yusá naxaa ña ná jánañu a tóco ndihi mé yusa cán —nacachi Jesús.

*Sácú Jesús quiahva cuití va nuú ñayivi  
(Mr. 4:33-34)*

<sup>34</sup> Xihin ndinuhu quiahva cuití najánañaha Jesús tóco ndihi ña yóho nuú ñayivi.



35 Já naçaja Jesús ña ná xinu çoo nuú ña naçachi in da profeta sanahá tá naçachi da já:  
 Xihín ndinuhu quiahva cuití va çahan i xihín ñayivi,  
 ta çahan i sahá ñaha nasahiin jehé nu ná janda mé saha tá camaní çava sahá sahá ñuyíví —cáchi tuhun Ndióxi.

*Ndicani Jesús ña cuni cachi quiahva nasacu a sahá yucu quini nanana tañu trigo cán*

36 Tá nandihí nandindayí Jesús ñayivi cuaha ndúu cán já naquihvi a ini vehe. Anda já naçativi na xíca tuun xihín a cán nu á já naçachi na já xihin á:

—Ná ndicani ndó nuú nde ndía cuni cachi quiahva nasacu ndó sahá yucu quini nanana tañu trigo cán —naçachi na.

37 Anda já naçachi Jesús já xihin ná:

—Da xútu tata vaha cúu yehe, da naçindahá Ndióxi nduu ñayivi.

38 Ta ñúhu nu xútu u tata cúu á ñayivi ñuyíví. Ta tata vaha cán cúu á yuhú nuú na cómí Ndióxi cuéntá saha. Ta yucu quini cán cúu á yuhú nuú ñayivi quini, na cúu cuéntá rí quini.

39 Ta da ço cuni táhan xihín i nasahan da naçutu da yucu quini nu ñúhu cán ta cúu dá yuhú nuú tiñahá sacuaha. Ta tiempo jáquee na cán cúu á tá ná xinu çoo quiví caja ví Ndióxi sahá ñayivi ndúu ñuyíví. Ta na xíca jáquee cán cúu ná tátō Ndióxi.

40 Ta tá quiahva naçaja na cán xihín yucu quini tá najátaca na ña ta naçicaan ñúhu na ña quiahva já vaha ri xihín ñayivi ñuyíví yóho tá ná tandaa quiví ndihi sahá ñuyíví.

41 Ta yehe, da nachindahá Ndióxi nduu ñayivi chindahá i tátó mí i ña ná cahnda java táhan na na cómí i cuéntá saha xihín na cō cúú cuéntá mí i. Jáchí na cán jácahan na inga na caja na cuachi xihín java ga na cája ña núu.

42 Ta jáqueta nuu i na ini indayá ta cán cuacu na anda quiahva chicáhñá nuhu na jáchí ndóho ndivaha ini na.

43 Ta anda já na cája ña cúni Ndióxi ndiyihvi ndaa na tá quiahva yéhe candii nuú cacomí Ndióxi cuéntá saha ná, mé á cúú á tátá na. Ndá na ín johó, ná cuni johó na.

*Sácú Jesús quiahva sahá sató jiuhún ndácaan jehé*

44 Tá ná cacomí Ndióxi cuéntá sahá ñayivi cacuu a tátuhun ña yáha xihín in dataa tá ndíñehe dá in sató jiuhún ña ndácaan jehé in ñundáhyi. Ta tá nandihí já chíjahvi tucu da ña xihín ñúhu. Ta já cávatá ndivaha da cuhun da jicó da tóco ndihí ña cómí da ña ná cueen da ñundáhyi nuú nanduxu mé sató jiuhún cán.

*Sácú Jesús quiahva sahá in jíqui sándacu na ña yahvi ndivaha*

45 Tá ná cacomí Ndióxi cuéntá sahá ñayivi cacuu a tátuhun tá xíca nuu in da cája ndahvi ndúcú da jíqui sándacu na ña yahvi ndivaha.

46 Ta tá ndítahan da in jíqui yahvi ndivaha já cuahan da jicó da ndihí ñaha cómí da ña ná cueen da jíqui yahvi ndivaha cán.

*Sácú Jesús quiahva sahá in ñúnu tává tiyacá*

47 "Ta tá ná cacomí Ndióxi cuéntá sahá ñayivi cacuu a tátuhun in ñúnu jácana na nuú tañuhú ta já tীন na tá nuú tiyacá.

48 Ta tá sa ñachutú ñúnu cán já tává na tiyacá cán yuhú tañuhú ta cán sác̄o na ndacahnda java na ri. Ta rí vaha cán táán vaha na ini toyicá na joo rí núu cán xíta ri cája na.

49 Quiahva já yaha ri xihín ñayivi tá ná ndihi sahá ñuyíví. Jáchi queta tát̄o Ndióxi ndacahnda java na vaha tañu na quini.

50 Ta ñayivi quini cán chicaoan na ini indayá ta cán cuacu na janda quiahva chicáñá nuhu na jáchi ndóho ndivaha ini na —cáchi Jesús.

### *Tá jánaḥa Jesús sahá ña saá xihín ña yatá*

51 Tá nandihí já nandaca tuhún Jesús na já ñacachi a já:

—Á cándaḥa ini ndó tóco ndihí ña cáhan i yóho — cáchi a.

—Ajan, cándaḥa ini nde ña —ñacachi na cán xihín á.

52 Anda já ñacachi Jesús já xihín ná:

—Tá jácuaha in da jánaḥa ley Moisés sahá ndaja ndiquiahva da mé dá ndáḥa Ndióxi cacomí a cuéntá saḥa dá já cúú dá tátuhun in dataa, da ín ñaha ini vehe. Ta xini vaha da tavá da ñaha da á cúú á ña saá á ña yatá —cáchi a.

### *Tá cuahān Jesús ñuu Nazaret*

*(Mr. 6:1-6; Lc. 4:16-30)*

53 Tá nandihí najánaḥa Jesús xihín quiahva yóho já ñaquee a cuanúhu a.

54 Tá naxinu a ñuu mé á já nacasáhá jánaḥa ini veñuhu cán. Ta jandá johó cátóntó ñayivi ñuu cán já cáchí na já:

—Ta ndájá nacatiḥva nahá ri da yóho ña xíni da. Ta ndaja cája da ñaha xitúhún yóho.

55 Á a juú da yóho cúu jahyi da cája chúun xihín yíto. Á a juú náná da yóho cúu María. Ta ñani da cúu Jacobo xihín José xihín Simón xihín Judas viti.

56 Ta sa mé ñuu yóho ndúu ri quiaḥva da jan. Ndájá nacatiḥva nahá da ña jánaḥa da nu yo, dá já —nacachi xihín táhan na cán.

57 Ta chí coó naxeen na candúsa ñahá na. Saḥá ña cán quea nacachi a já xihín ná:

—Vatí tóco ndihi ñayivi cája cáhnu na in profeta joo na vehe da xihín na ñuu da coó cándúsa na da —cáchí Jesús.

58 Ta coó nacaja cuahá Jesús ña xitúhún ñuu cán jáchi coó nacandúsa toho ñayivi cán mé á.

## 14

*Tá naxihi Juan, da nacaja ndúta ñayivi  
(Mr. 6:14-29; Lc. 9:7-9)*

1 Mé tiempo cán naxini johó Herodes, da cúu gobernador cán ña ndítúhún na saḥá Jesús.

2 Anda já nacachi da já xihín mozo da:

—Á a juú Jesús cúu á Juan, da najácandúta ñayivi ta viti nanditacu tucu da. Saḥá ña cán quea ín ndée da cája da tóco ndihi ña cája da yóho —cáchí Herodes.

3 Jáchi janda mé saḥa natiin Herodes Juan nacató ñahá da ta nachicaan da da vecaa. Ta

naçaja da ña yóho sahá Herodías, ñá naçacuu ñájíhí Felipe, ñani da.

<sup>4</sup> Jáchi mé Juan najánani ñahá da sahá ña ín Herodes xihín ña ta já naçachi da:

—Co ndítahan coún xihín ñájíhí ñanún —naçachi Juan xihín dá.

<sup>5</sup> Ta janda já nanducú Herodes cahní da Juan joo a cúu caja da ña jáchi yíhví da ñayivi sahá ña cándusa na ña cúu Juan in profeta naçindahá Ndióxi.

<sup>6</sup> Joo in tañu nani ndácaan Juan vecaa já naçavaħa Herodes víco sahá quiví naçacu da. Ta nandaca ndíchí ña cúu jahyi Herodías cán naçita sahá ña nu ndíhi na ndúu víco cán. Ta a juú quiahva naçajii ini Herodes xihín ña yóho.

<sup>7</sup> Sahá ña cán quéa quiví Ndióxi táva da tá sahan da tuhun da nu ñá cán ña quiahva da nu ña ndá ña cúni mé ña caça ña nu dá.

<sup>8</sup> Tá nandihí nandaca tuhún jihna ñá náná ña já ndáva ña naçahan ña nu Herodes já cáhí ña já xihín dá:

—Viti ñúhú cúni ña ná quiahva ndó yiquí jíní Juan, da jácandúta ñayivi nuú i ini in coho cáhnu —naçachi ñá xihín dá.

<sup>9</sup> Tá naçachi ñá já xihín Herodes já naçacuéħa ndivaħa ini da. Joo sahá ña sa naçavá da quiví Ndióxi tá naçahan da tuhun dá nu ñá cán ta sahá ña cúni da candoo vaħa da nuú na ndúu víco xihín da cán sahá ña cán quéa naçahnda da chuun ña ná quiahva na ña nu ñá.

<sup>10</sup> Chí naçahnda da chuun ña ná chitúhun ná yiquí jíní Juan ini vecaa cán.

11 Ta já nāchicaan nā yiquí jíní dā ini in cohō cáhnu já nāsahan nā ñā nū ñá cán. Anda já nandiquiahva ñá cán ñā ndáha náná ñā.

12 Anda jáví naxinu nā naxica xihin Juan cán já nāsahan nā nandiquehe na yiquí cuñu da ta najánduxu nā dā. Ta já nāsahan nā nācaxi tuhun na ñā yóho nuú Jesús.

*Tá nāsahan Jesús ñā cuxu uhun mil taa*  
(Mr. 6:30-44; Lc. 9:10-17; Jn. 6:1-14)

13 Tá naxini johō Jesús saha Juan já nāquee xóo a ini in barco loho cuahan nuú cō ndúu ñayivi. Joo tá naxini johō ñayivi ñā cuahan Jesús já nāquee na ñuu na ndícō nā cuahan sáhá nā nū ín a.

14 Ta tá nanuu Jesús barco cán já naxini a cuahá ndivaha ñayivi ta natahvi ini a saha ná. Ta chí nandaja vaha mé á nā quíhvi nāquixi tañu nā cán.

15 Ta tá sã cáhini cuahan já nācayati nā xíca tuun xihín a cán nū á. Já cáhí nā já xihín á:

—Sa nahini va ta a juú xoo nū ndúu ñayivi quéa yóho. Ndindayí ndó ñayivi ná cuhun nā ñuu válí yati jan já ná cueen na ñā cuxu na —nācachi nā cán xihín á.

16 Anda já nācachi a já xihín ná:

—Cō xíní ñúhú toho quee na cuhun nā. Mé ndó quiahva ndó ná cuxu na —nācachi Jesús.

17 Anda já nācachi tucu nā cán já xihín á:

—Cō mé ñaha va cuxu na yóho. Uhun víxí pan xihín ivi laá tiyacá cuití va ín yóho —nācachi na xihín Jesús.

18 —Taxi ndó a chóho —nācachi Jesús xihín ná.

19 Anda já nāsahnda Jesús chuun ñā ná ndaca nduu ndihi nā cán nuú yucu. Anda já natiin a

ndíhuhun pan xihín ndíví tīyacá cán já nasandehé a chí indiví já nandiquiahva ndixahvi nu Ndióxi. Tá nandihí já nasahnda java pan ta nasahan ña nuú na xíca tuun xihín á cán ta na cán nandicahnda na ña nuú ñayivi cuaha cán.

<sup>20</sup> Ta tóco ndihí na naxixi na janda quiahva nachutú na. Ta tá nandihí naxixí na já najátaca na ña nacandoo cán ta najáchutú na uxu ivi toyicá xihín ña nacandoo cán.

<sup>21</sup> Ta tóco ndihí na naxixi cán nasacuu na tátuhun uhun mil ta. Co cáhan sahá najihí xihín na valí.

*Tá naxica sahá Jesús nuú tañuhú  
(Mr. 6:45-52; Jn. 6:16-21)*

<sup>22</sup> Ta tá nandihí já nacaja Jesús ña ná ndihvi na xíca tuun xihín á cán iní in barco ña ná cuhun cuéé na inga xoo tañuhú cán nani candoo too mé á jándindayí a ñayivi cuaha cán.

<sup>23</sup> Ta tá sa najánduta tóco ndihí ñayivi já nandaa mé á yucu cuahan caça tahví a nu Ndióxi. Tá nandihí já nacuaá ta in túhún mé á ndácaan xíca tahví a nu Ndióxi cán.

<sup>24</sup> Ta ndaja coo barco loho, dó cândojó na xíca tuun xihín á cán sa naxinu coo dó janda mahnú tañuhú cuahan do. Ta ndícojo ndivaha tañuhú jáchi xoo cuahan na vaxi tachí.

<sup>25</sup> Joo tátuhun sa cuahan tívi já xíca sahá Jesús cuahan nuú tañuhú naxinu a nu ná.

<sup>26</sup> Ta tá naxini na xíca sahá Jesús vaxi a nuú tañuhú cán já nacatontó na. Ta nacasahá na cáyuhú cóhó na sahá ña yíhvi na já cáchí na já:

—Ínima quéa vaxi yóho —cáchí na.

27 Joo ivi laá nandicahan Jesús xihin ná já cáhí a já:

—Ndacú coo ini ndó jáchi yehe va cúú u. A yíhvi toho ndó —nacachi a xihin ná.

28 Anda já nacachi Pedro já xihin Jesús:

—Xitoho i, tá ta jivi cúú mé ndó cahnda ndó chuun ña ná cuu saa i nu ndo ta ná caca i nuú tañuhú —nacachi da xihin Jesús.

29 Ta já cáhí Jesús já:

—Naha quíi —cáhí a xihin dá.

Anda já nanuu Pedro barco cán ta nacasáhá xíca sáhá da nuú tañuhú cuahan da nuú Jesús.

30 Joo tá naxini da tachi ndeé xíco nuú tañuhú cán já nayihví da. Chí ivi laá nacasáhá quéta nuu da cuahan da ini tañuhú. Já nacayuhú cóhó da já cáhí da já xihin Jesús:

—Chindeé ndó yehe, xitoho i —nacachi da xihin á.

31 Ta cama chá natiin Jesús ndáha da ta já nacachi a já xihin dá:

—Ndá cuénta quéa co cándéé chága inún yehe ta nacasáhá cáhvi ivi joho inún —nacachi Jesús xihin dá.

32 Ta tá nandaa ndívi na jata barco já ncatáji tachi cán.

33 Anda já nacaja cáhnu na ñúhu ini barco cán Jesús já cáhí na já xihin á:

—Mé a ndaa táhyí cúú jivi ndusa ndó in túhún jini já jahyi Ndióxi —nacachi na xihin á.

*Tá nandaja vaha Jesús na quíhvi ndúu ñundáhyi  
Genesaret  
(Mr. 6:53-56)*



34 Ta já naxica loho ga na nuú tañuhú cán já naxinu coo na ñundáhyi Genesaret.

35 Ta tá nandicuni ñayivi ndúu cán mé á já nachindahá na chuun nasahan nuú ndaja táhan ñayivi ndúu ndijáá ñundáhyi cán. Já ñéhe ndihi na na quíhvi nacasaá na nu á.

36 Ta na quíhvi cán naxica tahvi na nu á ña ná quiahva ñamaní cani ndaa ndáha ná yuhú jahmá níhnu a ta tóco ndihi na nacani ndaa ndáha jahmá a nandivaha na.

## 15

*Ña cája quini ínima ñayivi*  
(Mr: 7:1-23)

1 Ndaja coo java na fariseo xihín java na jánaha ley Moisés ndúu ñuu Jerusalén cán nacayati na nuú Jesús já nacasáhá cáchí na já xihín á:

2 —Ndávaha co cája na xica tuun xuhun ña nacachi tásáhnu jícó yo caja na. Ndávaha xíxi na tá cámaní ndahá na tá quiahva sáhdá ley caja na —nacachi na cán xihín Jesús.

3 Anda já nanducú ñehe Jesús tuhun nu ná já nacachi a já:

—Ta jári ndóhó va, ndá cuéntá quéa jándacoo ndó ña sáhdá Ndióxi nu ndó caja ndó. Ta ña cája ndó quéa ndíco ndó costumbre mé va ndó.

4 Jáchi sáhdá Ndióxi chuun já cáchí a já: “Caja cáhnún tátún xihín nánún.” Ta jári cáchí a: “Ndá na ná chícān cháhan jata tátá na á náná na, ndítahan quivi na”, cáchí a.

5 Joo ndóhó, jánaha ndó nuú ñayivi ña cuu cahan na já xihín tátá na á náná na: “A cuú chindeé e

ndohó jáchi sa nasacu xoo i ñaha i quiahva i ña nu Ndióxi”, cáchi na.

<sup>6</sup> Tá ná cachi na ña yóho já quéa co ndúsa ga chindeé na tátá náná na. Quiahva johó cája ndó ta sácu xóo ndó ña nasahnda Ndióxi chuun nu ndo ta ndája ndó a tátuhun in ñaha ña coó saha. Jáchi ndíco cáhnu ndó ña najándacoo tásáhnu jícó ndo nu ndo.

<sup>7</sup> Co cúu ndó tá quiahva ndáa ndó. Mé a ndaa nacañan profeta Isaías saha ndo sanahá tá nacañi da ña nacachi Ndióxi:

<sup>8</sup> Yuhú ñinu uun na cája cáhnu na yehe.

Ta co cája cáhnu na yehe xihín ndinuhu ínima na.

<sup>9</sup> Ta mé a uun quéa cája cáhnu na yehe, jáchi ña jáñaha na nuú ñayivi cuití va cúu á ña quíxi jini mé va na, nacachi profeta Isaías sanahá ndivaha —nacachi Jesús xihín na cán.

<sup>10</sup> Tá nandihi já nacana Jesús tóco ndihi ñayivi ndúu cán já nacachi a já xihín ná:

—Cuni johó vaha ndó ña cáhan i xihín ndó ta ná candaá ini ndó ña.

<sup>11</sup> A juú ñaha xíxi ñayivi ndája quini ínima ná. Tuhun quini quéta yúhu ná ña ñan quéa cája quini ñahá —nacachi Jesús.

<sup>12</sup> Tá nandihi já nacayati na xíca tuun xihín Jesús cán nu á já nacachi na já xihín á:

—Chí a váha mé nacuu ini na fariseo tá naxini johó na ña nacachi ndó ñan —nacachi na cán.

<sup>13</sup> Anda já nacachi Jesús já xihín ná:

—Ñayivi, na co ndíquehe vaha tuhun Ndióxi cúu ná tátuhun in yíto, dó coó najándeé Ndióxi, tátá i ña in indiví. Saha ña co cúu dó cuéntá mé á já tandaa quivi ña tuhun mé á do anda yóho do.

14 Sahá ña cán quéa cō ndítahan ndicani ini ndó sahá na ñan jáchi na cuaá va cúu ná. Ta a cúu toho caja in ña cuaá candaca da inga ña cuaá cūhun ña jáchi ndívi já ña ndacava da yávi —ñacachi Jesús.

15 Tá ñandihí já ñacachi Pedro já xihín Jesús:

—Ndicani loho ndó nuú nde ndaja cáa ña cáchí ndo ña cō cāja quini toho ña xíxi ñayivi mé ná jáchi cō cándañ ini nde ña —ñacachi Pedro xihín Jesús.

16 Já ñacachi Jesús já xihín ná:

—Á coo toho xíní túni ri ndóhó va, vaña.

17 Jáchi cō cándañ ini ndó ña tóco ndihí ñaha xíxi ñayivi a cuú caja quini a ña. Jáchi ña xíxi ñayivi cō xínu a ini ínima ná joo xínu cōo ña tixi va na já queta tucu a yiquí cuñu na.

18 Ña cuu ndaja quini ñayivi cúu ña quíxi ínima ná tátuhun tuhun cáhan ña xihín ña cāja na.

19 Jáchi chí ínima ñayivi quíxi ña cáhvi núu ini na tátuhun ña cáhvi ini na cahní ña ndíi. Ta sa mé cán quíxi ña cáhvi ini in ñataa coo ña xihín ñájíhí ñani táhan da á xihín in ña cō cúu ñájíhí ña. Ta sa mé cán quíxi ña ndiáva íní ña cāja cuíhná ña. Ta sa mé cán quíxi ña cávaha jíquí ña tuhun sahá ñani táhan da ta jári quíxi ña cánahá ña xihín Ndióxi.

20 Tóco ndihí ña cáhvi núu ini ñayivi cāja na, ña yóho quéa ndája quini a ña. Joo cō cáquini toho ñayivi sahá ña cō ndáhá ña tá cámaní cuxu na tá quiahva ín costumbre na —ñacachi Jesús xihín ña xíca tuun xihín á cán.

*Tá ñacandee ini in ña tóho Jesús*

*(Mr. 7:24-30)*

21 Tá ñandihí já ñacachi Jesús cuahan chí ñundáhyi cuéntá Tiro xihín cuéntá Sidón cán.

22 Ta nu xíca cuahān cān naqueta in ñáñáha ñundáhyi Canaán nu á já cáyuhú ña já cáchí ña já xihín á:

—Xitoho i, da naquixi chichi David caja ndó ñamani candáhví loho ini ndó yehe. Chindeé ndó jahyi jhí i jáchi rí quini ndácaan ini ñá —ñacachi ñáñáha cān xihín Jesús.

23 Joo ni in túhún tuhun coó nanducú ñehe Jesús nu ña. Anda já ñacativi na xíca tuun xihín a cān nu á já ñacachi na já xihín á:

—Taxi ndó ñá jan ná quee ña cūhun ña jáchi cáyuhú ña ndácaa ñá jata yó vaxi ñá —ñacachi na cān xihín Jesús.

24 Anda já ñacachi Jesús xihín ñáñáha cān já:

—Nachindahá Ndióxi yehe vaxi i nuú ñayivi Israel cuití va, mé na cúú tátuhun ndicachi, rí nandiñúhú —ñacachi Jesús.

25 Anda já ndáva ñá cān naxinu coo ñá ñacaxítí ña nu Jesús já cáchí ña já xihín á:

—Caja ndó ñamaní chindeé loho ndó yehe, xitoho i.

26 Anda já ñacachi Jesús já xihín ñá:

—A váha toho candaa i pan ndahá na valí ta já cana i ña nuú tina —ñacachi Jesús xihín ñá cān.

27 Anda já ñacachi ñá cān já xihín Jesús:

—Mé a ndaa cáhan ndo joo anda tina, rí ndúu tixi mesa xíxi rí ña jácūyu jahyi xitoho rí —ñacachi ñá cān xihín Jesús.

28 Anda já ñacachi Jesús já xihín ñá:

—Mé a ndaa cāndeé cáhnu inún Ndióxi. Ná coo a tá quiāhva cūni mún —ñacachi Jesús xihín ñá.

Chí mé hora já nandivaha jahyi jhí ña.

*Ndája vaha Jesús cuahá na quíhvi*

<sup>29</sup> Tá nandihí já naquee Jesús cuahan já naxinu coo a yati yuhú tañuhú Galilea. Já nandaa in jini yúcu ta cán nasacoo a.

<sup>30</sup> Ta já nacasáhá nataka cuahá ndivaha ñayivi já ñéhe na na quíhvi saha xihín na cuaá xihín na níhi xihín na rénco ndáha. Ta cuahá ga nuú na quíhvi ñéhe na nacasaa na nachinduu na na nu Jesús. Ta nandaja vaha mé á na.

<sup>31</sup> Ta xihín ña yóho a juú quiahva nacetóntó na tá naxini na ña nacasáhá ndícahan na níhi. Ta nacetóntó na tá naxini na ña nandivaha ndahá na rénco ta ndícaca vaha na quíhvi saha ta quiahva já nandivaha ri na cuaá. Ta nacasáhá na cája cáhu na Ndióxi, mé a cómi cuénta sahá na Israel.

*Tá nasahan Jesús ña cuxu comi mil nataa  
(Mr. 8:1-10)*

<sup>32</sup> Anda já nacana Jesús na xica tuun xihin á já nacachi a já xihin ná:

—Táhnda ndivaha ini i sahá ñayivi yóho jáchi sa naxinu uni quivi ndúu na xihín i ta chí coó ga ña cuxu na. Ta co cuni chindahá i na nuhu na vehe na jáchi cámani cuxu na ta tiahva náá cuitá na ta cuyu na íchi —nacachi Jesús.

<sup>33</sup> Anda já nacachi na xica tuun xihín a cán já:

—Coó toho ñuu yati va ta ni mí, a cuú quiahva í ña cuxu na jáchi coó toho ñayivi ndúu yóho nuú cueén ña cuxu na —nacachi na cán xihín Jesús.

<sup>34</sup> Já nacachi Jesús já:

—Ndaja pan cómi ndo.

Já nacachi na cán já:

—Usa pan xihín java tiyaca válí.

<sup>35</sup> Anda já nasahnda Jesús chuun ña ná cacoo ndihi ñayivi nu ñúhu cán.

<sup>36</sup> Ta já natiin a ndíhusa pan cán xihín java tiyacá válí cán já nandiquiahva ndixahvi nu Ndióxi. Ta já nasahnda java ña ta nasahan ña nuú na xíca tuun xihín á cán ña ná ndicahnda na ña nuú ñayivi cuaha cán.

<sup>37</sup> Ta naxixi tóco ndihi na janda quiahva nachutú tixi na. Ta tá najánditaca na ña nacandoo cán já nachutú usa toyicá xihín ña.

<sup>38</sup> Ta na naxixi cán cúu ná comi mil ta ta co cahan sahá najihí xihín na valí.

<sup>39</sup> Ta tá nandihí nandindayí Jesús ñayivi já nandihvi a ini barco já naxinu coo a ñundáhyi cuénta Magdala.

## 16

*Cúni na fariseo xihín na saduceo cuni na in ña xituhún caja Jesús*

*(Mr. 8:11-13; Lc. 12:54-56)*

<sup>1</sup> Ta ndaja coo naxinu coo na fariseo xihín na saduceo nu Jesús. Ta sahá ña cúni na coto ndojó cuití ñahá na sahá ña cán quéa naxica na nu á ña ná caja in ña xituhún cuénta indiví já ná candaa ini na á mé a ndaa cúu á ña nachindahá Ndióxi.

<sup>2</sup> Anda já nanducú ñehe Jesús tuhun nu ná já nacachi a já xihín ná:

—Tá nahini já cáchí ndo já: “Tiempo vaha ndivaha cacuu a jáchi ndiyéhe cuhá indiví”, cáchí ndo.

<sup>3</sup> Ta naha cáchí ndo já: “Viti ndusa quéa cuun ndeé ndivaha javi jáchi ín víco ndivaha ta ín víco cuhá indiví”, cáchí ndo. Co cúu ndó tá quiahva

ndáa ndó. Ndá cuéntá quéa tiahvá ndó ndicuni ndó ndá quéa coo tá sándehe ndó indiví joo coo tiahvá ndó ndicuni ndó ndá tiempo cúu á viti.

<sup>4</sup> Ñayivi quini, na coo cúni candúsa Ndióxi, na cán cúu na xíca ña ná caja i ña xitúhún nu ná. Joo ni in túhún toho ñaha xitúhún a cája ga i nu ná. In túhún ña candehé na cacuu a ña tandaa quivi ndoho i tá quiahva nandoho profeta Jonás sanahá ndivaha — nacachi Jesús xihin ná.

Já naquee a cuahan.

*Tá sácú Jesús quiahva sahá na fariseo  
(Mr. 8:14-21)*

<sup>5</sup> Ta ndaja coo naxinu coo a inga xoo tañuhú xihin na xíca tuun xihin á cán ta nandindójó na cán cañehe na pan cuxu na.

<sup>6</sup> Tá nandihi já nacachi Jesús já xihin ná:

—Candehé ndo. Cuéntá coo ndó xihin na fariseo ta xihin na saduceo jan jáchi ña jánaha na cúu á tátuhun yúsa naxaa ña cává táhan na xihin harina cávaha na pan —nacachi Jesús.

<sup>7</sup> Joo na xíca tuun xihin á cán ndítuhún xihin táhan na ña nacachi Jesús já sahá ña coo pan ñéhe na cuahan xihin ná.

<sup>8</sup> Ta tá nacandaa ini Jesús ña cáhan na já nacachi a já xihin ná:

—Ndá cuéntá quéa coo cándéé cáhnu ini ndó yehe ta cáhan ndo ña cáchi i ña yóho xihin ndo sahá ña coo ñéhe ndó pan vaxi ndó.

<sup>9</sup> A ñaha cándaq ini ndó. Ndítahan ndicuhun ini ndó ña nandaja cuahá i uhun víxi pan tá naxixi uhun mil taa. Ta sa xini ndó ndaja toyicá najáchutú ndo xihin ña nacandoo cán.

10 Ta ndítahan ndicuhun ini ndó ña ñacaja i xihín usa pan tá nandicahnda i ña ñaxixi comi mil ta ta sa xini ndó ndaja toyicá najáchutú ndo xihín ña ñacandoo cán.

11 Ndá cuéntá quéa co cándaá toho ini ndó ña coo ñacachi i ña yóho xihín ndó sahá ña coo pan ñéhe ndó vaxi ndó. Joo ñacachi i ña cuéntá coo ndó xihín ña fariseo ta xihín ña saduceo jáchi ña jánaña ña cúú á tátuhun yusá ñaxaa ña cáva táhan na xihín harina cávaña na pan –ñacachi Jesús.

12 Tá ñacachi Jesús ña yóho já ñacandaá ini ña xica tuun xihín á cán ña a juú toho sahá yusá ñaxaa cáhan Jesús saha. Ña cúni Jesús cachi a xihín ná quéa cuéntá vaha ná coo na xihín ña jánaña ña fariseo xihín ña saduceo.

*Tá cáxi tuhun ndaa Pedro ña cúú Jesús mé á ñachindahá Ndióxi cacomí a cuéntá sahá ñayivi (Mr. 8:27-30; Lc. 9:18-21)*

13 Tá ñaxinu coo Jesús ñundáhyi Cesarea cuéntá Filipo já ñandaça tuhún a ña xica tuun xihín á cán já ñacachi a já xihín ná:

—Ndá ña cáchi ñayivi cúú yehe, ña ñachindahá Ndióxi nduu ñayivi –ñacachi Jesús.

14 Já ñacachi ña cán já:

—Java na cáchi ña ña cúú ndó Juan, ña ñacaja ndúta ñayivi. Ta java na cáchi ña ña cúú ndó profeta Elías. Ta java na cáchi ña ña cúú ndó profeta Jeremías. Ta java na cáchi ña ña cúú ndó in táhan profeta ñasanduu sanahá –ñacachi na.

15 Anda já ñacachi Jesús já xihín ná:

—Ta ndóhó ri, ndá ña cáchi ndó cúú u –ñacachi a.



16 Anda já nanducú ñehe Simón Pedro tuhun nu Jesús já nacachi da já xihin á:

—Mé ndó cúu Cristo, ña nachindahá Ndióxi cacomí cuéntá sahá ñayivi. Ta cúu ndó in túhún jini já jahyi Ndióxi, mé a tácu íin indiví —nacachi da.

17 Anda já nanducú ñehe Jesús tuhun nu dá já nacachi a já xihin dá:

—Tahví nahá cúún, Simón, jahyi Jonás jáchi ni in túhún ñayivi coó nacaxi tuhun ña yóho xuhun. In túhún tátá i, mé a íin indiví nanaha ña yóho nuun.

18 Ta quiahva joho cáchi ri yehe saha yóhó: Yohó cúún Pedro ta quivun cúni cachi a tóto. Ta cúún tátuhun yuu ndúhu sahá in vehe nuú cavaha i veñuhu mí i jáchi yóhó caca nuún cahun sahá i nuú ñayivi já ná quee vaha na xihin tiñahá sacuahá já ná a cahun na indayá.

19 Ta caja i xuhun ña ná cuu ndicanún nuú ñayivi ndaja ndiquiahva na mé ná ndaha i cacomí i cuéntá saha ná. Cacu a tátuhun quiahva i yávi nuun ña ná cunún íchi nuú ndihvi ñayivi cacomí i cuéntá saha ná. Tá co sahun ñamani ná ndihvi ñayivi cán já quea a quiahva toho i ñamani nu ná. Joo tá sahun ñamani nu ná ndihvi na cán já quea quiahva ri yehe ñamani nu ná —cáchi a xihin Pedro.

20 Anda já nasahnda Jesús chuun nuú na xica tuun xihin á cán ña ná a cáxi tuhun na xihin ni in túhún ñayivi ña cúu mé á Cristo, mé á nachindahá Ndióxi cacomí cuéntá sahá ñayivi.

*Tá cáxi tuhun Jesús ña quivi a  
(Mr. 8:31-9:1; Lc. 9:22-27)*

21 Ta janda mé quivi já nacasahá Jesús cáxi tuhun a xihin na xica tuun xihin á ña ndítahan

nu á cūhūn a ñuu Jerusalén. Ta mé cán ndoho ndivaha ini a ndahá na sacuaḥa veñuhu xihín ndahá na sacuaḥa nuú jutū xihín ndahá na jánaḥa ley Moisés. Ta caja xixi ri na cán va xihín á ta cahní ñahá na. Joo tá ná xinu unī quivi ndítacu tucu a.

<sup>22</sup> Anda já natavá xóo Pedro Jesús já naçasáhá da jánani ñahá da já nacachi da já xihín á:

—Ama ná yaha ña yóho xihín ndó, xitoho i. Ná a quiahva toho Ndióxi ñamani ndoho ndó já — nacachi Pedro xihín Jesús.

<sup>23</sup> Joo nacava nuu Jesús sándeḥé a nu Pedro ta já cáchí a já xihín dá:

—Cuáhán quee Satanás, rí cúú tiñáhá sacuaḥa. Tá quiahva ín na sáji nuu nu ná quiahva já íún nuú i. Jáchi co cáhvi ínún tá quiahva cáhvi ini Ndióxi joo cáhvi ínún tá quiahva cáhvi ini ñayivi cuéntá ñuyívi yóho — nacachi Jesús xihín dá.

<sup>24</sup> Anda já nacachi Jesús já xihín na xíca tuun xihín a cán:

—Ndá na cūni candico yeḥe ndítahan nu ná ndihi chága ini na sahá yeḥe a juú ga saḥa mé ná. Ta ndítahan coo tiaḥva na ndoho ini na sahá yeḥe. Ta coó caja toho a ná quivi na sahá i.

<sup>25</sup> Jáchi ndá na catóo coo chága ñuyívi yóho ndihi saḥa ná. Joo ndá na saḥan ndeé ini quivi sahá i xihín sahá tuhun Ndióxi, ñeḥe táhvi ná catacu na anda ama cáa quivi.

<sup>26</sup> Vatí ná quee vaha in na ñuyívi yóho ta cómi na tóco ndihi ñaha ñuyívi yóho joo ndá chuun quea tá nu ndíhí ndihi saḥa ná indayá. Jáchi ni in ñaha a cuú chahvi in na saḥa ínima ná ña ná a cūhūn na indayá.

<sup>27</sup> Jáchi yehe, da nachindahá Ndióxi nduu ñayivi quixi tucu u xihin ndée Ndióxi, tátá i ta xihin ndée tátó Ndióxi. Mé tiempo cán náha ndaja cánu cúu yehe. Anda já चाहvi i nuú in in ñayivi sahá ñaha nacaja na nani nasanduu na ñuyívi yóho.

<sup>28</sup> Mé a ndaa ná cahan i xihin ndo ña java na ndúu yóho a quívi toho na janda quiahva ná xinu quivi cuni na quixi tucu yehe, da nachindahá Ndióxi nduu ñayivi cacomí i cuéntá sahá na cúu cuéntá mí i —cáchi Jesús.

## 17

### *Tá nandijama nuu Jesús quiahva cáa*

*(Mr. 9:2-13; Lc. 9:28-36)*

<sup>1</sup> Tá nayaha iñu quivi já nandaa Jesús in yucú jícó ta ndáca táhan Pedro xihin Jacobo xihin ñani da Juan cuahan na xihin á.

<sup>2</sup> Ta nu táhyí mé na cán nandijama quiahva cáa. Ta a juú quiahva nandiyéhe nuu á tá quiahva ndiyéhe candii. Ta jáhma ndíxi a nandiyaa cachi ña ta chí a juú quiahva yéhe ña.

<sup>3</sup> Ta ndaja coo nandaca náha Moisés xihin Elías ta nacasáhá ndítúhún da xihin Jesús.

<sup>4</sup> Anda já nandicahan Pedro xihin Jesús já nacachi da já xihin á:

—Vaha cúu ndúu nde yóho, xitoho nde. Tá cúni ndó cavaha nde uni vehe tiyahvá válí. In a coo mé ndó ta inga coo Moisés ta inga coo Elías —cáchi Pedro.

<sup>5</sup> Ta nani cahan Pedro nanuu in vico jata ná ta nacava nuu a na. Ta a juú quiahva ndató yéhe a. Ta tañu vico cán naxini johó na ña cahan in a ta já cáchi a já:

—Da yóho cúu jahyi maní i ta cájii ini i xihín dá. Cuni johó ndó nu cáhan da —nacachi mé a cán.

<sup>6</sup> Tá naxini johó na xíca tuun xihín Jesús cán ña cáhan yóho já nacaxítí na janda quiahva naxinu nuu ná nu ñúhu. Ta a juú quiahva ná yihví na.

<sup>7</sup> Anda já nacayati Jesús nu ná ta nacani ndaa ndáha na já nacachi a já xihín ná:

—Cuándacoo ndó. A cáyihví toho ndó —nacachi Jesús xihín ná.

<sup>8</sup> Ta tá nandiñehe na cán nuu ná já naxini na ña ín in túhún jiní mé va Jesús.

<sup>9</sup> Ta tá nanuu na jiní yúcu cán já nasahnda Jesús chuun nu ná já nacachi a já xihín ná:

—A cáxi tuhun ndó ña naxini ndó yóho nuú ni in ñayivi janda quiahva ná nditacu tucu yehe, da nachindahá Ndióxi nduu ñayivi —nacachi Jesús.

<sup>10</sup> Já nacachi na cán já xihín á:

—Ndávaaha cáchí na jánaha ley Moisés ña ndítahan quixi jihna ñúhú profeta Elías —nacachi na.

<sup>11</sup> Já nacachi Jesús já xihín ná:

—Mé a ndaa jihna ñúhú quixi Elías ta ndaja vaaha ndihi da ñaha.

<sup>12</sup> Joo mé a ndaa ná cahan i xihín ndo ña sa naquixi va Elías joo coo naxeen na ndicuni na da. Ta nacaja na tá quiahva cúní mé ná xihín dá. Ta quiahva já jándoho ri na ini yehe, da nachindahá Ndióxi nduu ñayivi —nacachi Jesús.

<sup>13</sup> Anda jáví nacandaá ini na xíca tuun xihín Jesús cán ña cáhan Jesús saha Juan, da najácandúta ñayivi tá nacachi a ña sa naquixi va Elías.

*Tá nandaja vaha Jesús in da loho ndácaan ínima quini ini*

*(Mr. 9:14-29; Lc. 9:37-43)*

<sup>14</sup> Ta tá sa nanuu na ta naxinu coo na nu ndúu cuahá ñayivi cán já naxinu coo in dataa ta já nacaxítí da nu Jesús. Já nacachi da já xihin á:

<sup>15</sup> —Candáhví loho ini ndó jahyi i, xitoho i jáchi xíhi yíhi da ta ndóho ndivaha ini da. Ta cuahá tañu ndícava da nu ñúhu ita á ini ticuí.

<sup>16</sup> Ta ñehe e da nacasaá i nuú na xíca tuun xihin ndó yóho joo coo nacuu ndaja vaha na da — nacachi da xihin Jesús.

<sup>17</sup> Anda já nacachi Jesús já:

—Ndáhví nahá nacuu ndó jáchi sa cuahá ndivaha quivi ín i xihin ndo ta a ñaha candeé ini ndó yehe. Cúu ndó ñayivi quini ndivaha chí co ndeé ga ini i xihin ña cája ndó. Taxi ndó taa loho jan chóho —nacachi Jesús.

<sup>18</sup> Anda já najánani Jesús rí quini ndácaan ini da loho cán. Chí naqueta rí cuahan ri ta mé hora já nandivaha da loho cán.

<sup>19</sup> Tá nandihi já nacahan jehé na xíca tuun xihin Jesús cán xihin á já nacachi na já:

—Ndáva ha coo nacuu caja nde tavá nde ínima quini nasandacaan ini da loho jan —nacachi na xihin Jesús.

<sup>20</sup> Já nacachi Jesús já xihin ná:

—Coó nacuu caja ndó jáchi co candeé cáhnu ini ndó yehe. Mé a ndaa cáhí i xihin ndó, loho tীন ndivaha cáa in ndíqui mostaza joo ndúu dó in yíto cáhnu. Tá candeé loho ini ndó yehe viti vaxi quivi candeé chága ini ndó yehe. Anda jáví cuu caja ndó in ñaha ihvi ndivaha tátuhun ña cuu cachi ndó

xihín in yúcu ña ná caxoo a ta chí caxoo ndusa ña. Tóco ndihi ñaha cuu caja ndó tá ná candeé ini ndó yehe.

<sup>21</sup> Joo tá cúni ndó tavá ndó ínima quini tátuhun rí yóho xíní ñúhú cajuhun ndó ta caça tahví ndó nu Ndióxi —cáchi Jesús xihín ná.

*Tá cáxi tūhun tucu Jesús ña quivi a  
(Mr. 9:30-32; Lc. 9:43-45)*

<sup>22</sup> Ta ndaja coo xíca tútú ndihi na xíca tuun xihín Jesús cán cuahan na xihín á chí estado Galilea. Ta já nandicani Jesús nuú na cán ña tandaa quivi ndiquiahva ñayivi mé á ndáha na cahní ñahá, mé a nachindahá Ndióxi nduu ñayivi.

<sup>23</sup> Ta nacachi a xihín ná ña tá sa ná yaha uní quivi já nditacu tucu a. Tá nacachi Jesús ña yóho xihín na xíca tuun xihín á cán já nacacuéha ndivaha ini na.

*Tá nachahvi Jesús jjuhún impuesto cuéntá veñuhu cáhnu ñuu Jerusalén*

<sup>24</sup> Tá naxinu coo Jesús ñuu Capernaum xihín na xíca tuun xihín á já naxinu coo na játaca jjuhún impuesto cuéntá veñuhu nu Pedro. Já nacachi na já xihín dá:

—Á co cháhvi toho Jesús, da jánaha ndohó jan jjuhún impuesto cuéntá veñuhu ñuu Jerusalén — nacachi na xihín Pedro.

<sup>25</sup> Anda já nacachi Pedro já:

—Cháhvi a ña —nacachi da.

Anda já nandihvi Pedro ini vehe nu ndácaan Jesús joo jihna ñúhú nandicahan Jesús xihín dá já nacachi a já:

—Ndíá cáhvi inún, Simón. Yo já ndítahan nuu cháhvi jiuhún cuéntá impuesto nuú nā sáhndá chuun ñuyíví yóho. Á nā ñuu mé ná á nā ñuu tóho —nācachi Jesús.

<sup>26</sup> Já nācachi Pedro já:

—Nā tóho va sá cháhvi jiuhún cája na —nācachi Pedro.

Já nācachi tucu Jesús já:

—Sahá ñā cán quéa mé nā ñuu cō cháhvi toho na.

<sup>27</sup> Joo mí cō cūni yō ñā ná ndicuita na xohō sahá ñā cán quéa cūhún tañuhú. Ta mé cán tavún tiyacá. Ta rí nu cuítí ná tavún jan candehún yúhu rí jáchi jan nditáhún in jiuhún caa. Ta cañehe a cūhun cháhvún saha mún ta saha mí i jáchi queta va —nācachi Jesús xihin Pedro.

## 18

*Ndícani Jesús ndá nā cúu nā ín chága saha  
(Mr. 9:33-37; Lc. 9:46-48)*

<sup>1</sup> Mé tañu já nācayati nā xíca tuun xihin Jesús nu á já nācasáhá ndáca tuhún ñahá nā já nācachi na já xihin á:

—Yo já cacuu da cáhnu chága tá ná tandaa quivi cacomí Ndióxi cuéntá sahá ñayivi —nācachi na xihin Jesús.

<sup>2</sup> Anda já nācana Jesús in da loho já nasacandichi a da mahñú java nā cán.

<sup>3</sup> Já nācachi a já:

—Mé a ndaa ná cahan i xihin ndo ñā ndítahan ndaja nuu ndó mé ndó ta nduu ndó tátuhun nā valí já cuu cacomí Ndióxi cuéntá saha ndo.

4 Na cúni cacuu na cáhnu chága tá cacomí Ndióxi cuéntá sahá ñayivi ndítahan nduu na tátuhun in na coó saha ta já nduu na tátuhun ta loho yóho.

5 Ta ndá na ná ndiquehe in aloho tátuhun da yóho sahá ña cúni na yehe, na cán cúu na ndiquehe ri na yehe viti.

*Tá jándacava ñayivi inga na nuú cuachi  
(Mr. 9:42-48; Lc. 17:1-2)*

6 Ta ndá na ná jándacava in na ndahví, na cándéé ini yehe nuú cuachi janda vaha chága ná candico in yuú yojó jico ná ta ná ndihi sahá na cahá tañuhú.

7 Ndahví nahá nacuu ñayivi ñuyívi yóho jáchi mé a ndaa in cuahá ndivaha ña nú ñuyívi yóho. Ña cán quéa ndácava cuahá ñayivi nuú cuachi joo ndahví nahá nacuu na jándacava inga na nuú cuachi.

8 Sahá ña cán quéa tá ndaha ndo á saha ndo jándacava ndohó nuú cuachi, chituhun ndó a ta jácana xíca ndó ña ná cuhun a. Jáchi vaha chága ná cuhun réncó ndó á lundu ndó indivi a juú ga ña ná cuhun ní yiqui cuñu ndó indayá nu cáyi ñuhu ita anda ama cáa quivi.

9 Ta tá nduchú núu ndo jándacava ndohó nuú cuachi, tavá ndó ña ta jácana xíca ndó ña ná cuhun a. Jáchi vaha chága ná cuhun ndó indivi xihín in túhún nduchú núu ndo a juú ga ña ná cuhun ndó xihín ndívi nduchú núu ndo indayá nu cáyi ñuhu ita.

*Tá sácú Jesús quiahva sahá in ndicachi, ri nandiñuhú  
(Lc. 15:3-7)*



10 'Coto a quéhe núu ndó ni in na cúu cuéntá mí i jáchi cáhí i xihín ndó ña tátò Ndióxi, mé na ndáá na cán ní tiempo ndíta na nu Ndióxi, tátá i indiví.

11 Jáchi yehe, da nachindahá Ndióxi nduu ñayivi naquixi i jácacu u ñayivi, na cája cuachi.

12 'Cuni johó ndó ná cahan i xihín ndo: Tá cómi in dataa in ciento ndicachi ta tá ndiñúhú in rí já quéa ña cája da quéa jándacoo da comi jíco sahun comi rí cán yucu ta já quee da cuhun da ndinducú da mé rí nandiñúhú cán.

13 Ta tá ndiñehe dá ri cajji chága ini da saha rí nandiñúhú cán a juú ga sahá comi jíco sahun comi rí sa ndúu nu dá cán.

14 Ta quiahva já ndoho ri Ndióxi, tátá i jáchi co cuni mé á ña ná ndihi sahá ni in na cándéé ini mé á.

*Ndítahan caja cáhnu iní sahá ñani táhan í  
(Lc. 17:3)*

15 'Tá cája quini ñani táhan ndó xihín ndo já quéa tavá xóo ndó da ta cahan ndó xihín dá ña ná ndicuni da ña a váha toho cája da. Ta tá ná tahvi ini da sahá cuachi cája da já quéa sa nandiquehe táhan maní tucu ndó xihín dá.

16 Joo tá co cuni da cuni johó da nu cahan ndo já quéa ndítahan nu ndó cana ndó in á ivi chága ñani táhan ndó já ná cacuu na testigo sahá ña cahan ndo.

17 Ta tá co cuni da cuni johó da nu cahan na cán xihín dá já quéa ndítahan cuhun ndó nu tóco ndihi na cúu cuéntá Jesús táca veñuhu. Ta tá co cuni da cuni johó da nu cahan ndihi na cán xihín dá já quéa ndítahan caja ndó xihín dá tá quiahva cája ndó xihín in da tóho, da co cándusa Ndióxi á in da játaca jiuhún cuéntá impuesto.

18 'Mé a ndaa ná cahan i xihin ndo ña tóco ndihi ñaha ná cató ndo ñuyíví yóho candico a janda indiví. Ta tóco ndihi ña ná ndaxí ndo ñuyíví yóho janda indiví ndaxi ña.

19 'Ta jári cahan i ña yóho xihin ndó. Tá jándique táhan tuhun ivi ndó ñuyíví yóho ta tá mé a ndaa in cúú ndó sahá ña xíca tahvi ndó nu Ndióxi, mé á ín indiví já quea quiahva tátá i ña nu ndo.

20 Jáchi nu ndúu ivi á uní na ta táca na cuéntá mí i já quea tañu na cán ndacaan i —nacachi Jesús.

*Tá sácú Jesús quiahva sahá in da co cuni caja cáhnu ini da sahá inga da*

21 Ta ndaja coo nacayati Pedro ndáca tuhún da Jesús já nacachi da já:

—Xitoho i, ndaja tañu xíní ñúhú caja cáhnu ini i sahá ñani táhan i tá cája núu da xihín i. Á ndítahan nuú i caja cáhnu ini i saha dá janda usa tañu —nacachi da xihín Jesús.

22 Já nacachi Jesús já xihin dá:

—A juú janda usa tañu cuití ndítahan caja cáhnu inún sahá ñani táhún. Vaha janda comi ciento comi jíco uxu tañu ndítahan nuun caja cáhnu inún sahá ñani táhún.

23 'Cáchi i ña yóho xihin ndó jáchi tá cómí Ndióxi cuéntá sahá ñayivi cúú á tátuhun ña nayaha xihín in rey tá nacasáha da játaca da cuéntá nuú na yíca nu dá.

24 Mé tañu já ñéhe na in da yíca cuahá millón nu dá nacasaá na.

25 Ta sahá ña coo nacuu chahvi da ña yíca da sahá ña cán quea nasahnda rey chuun ña ná jíco

na mé dá xih̄in ñájhí da xih̄in jah̄yi válí da ta janda ñaha da viti ña ná cuu ndiquehe rey cán cuénta da.

<sup>26</sup> Anda já nacaxítí da yícá cán nu mé rey já nacasáhá xíca tahví da já cáhí da já: “Caja ndó ñamani, xitoho i candati too chága ndó yehe, ndáhvi i, já chahvi ndihi i ña yícá i nu ndo”, nacachi da xíca tahví da nu rey cán.

<sup>27</sup> Anda já nacandáhvi ini rey cán da ta nacaja cáhnu ini a saha tóco ndihi ña yícá da já najaní a da cuahan da.

<sup>28</sup> Ta tá naqueta da yícá cán cuahan da já nandique táhan da xih̄in inga da cúu mozo. Ta mé mozo cán yícá da loho va nuú da cán. Ta já nacasáhá da ndaca yih̄í da cuénta nuú da cúu mozo jácuahnú ñahá da. Já cáhí da já: “Chahvún ña yícún nuú i”, cáhí da cán.

<sup>29</sup> Anda já nandacava xítí mé da cúu mozo cán nu dá já nacasáhá xíca tahví da nu dá já cáhí da já xih̄in dá: “Cajún ñamani candati too chágun yehe, ndáhvi i, já chahvi ndihi i ña yícá i nuun”, nacachi da cúu mozo cán.

<sup>30</sup> Joo cóo naxeen da ta ña nacaja da quéa nasahan da nachicaan da da cúu mozo cán vecaa janda quiahva ná cuu chahvi ndihi da ña yícá da nu dá.

<sup>31</sup> Ta tá naxini java ga na cúu mozo cán ña yóho já nandih̄ihvi ndivaha ini na ta chí ndáva na nasahan na nacaxi tuhun na nu mé rey cán ndaja cáa ña nacuu.

<sup>32</sup> Anda já xójo ndivaha ini mé rey cán chí nacana da da nasayícá cán já nacachi da já xih̄in dá: “Mozo quini ndivaha cúu yóho. Cuahá ndivaha jih̄ún nasayícún nuú i joo nacaja cáhnu

ini i saha tóco ndihi a jáchi naxica tahvún nuú i.

<sup>33</sup> Quiahva já ndítahan ri nu yóho va caja cáhnu inún sahá ña yíca ñani táhún nuun jáchi já nacaja i xuhun”, nacachi rey cán.

<sup>34</sup> Ta sahá ña xójo ndivaha ini mé rey cán xihin dá sahá ña cán quea nandiquiahva da da yíca cán ndáha na jácaxáhan ñahá cán janda quiahva ná chahvi da saha tóco ndihi ña yíca da —cáchi Jesús.

<sup>35</sup> Já nacachi tucu Jesús já:

—Quiahva já caja ri Ndióxi, tátá i, mé a ín indivi xihin ndóho va tá co caja cáhnu ini ndó sahá ñani táhan ndó xihin ndinuhu ini ndó —cáchi Jesús.

## 19

*Jánaḡa Jesús nuú na sa natandaha ña co ndítahan jándacoo táhan na*

*(Mr. 10:1-12; Lc. 16:18)*

<sup>1</sup> Tá nandihí nacachi Jesús ña yóho já naquee a estado Galilea já naxinu coo a estado Judea, ña ín inga xoo yuta Jordán cán.

<sup>2</sup> Ta a juú quiahva cuahá ñayivi nandico jatá ta nandaja vaha mé á na quíhvi.

<sup>3</sup> Joo ndaja coo java na fariseo nacayati na nu Jesús sahá ña coto ndojó ñahá na cuni na. Já nacachi na já xihin á:

—Á núna nuú in dataa jándacoo da ñájíhí da saha ndá ña nacuu —nacachi na fariseo cán.

<sup>4</sup> Anda já nacachi Jesús já:

—Á a ñaha cahvi ndó tuhun Ndióxi nu cáhí a ña janda mé saha tá nacavaha Ndióxi ñayivi nu cuítí já nacavaha dataa ta nacavaha ñáñáha.

<sup>5</sup> Ta ñacachi tucu a ña ndítahan nuú dataa jándacoo da tátá da xihín náná da já ndique táhan da xihín ñájíhí da. Já xinu ndíví na cán cacuu na tátuhun in víxí yiquí cuñu na.

<sup>6</sup> Sahá ña cán quéa co cúu ga na ivi yiquí cuñu sahá ña nanduu na tátuhun in túhún yiquí cuñu na. Sahá ña cán quéa co ndítahan nuú da cán janí táhan da ña najácatáhan Ndióxi tá ñatandaha ná — ñacachi Jesús.

<sup>7</sup> Anda já nandaca tuhún tucu na cán Jesús já ñacachi na já:

—Joo já cachi ndó xihín nde: ndá cuéntá quéa nasahnda ri Moisés chuun ña cuu cavaha in dataa in tutu quiahva da nu ñájíhí da ta xihín ña cán cuu jándacoo da ña — ñacachi na cán xihín Jesús.

<sup>8</sup> Já ñacachi Jesús já:

—Sahá ña táhyí ndivaha ínimá ndo sahá ña cán quéa sahan Moisés ñamaní nu ndó ña cuu cavaha ndó tutu quiahva ndó nu ñájíhí ndo ña ná jándacoo ndó ña. Joo tá ñacavaha Ndióxi ñayivi nu cuítí coó ñacacúni toho a coo ña yóho.

<sup>9</sup> Cuni johó ndó ná cahan i xihín ndo. Tá ná jándacoo in dataa ñájíhí da ta co cúu á sahá ña ñacaja ná cuachi xihín inga ta ta tá tandaha dá xihín inga ñá já quéa cája da cuachi nu Ndióxi. Ta quiahva já in ri cuachi da ná tandaha xihín ña ñacandoo cán — cáchí Jesús.

<sup>10</sup> Tá ñaxini johó na xíca tuun xihín Jesús cán ña yóho já ñacachi na já:

—Tá ta quiahva já cáa janda vaha chága ná a tandaha ñayivi, dá já — ñacachi na cán.

<sup>11</sup> Já ñacachi Jesús já:

—A juú ndihi ñayivi candaa ini ña cáhan i yóho. Ndinuhu na ndínuna xíní túní cája Ndióxi, na cán cúú na cánda ini ña yóho.

<sup>12</sup> Ndúu java dataa ta a cuú tandaha da jáchi já nacacu da ta já ta cuú mé va da. Ta java da a cuú tandaha da jáchi já nacaja ñayivi xihin ná ta já ta cuú mé va na. Ta java da a tandaha da jáchi cúni da ndiquiahva ní da mé dá nu Ndióxi ña ná cacomí a cuéntá saha dá. Ta ndá ndó, na ndínuna xíní túní, candaa ini ndó ña yóho —nacachi Jesús.

### *Cája yí Jesús na valí*

*(Mr. 10:13-16; Lc. 18:15-17)*

<sup>13</sup> Tá nandihí já ñéhe na java na valí nacasa na nu Jesús ña ná chinúu a ndahá a jiní ná ta já caça tahví a nu Ndióxi saha ná. Joo ndaja coo na xíca tuun xihin á cán nacasáhá na cája cuehe na xihin na ndáca na valí cán.

<sup>14</sup> Já nacachi Jesús xihin na xíca tuun xihin á cán já:

—Quiahva ndó ñamani ná quixi na valí nuú i ta a cájí nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho —nacachi Jesús.

<sup>15</sup> Tá nandihí já nacinúu Jesús ndáha á jiní na valí cán. Anda já naquee a cuahan.

### *Ndítuhún in da cuicá xihin Jesús*

*(Mr. 10:17-31; Lc. 18:18-30)*

<sup>16</sup> Ta ndaja coo naxinu in dataa nu ín Jesús ta nandaca tuhún ñahá da já nacachi da já:

—Maestro, mé ndó cúú ndó ta vaha ña cán quéa ndáca tuhún i ndohó ndía ndítahan caja i já ná ñehe

táhvi i cuhun i indiví coo i anda ama cáa quivi —  
nacachi da xihin Jesús.

17 Já nacachi Jesús já xihin dá:

—Ndá cuéntá quea cáchún xihin i ña cúu u da  
vaha. Ni in túhún toho ñayivi co cúu ná na vaha  
ñuyívi yóho. In túhún Ndióxi cuití va quea vaha. Tá  
cúnun catacún nu in mé á já quea xini ñúhú cajún  
ña sáhdá tuhun Ndióxi —nacachi Jesús xihin dá.

18 Já nacachi da cán já:

—Ndá cúu mé ña ndítahan caja i —nacachi da.

Já nacachi Jesús já xihin dá:

—Coto a cáhnún ndii. Coto a cóun xihin ñájíhí á  
yíi ñani táhún. Coto a cája cuíhnún. Coto a cáhun ña  
tuhún sahá ñayivi.

19 Ndítahan caja cáhnún tátún xihin nánún. Ta  
ndítahan quihvi inún ñani táhún tá quiahva quihvi  
inún mún —nacachi Jesús.

20 Já nacachi da yúta cán já xihin á:

—Janda ta loho nasacuu u nasahá i cája i tóco  
ndihi ña sáhdá Ndióxi caja i. Ndía cúu ga ndítahan  
caja i —nacachi da.

21 Já nacachi Jesús já xihin dá:

—Tá ta cúnun cacuún in ta ndacú nu Ndióxi  
cuáhán jicún tóco ndihi ñahún jan ta ndacahndún  
jiuhún jan nuú na ndahví já ñehe táhvun coo cuahá  
ñahún indiví. Ta tá nandihí já quisún candicún  
yehe —nacachi Jesús.

22 Tá naxini johó da yúta cán ña yóho já naquee  
cuéha ndivaha da cuahan da jáchi da cuicá  
ndivaha cúu dá.

23 Anda já nacachi Jesús xihin na xíca tuun xihin  
á cán já:

—Mé a ndaa ná cachi i xihín ndó ña ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuénta saha ná.

<sup>24</sup> Jáchi janda cama chága cuu yaha in camello ini in yávi sahá yitucú a juú ga ña ná ndiquiahva in da cuicá mé dá ndáha Ndióxi ña ná cacomí a cuénta saha dá —ñacachi a.

<sup>25</sup> Tá naxini johó na xíca tuun xihín Jesús cán ña yóho já ñacatóntó ndivaha na ta nandaca tuhún táhan na já cáchi na já:

—Ndá na cúu na cuu cacu ndaa ínima, dá já — cáchi na.

<sup>26</sup> Nandicoto nihni Jesús nu ná já ñacachi a já xihín ná:

—Ni in na a cúu caja ña yóho joo Ndióxi quéa cuu caja ña jáchi ni in ñaha co ihvi toho nu Ndióxi — ñacachi Jesús.

<sup>27</sup> Anda já ñacachi Pedro já:

—Joo ndehe, najándacoo ndihi nde ñaha nasacomí nde ta ndíco nde ndohó. Ndía ñehe táhvi nde caja ndó —ñacachi Pedro xihín Jesús.

<sup>28</sup> Anda já ñacachi Jesús já xihín dá:

—Mé a ndaa ná cachi i xihín ndó. Tá ná tandaa quivi nduu saá tóco ndihi ñaha já cacoo yehe, da nachindahá Ndióxi nduu ñayivi nuú ndicáhnu ndivaha i. Ta cán cacoo ri ndohó, na naxica tuun xihín i nuú uxu ivi táyi vaha. Ta cán caja vii ndó sahá ndíhuxu ivi táhnda na ñaquixi chichi Israel.

<sup>29</sup> Ta ndá na najándacoo vehe na á ñani na á quiahva na á tátá na á náná na á ñájihí na á jahyi na á ñundáhyi na sahá yehe, na cán cúu na ñehe ná cuaha chága ví ñaha. Ta jatá ña cán ñehe táhvi ná catacu na nu Ndióxi anda ama cáa quivi.



<sup>30</sup> Ta ndúu cuahá na ín saha ñuyíví yóho viti joo vaxi quívi cacuu na na coó saha nu Ndióxi. Ta ndúu cuahá na coó saha ñuyíví yóho viti joo vaxi quívi cacuu na na ín saha nu Ndióxi –nacachi Jesús.

## 20

### *Sácú Jesús quiahva sahá java da sáhnda uva*

<sup>1</sup> Já nacachi Jesús já sácú a quiahva:

—Nuú cacomí Ndióxi cuéntá sahá ñayivi cúú á tátuhun ña yóho: Ín in dataa naha chá naquee da cuahan da nducú da mozo caja chúun da cahnda da uva nu ñúhu dá.

<sup>2</sup> Ta nacandoo da चाहvi da in jihuún caa naní denario in quívi. Ta já nachindahá da mé mozo cán cuahan da caja chúun da nu ñúhu dá.

<sup>3</sup> Tá nandihí já naquee tucu da xihín ñaha ñúhu cán tátuhun caa in naha já nanditahan da java da ndúu núná uun nuú yahvi.

<sup>4</sup> Já nacachi mé da xihín ñaha ñúhu cán já: “Cuáhán ri ndóhó va cahnda ndó uva nu ñúhu i ta já चाहvi i ndóhó tá quiahva ndítahan nu ndó quehe ndó”, nacachi da. Já naquee mozo cán cuahan da jáquee da nu ñúhu dá.

<sup>5</sup> Ta tá nacuu caxivi já naqueta tucu da xihín ñaha ñúhu cán cuahan da ta natiin da java ga da caja chúun xihín dá. Ta tá nacuu caa uní natiin chága da da jáquee nu ñúhu dá.

<sup>6</sup> Ta tá nacuu tátuhun caa uhun sahini naqueta tucu da ta nuú yahvi cán naxini chága da da ndúu núná uun. Já nacachi da já xihín da ndúu cán: “Ndá

cuéntá quéa sa ñacuu ndiví yaa ndúu ndó yóho”, ñacachi da xihín da ndúu cán.

<sup>7</sup> Ta ñanducú ñehe da cán tuhun já cáchí da já: “Co cája chúun nde jáchí cóo ña quíxi ndúcú nde caja chúun nde”, ñacachi da cán. Anda já ñacachi da xihín ñaha ñúhu cán já: “Cuáhán ri ndóhó va cahnda ndó uva nu ñúhu i. Ta já चाहवि i ndohó tá quiahva ndítahan nu ndó quehe ndó”, ñacachi da.

<sup>8</sup> Ta tá sa ñacuaá já ñacachi da xihín ñaha ñúhu cán xihín da cómí chuun nu mozo cán ña ná cana da da cúu mozo cán já ná quehe yahvi da sahá chuun ñacaja da. Ta da ñaquihvi ñacaja chúun nu ndihí cán, da cán cúu da jihna ñúhú ná quehe yahvi. Tá ñandihi cán ná quehe yahvi da ñaquihvi nu cuití.

<sup>9</sup> Anda já ñacasaa da ñaquihvi caja chúun caa uhun sahini já ñaquehe in in da cán in denario.

<sup>10</sup> Ta ndaja coo tá ñacani a nuú da ñaquihvi caja chúun janda naha cán quehe yahvi da já quéa ñacahán da ña cuaha chága jihún ndiquehe da nuú da ñaquihvi caa uhun sahini cán. Joo quiahva já in denario ñaquehe ri in in da cán.

<sup>11</sup> Sahá ña cán quéa ñacasáhá da cáhan cuachí da xihín da xihín ñaha ñúhu cán.

<sup>12</sup> Já ñacachi da já: “Da ñandai cuu caja chúun nu ndihí cuití yóho in hora cuití ñacaja chúun da. Ta tá quiahva ñachahvi ndó ndehe, da ñacaja chúun ndiví yaa nu ndítahyí quiahva já ñachahvi ri ndó nuú da caa va”, ñacachi da cáhan cuachí da cán.

<sup>13</sup> Anda já ñacachi da xihín ñaha ñúhu cán xihín in táhan mozo cán já: “Candehé, amigo. Co cája quini toho i xuhun. Á a juú in denario ñacandoo i

chahvi i nuun.

<sup>14</sup> Juhun ña ndítahan quehún ta cuanúhun. Jáchi cúní chahvi i nuú da ñajaja chúun in hora cuití va tá quiahva ñacandoo i chahvi i nu yóhó.

<sup>15</sup> Jáchi núná nuú i caja i ña cúní mí i xihín jjuhún i. Ta co ndítahan cahihvi inún sahá ña vaha ini i”, ñacachi da xihín ñaha ñúhu cán xihín da cahan cuachí cán –ñacachi Jesús sácú a quiahva.

<sup>16</sup> Ta ñacachi tucu a já:

–Sahá ña cán quéa ndúu cuahá na ín saha ñuyíví yóho viti joo vaxi quiví cacuu na na coó saha nu Ndióxi. Ta ndúu cuahá na coó saha ñuyíví yóho viti joo vaxi quiví cacuu na na ín saha nu Ndióxi –ñacachi a.

*Cáxi tuhun tucu Jesús ña quivi a  
(Mr. 10:32-34; Lc. 18:31-34)*

<sup>17</sup> Ta tá sa ñaquee tucu Jesús cuahan chí Jerusalén já ichi cán ñatavá xóo a ndíhuxu ivi na xíca tuun xihín á cán já ñacachi a já xihín ná:

<sup>18</sup> –Candehé ndo. Yóho ndáa í cuahan yó chí Jerusalén nuú ndiquiahva na yehe, da ñachindahá Ndióxi nduu ñayívi ndahá na sacuaña nuú jutú xihín nuú na jánaha ley Moisés. Ta na cán cúu na cacu ini sahá ndaja quivi i.

<sup>19</sup> Anda já ndiquiahva na yehe ndahá na tóho ña ná cuacu ndaa na yehe. Ta caní na yehe ta já cata caa na yehe ndíca crúxu joo tá ná yaha uní quiví já nditacu tucu u –ñacachi Jesús.

*Tá ñaxíca náná Jacobo xihín Juan ñamaní nuú  
Jesús  
(Mr. 10:35-45)*

20 Anda já n̄acayati ñájíhí Zebedeo, ñá cúú náná Jacobo xih̄in Juan nuú Jesús. Ta ndáca ñá ndíví jahyi ñá n̄acasaá ñá n̄acaxítí ña nu á jáchi cúni ñá caca ñá in ñaman̄i nuú Jesús.

21 Anda já n̄acachi Jesús já xih̄in ña:

—Ndá quéa cúni ndó —n̄acachi a.

Já n̄acachi ñá cán já:

—Ña cúni quéa ná caja ndó ñaman̄i cahnda ndó chuun ña ná cacoo in in jahyi i xoo jíin ndó. In da xoo cuáha ta in da xoo íti jíin ndó indiví tá ná cacomí ndó cuéntá sahá ñayivi —n̄acachi ñá cán.

22 Anda já n̄acachi Jesús já xih̄in ña:

—Cɔ cándaá ini ndó ña xíca ndó nuú i —n̄acachi a.

Anda já n̄acachi a já xih̄in Jacobo xih̄in Juan cán:

—Á cuu ndoho ini ndó tá quiahva nditahan nuú i ndoho ini i. Jáchi ña vaxi nuú i ndoho ini i cúú á tátuhun coho i in yáxi ndutá ova. Á íin tiahva ndó ndoho ini ndó tá quiahva ndítahan nuú i ndoho ini i anda quiahva ná quivi i —n̄acachi Jesús xih̄in ndíví da cán.

—Cuu caja nde ña —n̄acachi ndíví da cán xih̄in Jesús.

23 Anda já n̄acachi tucu a já xih̄in dá:

—Mé a ndaa tandaa quivi coho ndó ña ova ñúhu in yáxi, mé ña coho i. Ta tandaa quivi ndoho ndivaha ini ndó tá quiahva ndoho ini i anda quiahva ná quivi i. Joo sahá ña xíca ndó cacoo in ndó xoo cuáha i ta in ndó xoo íti i a juú yehe cúú dá cuu quiahva i ña nu ndo. Jáchi sa n̄andicaxi Ndióxi na ñehe táhvi cacoo cán —n̄acachi a.

24 Joo ndaja coo tá naxini joho ndíhuxu chága na xíca tuun xihín Jesús cán ña yóho já naçasáhá na xójo ini na xihín ndíví da cúú ñani cán.

25 Anda já nacana Jesús tóco ndihi na xíca tuun xihín a cán já nacachi a já xihín ná:

—Sa xíni ndó ndaja cája na sáhdá chuun nuú ñayivi ndúu ñuyíví yóho. Ña cája na quéa jácandíhi na ñayivi ta cája na tá quiahva cúni mé ná.

26 Joo co ndítahan coo ña cán tañu mé ndó jáchi ndá da cúni cacuu da cáhnu chága tañu ndó xíni ñúhú cacuu da in da cája chúun cuéntá ndihi ndó.

27 Ta ndá da cúni cacuu da nu cuítí tañu ndóhó ndítahan cacuu da da cája ndíví nuú ndihi ndó.

28 Jáchi ni yehe, da nachindahá Ndióxi nduu ñayivi coó naquixi i ñuyíví yóho ña ná caja ndíví ñayivi nuú i. Ña naquixi i caja i quéa caja ndíví i nu ná ta ndiquiahva i mí i quivi i já ná cuu cacu ndaa ínimá cuahá ñayivi ná a cùhun na indayá —nacachi a.

*Tá nandaja vaha Jesús ivi da cuaá  
(Mr. 10:46-52; Lc. 18:35-43)*

29 Ta tá naqueta Jesús ñuu Jericó xihín na xíca tuun xihín á cán já ndíco cuahá ndivaha ñayivi jatá cásahan na.

30 Ta ndaja coo yati jíin íchi cán nasanduu coo ivi da cuaá ta tá naxini joho da ña yáha Jesús cuahan já naçasáhá ndíví da cáyuhú da já cáchí da já:

—Jesús, da naquixi chichi David, caja ndó ñamaní candáhví loho ini ndó ndehe —cáchí da.

31 Anda já naçasáhá cája cuehe ñayivi xihín ndíví da cuaá cán ña ná catáji yúhu dá. Joo ví ga ví cáyuhú da já cáchí da já:

—Jesús, da naquixi chichi David, caja ndó ñamani candáhví loho ini ndó ndehe —ñacachi da.

<sup>32</sup> Anda já nandaca ndichi Jesús já nacana ndívi da cuaá cán. Ta já nandaca tuhún a da já ñacachi a já xihin dá:

—Ndía cúní ndó ña ná caja i xihin ndo —ñacachi a.

<sup>33</sup> Já ñacachi ndívi da cuaá cán já:

—Candehé nde cúní nde, xitoho.

<sup>34</sup> Anda já nacandáhví ini Jesús da ta nacani ndaa ndáha á nuu dá. Chí ivi laá nanuna nuú da cuaá cán ta ñacasáha da ndico da jatá Jesús cuahan da.

## 21

### *Ndihvi Jesús ñuu Jerusalén*

*(Mr. 11:1-11; Lc. 19:28-40; Jn. 12:12-19)*

<sup>1</sup> Ta tá sa ja chá xinu cōo na ñuu Jerusalén já na xinu na in ñuu loho naní Betfagé yati jín yucu naní olivo. Ta cán ñasahnda Jesús chuun nuú ivi táhan da xica tuun xihin á cán.

<sup>2</sup> Já ñacachi a já xihin dá:

—Cuáhán ndó ñuu loho jan ta tá ná xinu cōo ndó jan ndiñehe ndo in búrrō jíhí ndico ndaa rí ta xihin mé rí jan cándichi inga búrrō loho. Ndaxí ndó rí ta cañehe ndó ndívi rí quixi ndó.

<sup>3</sup> Ta ndá na ná cahan xihin ndo já quéa cachi ndó xihin ná ña xíní ñúhú xitoho ndó rí joo tá ná ndihi chuun rí já nducú ñehe tucu da rí, já cachi ndó xihin ná —ñacachi Jesús xihin ndívi da cán.

<sup>4</sup> Tóco ndihi ña yóho ñayaha já ná xinu cōo nuú ña ñacahyí in da profeta já:

<sup>5</sup> Joho cachi ndó xihín na ñuu Jerusalén:

“Candehé ndo. Ndáhvi uun cáa da cómi cuéntá saha ndó.

Vaxi da nu ndo ta canúu da jata búrrō jíhí, jahyi in rí ndiójo, canúu da vaxi da nu ndo”, cáchí tuhun Ndióxi.

<sup>6</sup> Ta ndíví da xíca tuun xihín Jesús cán nasahan da nacaja da tá íin nasahnda Jesús chuun nu dá.

<sup>7</sup> Já ñéhe da búrrō jíhí cán xihin búrrō loho, jahyi rí naxinu na nuú Jesús. Anda já nachojó na cotó ndée na jata ri ta nandaa Jesús jata ri.

<sup>8</sup> Ta mé cuahá ñayivi ndúu cán nacasáhá na chinduu na cotó ndée na íchí mé nuú yaha Jesús cán. Ta java na nacasáhá na sáhdá na ndahá yító ta chinduu na do íchí mé nuú yaha Jesús cuhun a.

<sup>9</sup> Ta ñayivi cuahan chí nuu ta jári na vaxi chí jata nacasáhá na cáyuhú na já cáchí na já:

—Cája cáhnu í da naquixi chichi David yóho. Ndicáhnu nahá ná cacuu da cómi cuéntá saha yo jáchí cúu dá da vaxi yuhú nuu Ndióxi. Cáhnu ná cacuu Ndióxi —cáchí ñayivi cuaha cán cáyuhú na casahan na xihin á.

<sup>10</sup> Ta tá nandihvi Jesús ñuu Jerusalén cán tóco ndihi ñayivi nacasáhá catóntó ndivaha na. Já cáchí xihin táhan na já:

—Ndá da cúu da yóho —cáchí xihin táhan na.

<sup>11</sup> Java táhan na cán cáchí na:

—Da yóho cúu in profeta, da ñuu Nazaret cuéntá estado Galilea —cáchí xihin táhan na.

*Tá nataxí Jesús na ndúu jícó ñaha yéhe veñuhu  
(Mr. 11:15-19; Lc. 19:45-48; Jn. 2:13-22)*

<sup>12</sup> Anda já nandihvi Jesús veñuhu cáhnu cán já nacasáhá táxí ndihi a na ndúu jícó xihín na ndúu

xéen cán. Ta naxícó ñehe a mesa na ndúu ndíjama jìuhún cán ta naxícó ñehe a táyi sác̄o na ndúu jíco ndijata.

<sup>13</sup> Já nacasáhá cáchí a já xihín ndihi na cán já:

—Já cáchí t̄uhun Ndióxi já: “Vehe mí i cacuu a vehe nuú quixi na caça tahví na nu Ndióxi”, cáchí t̄uhun Ndióxi. Joo ndóhó nandai cuu ndó yóho caja cuíhná ndo nuú ñayivi —nacachi Jesús xihín ná.

<sup>14</sup> Tá nandihí já nacayati java na cuáá xihín java na rénc̄o nu á ini mé veñuhu cáhnu cán ta nandaja vaha mé á na.

<sup>15</sup> Joo xój̄o ndivaha ini na sacuaḥa nuú jutu xihín na jánaha ley Moisés tá naxini na ña xitúhún nacaja mé á ta tá naxini joh̄o na ña cája cáhnu na valí cán mé á tá cáchí na já: “Cája cáhnu í da naquixi chichi David.” Sahá ña cán quéa xój̄o ini na

<sup>16</sup> ta já nacachi na já xihín Jesús:

—Á xini johún ña cáhan na valí yóho —nacachi na xihín Jesús.

Já nacachi Jesús já:

—Ajan, xini joh̄o i ña cája cáhnu na Ndióxi. Á c̄oó nacahvi ndó t̄uhun Ndióxi nu cáchí a já:

Janda na valí ta janda na chíchí nacaja Ndióxi xihín ná,

ñá ná cuu caja cáhnu na mé á, cáchí t̄uhun Ndióxi

—nacachi Jesús xihín na cán.

<sup>17</sup> Anda já najándacoo a na já naqueta jatá ñuu cán cuahan chí ñuu Betania ta cán nasah̄in a.

*Tá naxicqañ Jesús cháhan jat̄a titó ñuhú  
(Mr. 11:12-14, 20-26)*

<sup>18</sup> Ta inga quiví itaan tá nandicó c̄o a cuahan chí Jerusalén já nacasáhá cuíco a cuahan.



19 Ta yuhú íchi cán naxini a cándichi in tító ñuhú. Ta chí naşahan sándehe a á ín cuihi nu do caxí a. Joo coó ñaha ná ndiñehe a. Ndáha uun dó cán cuití va ín. Anda já nacachi a já xihin do:

—Ni in túhún ga tañu a cána cuihi nu yóhó — nacachi a xihin do.

Chí ivi laá nahichi tító ñuhú cán.

20 Tá naxini na xica tuun xihin Jesús cán ña yóho já nacatontó na já cáchi na já:

—Ndá cuénta quea nahichi tító ñuhú cán ivi tuhun —nacachi na xihin Jesús.

21 Ta nanducú ñehe Jesús tuhun nu ná já nacachi a já:

—Mé a ndaa ná cahan i xihin ndo ña tá ná candeé ini ndó yehe ta ni loho co cáhvi ivi johó ini ndó já quea cuu caja ndó ña náhnu chága nuú ña nacaja i yóho. Ta janda cuu cachi ndó xihin in yucu: “Caxoo ta cuáhán jáquetún mún ini tañuhú”, ta chí já ndusa coo.

22 Ta tá ná candeé ini ndó yehe nani xica tahví ndo nu Ndióxi ta co cáhvi ivi johó ini ndó já quea ñehe ndó ña xica ndo nu á —nacachi Jesús.

*Tá ndaca tuhún na Jesús yo sahan ndeé nu á ña jánahe mé á nuú ñayivi*

*(Mr. 11:27-33; Lc. 20:1-8)*

23 Tá nandihí já nandihvi Jesús ini veñuhu cáhnu cán ta nani jánahe tuhun Ndióxi nuú na ndúu cán naxinu na sacuahe nuú jutu xihin na sacuahe nuú na Israel cán nu á. Já nacachi na já xihin á:

—Yo já sahan ñamaní nuun cajún ña cajún yóho —nacachi na.

24 Anda já nanducú ñehe Jesús tuhun nu ná já nacachi a já:

—Ta ná ndaça tuhún ri yehe va ndohó ta tá ná nducú ñehe ndó tuhun nuú i anda já caxi tuhun i nu ndó yo já nasahan ñamaní nuú i caja i ña cája i yóho.

<sup>25</sup> Ta viti cachi ndó xihín i yo já nachindahá Juan ña ná quixi da caja ndúta dá ñayivi. Á Ndióxi nachindahá da á ñayivi nachindahá ñahá — nacachi Jesús ndáça tuhun a na.

Já nacasáhá ndítuhún xihín táhan na já cáchí na já:

—Tá ná cachí ña Ndióxi quéa nachindahá Juan ta já nducú ñehe Jesús tuhun nu yo já cachi da xoho: “Ndá cuénta quéa coó naxeen ndó candúsa ndó da, dá já”, cachi Jesús xoho.

<sup>26</sup> Ta tá ná cachí ña ñayivi cúu na nachindahá Juan já yihví yo ña ndicuíta ñayivi xihín yo. Jáchí tóco ndihi na cándúsa na ña naquixi Juan jáyaha da ña nacahan Ndióxi nuú ñayivi —cáchí na ndítuhún xihín táhan na.

<sup>27</sup> Sahá ña cán quéa nacachi na já xihín Jesús:

—Co xini toho nde yo já nachindahá Juan.

Anda já nacachi Jesús já xihín ná:

—Ta ni yehe a caxi tuhun i nu ndo yo já nasahan ñamaní nuú i caja i ña yóho —nacachi Jesús xihín na cán.

*Sácu Jesús quiahva sahá ivi da cúu jahyi in dataa*

<sup>28</sup> Anda já nacachi tucu Jesús xihín na cán já:

—Cuni johó ndó ña nayaha in tañu. Íin in dataa ta nasahin ivi jahyi ta da. Ta nasahan da nuú in táhan da cán já nacachi da já xihín dá: “Jahyi a, cuáhán caja chúun lohún nu ñuhú i nu cáa tó uva”, nacachi da xihín jahyi da.

<sup>29</sup> Já n̄acachi jahyi da já xihín dá: “A cùhùn toho ì jáchì cò xíca ìni ì cùhùn ì”, n̄acachi da. Joo tá n̄andihì n̄acahvi ìni da ña a váha ná cuu ìni da chí já n̄aquee da cuah̄an da caja chúun da nu ñúh̄u tátá da.

<sup>30</sup> Ta jári n̄asah̄an tátá da cáh̄an da xihín inga jahyi da ta quiah̄va já n̄asah̄nda ri da chuun nuú da cán. Ta da cán n̄acachi da já xihín tátá da: “Ajan. Cùhùn ì”, cáchì da. Joo tá n̄andihì còó n̄asah̄an toho da.

<sup>31</sup> Ta viti cachi ndó xihín ì ndá da cúú da n̄acaja ña cúnì tátá da —n̄acachi Jesús.

Já n̄acachi n̄a cán:

—Da nu cuítì.

Anda já n̄acachi tucu Jesús já:

—Mé a ndaa ná cah̄an ì xihín ndo ña ìn chága sah̄a n̄a játaça jiuh̄ún cuéntá impuesto xihín najihí xíca jii ña ná cacomí Ndióxi cuéntá sah̄a ná a juú ga ndohó.

<sup>32</sup> Jáchì naquixi Juan, da jácandúta ñayivi najánāha da ndohó ndaja ndítahan caja ndó ta còó n̄axeen ndó candúsa ndó da. Joo n̄a játaça jiuh̄ún cuéntá impuesto xihín najihí xíca jii n̄acandúsa na ña n̄acah̄an da. Ta vatí n̄axini ndó ña yóho joo còó n̄axeen ndó ndijama ndó ña cája ndó jáchì còó n̄axeen ndó candúsa ndó mé Juan.

*Sácú Jesús quiah̄va sah̄a java mozo, da n̄acaja quini xihín xitoho da*

*(Mr. 12:1-12; Lc. 20:9-19)*

<sup>33</sup> Cuni joho ndó ná cacu u inga quiah̄va nu ndo. N̄asah̄iin ìn dat̄aa ta najándeē cuah̄a dá tó uva nu ñúh̄u dá. Ta n̄asacu da ìn corra yító nu do. Ta n̄acavaha da ìn nuú cùh̄nì mé uva cán ña cavaha

vino. Ta nacavaha da in nu jíco canúu da já cuu candaa da tóco ndihi dó cán.

’Anda já nasahan ndojo da ñúhu dá nuú java na caja chúun na ña. Ta já naquee da cuahan xíca da.

<sup>34</sup> Ta tá naxinu tiempo jaquee na ja nachindahá da java mozo da ña ná cuhun na nuú na ndúu caja chúun ñúhu da cán ña ná ndiquiahva na nu dá ña cáni nu dá ndiquehe da saha ñúhu dá ña nasahan ndojo da nuú na cán.

<sup>35</sup> Joo ndaja coo na caja chúun nu ñúhu cán natiin na in táhan da cúu mozo da cán ta nacani na da. Ta inga táhan da cán nasahni na. Ta inga táhan da cán nandicuita ñee na xíhin yú.

<sup>36</sup> Joo mé da xíhin ñaha ñúhu cán nachindahá cuaha chága da mozo da nasahan da nu ñúhu dá. Ta tá quiahva nacaja na xíhin mé java mozo nasahan nu cuítí cán quiahva ja nacaja ri na xíhin tóco ndihi mozo cán.

<sup>37</sup> ’Tá nandihi ja nasacu ini da xíhin ñaha ñúhu cán chindahá da jahyi da jachi nacahán da: “Cája i cuéntá coo toní ñúhú na xíhin jahyi i”, nacahán da xíhin ñaha ñúhu cán.

<sup>38</sup> Joo tá naxini na caja chúun ndojo ñúhu cán ña vaxi da cúu jahyi da xíhin ñaha ñúhu cán ja nacachi xíhin táhan na ja: “Candehé ndo. Yóho vaxi da cúu jahyi xitoho í. Ta tá ná xínu quivi quivi xitoho í ta da yóho cacuu da ndicojo chuun saha ñúhu yóho. Cóho cahní yó da ja ná cando ñúhu yóho ndaha mí”, nacachi xíhin táhan na cán.

<sup>39</sup> Ña cán quea natiin na da ta natavá na da janda yuhú cútu ta cán nasahni na da —nacachi Jesús sácú a quiahva.

40 Anda já nandaca tuhún Jesús na ndúu cán já nacachi a já:

—Ndía cáhán ndo caja da xihín ñaha ñúhu yóho xihín na cája chúun nu ñúhu dá —nacachi a.

41 Anda já nacachi na cán já xihín Jesús:

—Ña caja da quéa cahni da na quini, mé na nacaja chúun too nu ñúhu da cán. Ta já ndiquiahva ndojó da ñúhu da nuú java ga na ña ná caja chúun na nu á. Ta tá jáquee na ndiquiahva na nu dá ña cáni nu dá ndiquehe da saha ñúhu dá —nacachi na cán xihín Jesús.

42 Já nacachi Jesús já xihín na cán:

—Á a ñaha cahvi ndó tuhun Ndióxi nu cáchi a:  
Mé yuu ña najácana da cávaha vehe,  
ña cán cúu ña nanduu yuu ndúhu sahá vehe ña ín  
chága saha.

Ña yóho quéa nacaja Ndióxi,  
ta cúu á in ñaha cáhnu ndivaha nu yo, cáchi tuhun  
Ndióxi.

43 Ña cán quéa cáhan i xihín ndó ña cacu xoo Ndióxi ndohó ña ná a cacomí ga mé á cuénta saha ndo. Ta quiahva mé á ñamaní nuú java ga ñayivi ña ná ndihvi na nuú cacomí Ndióxi cuénta saha ná, mé na ndiquiahva na nu á ña cáni nu á ndiquehe a.

44 Ta cáchi i xihín ndó ña yehe cúu u tátuhun mé yuu cáhan i saha. Ta ndá na ná ndicava jatá yuu cán chí chachi xéhe na. Quiahva já ndihi sahá ñayivi tá co cúni na candúsa na yehe. Ta tá mé yuu cán ná yaha ndicava jatá in na já caji ndihí ñahá. Quiahva já ndihi sahá ñayivi ini indayá tá co cúni na candúsa na yehe —nacachi Jesús.

<sup>45</sup> Tá naxini jōho nā cúú sacuaḥa nuú jutū xihín nā fariseo cán ña yóho, naḥandaḥ táhyí ini na ña saḥa mé ná cáḥan Jesús.

<sup>46</sup> Saḥá ña cán quéa nanducú nā tiin na mé á joo coó nācuu caja na saḥá ña nayihví nā ñayivi jáchi cándúsa ñayivi cán ña cáḥan Jesús cuéntá Ndióxi.

## 22

### *Sácú Jesús quiaḥva saḥá vicó tándaḥa (Lc. 14:15-24)*

<sup>1</sup> Tá nandihí já naḥasáhá tucu Jesús jánaḥa ñayivi xihín ndinuhu quiaḥva. Já cáchí a já xihín ná:

<sup>2</sup> —Nuú cacomí Ndióxi cuéntá saḥá ñayivi cúú á tátuhun ña nayaha xihín in rey tá naḥavaḥa da in víco ña tandaḥa jahyí taḥa da.

<sup>3</sup> Naḥindahá da mozo da ña ná cuḥun da cana da nā ndítahan quixi. Joo coó naxeen na quixi na mé víco.

<sup>4</sup> Anda já naḥindahá chága da mozo da ña ná caxi tuhun da nuú nā ndítahan quixi cán ña sa naḥaja ndíví da ña cuxu na. Sa naxihí tindiḥi xihín java ga quíti, rí nandaha. Sa naḥandíví ndihí ñaha cuéntá víco tándaḥa saḥá ña cán quéa ná quixi na. Ña yóho cúú chuun naḥanda nu mozo cán cachi da xihín nā ndítahan quixi cán.

<sup>5</sup> Joo co ndáa nā cán cuḥun nā. In táhan da cán naḥaḥe da cuḥan da candehé da nu ñúḥu dá. Ta inga da naḥaḥe da cuḥan da caja ndahví da.

<sup>6</sup> Ta java ga nā cán naḥiin na mozo mé rey cán ta naḥaja xíxi na xihín dá janda quiaḥva naḥahní ñahá nā.

7 Andá já naxojo ndivaha ini rey cán sahá ña cán quéa nachindahá da soldado da ña ná cuhun na cahní na na nasahní ndii cán ta ná chicaoan ñúhu dá ñuu na.

8 Andá já nacachi tucu rey cán já xihín java ga mozo da: “Sa nacandíví tóco ndihi ñaha ña coo víco joo na nacana i cán coó saha toho na quixi na víco.

9 Ña cán quéa cuahán ndó ndijáá cáyé náhu ta ndá ñayivi nacuu cana ndó na ná quixi na víco tándaha yóho”, nacachi rey cán nasahnda da chuun nu mozo da.

10 Andá já naquee mozo da nasahan na ndijáá cáyé ta ndaja cáa mé ñayivi najátaca na. Ñayivi vaha xihín na quini viti nataca nacaja na. Ta já najácutú na vehe nuú coo víco tándaha cán xihín ñayivi.

11 Andá já nandihvi rey nu ñúhu na cán já naxini da ndácaan in dataa, da co ndíxi jáhma ña ndíxi na ndúu víco tándaha.

12 Ta nacayati mé rey nu dá já nacachi da já xihín dá: “Amigo, ndaja nacajún naquihvún yóho tá co ndíxi tohún jáhma ña ndíxi na ndúu víco tándaha”, nacachi rey xihín da cán. Joo coó nanducú ñehe da tuhun nu rey.

13 Andá já nasahnda rey chuun nu mozo da. Já nacachi da já xihín ná: “Cató ndó ndáha dá xihín saha dá. Ta jácana ndó da chíjata nuú naá yávi. Cán cuacu ndivaha da anda quiahva cahña nuhu da”, cáchi da.

14 Jáchi cuahá ndivaha cúu ná nacana Ndióxi ña ná cacomí a cuénta saha joo chá cúu ná ndiquiahva na ndáha mé á ña ná cuu caxi a na —nacachi Jesús.

*Ndáca tuhún na Jesús á ndítahan nu ná चाहvi na jjuhún cuéntá impuesto*

(Mr. 12:13-17; Lc. 20:20-26)

15 Tá nandihí já naqúee na fariseo nasahan na jándique táhan na tuhún na ndaja caja na coto ndojó na Jesús xihín tuhún cáhan mé á já ná cuu jácojo na cuachi jatá.

16 Ña cán quéa nachindahá na java na cuéntá mé ná xihín java na cuéntá Herodes nuú Jesús já nacachi na já xihín á:

—Maestro, xíni nde ña ndinuhu ña ndaa cáhan mé ndó. Ta cándaá ini nde ña jánahá ndó ña ndaa saha íchi cuéntá Ndióxi. Ta co quéhe ndó cuéntá tá cáhan núu ñayivi saha ndo. Ta cándaá ini nde ña tá cáhan ndó sahá in ñaha cája ñayivi cúu á sahá ña sándehé ndó janda ínima ná.

17 Sahá ña cán quéa cúni nde candaá ini nde ndía cachi ndó sahá ña yóho: Á ndítahan nuú nde चाहvi nde jjuhún cuéntá impuesto nuú da cómi cuéntá sahá ñuu Roma. Á चाहvi nde ña á a cháhvi toho nde ña —nacachi na cán xihín Jesús.

18 Joo sa nacandaá ini Jesús ña cáhvi núu ini na sahá ña cán quéa nacachi a já xihín ná:

—Co cúu ndó tá quiahva ndáa ndó jáchi cúni ndó coto ndojó cuití ndó yehe.

19 Jánahá ndó in táhan jjuhún ña cháhvi ndó impuesto jan nuú i —nacachi Jesús.

Anda já nasahan na in jjuhún caa naní denario nu á.

20 Tá naxini Jesús ña yóho já nacachi a já xihín ná:

—Yo nahná ta yo quivi quéa ndáa nu á —nacachi a.



21 Já nacachi na cán ja xihin á:

—Ñéhe a nahná xihin quiví da cómí cuéntá sahá ñuu Roma —nacachi na.

Anda ja nacachi tucu Jesús ja:

—Ndiquiahva ndó ña cúu ñaha da cómí cuéntá sahá ñuu Roma jan nu dá. Ta ndiquiahva ndó ña cúu ñaha Ndióxi nu á —nacachi a.

22 Tá naxini joho na cán ña yóho ja nacatóntó na ta najandacoo na a naquee na cuahan na.

*Tá ndáca tuhun na Saduceo Jesús á mé a ndaa nditacu ndii*

*(Mr. 12:18-27; Lc. 20:27-40)*

23 Ta sa mé quiví ja nasahan java na saduceo cahan na xihin Jesús. Ta mé na saduceo yóho co cándusa na ña nditacu tucu na sa naxihi. Sahá ña cán quea nandaca tuhún na Jesús ja cáchí na ja xihin á:

24 —Maestro, nu ley nacahyí Moisés sanahá natahnda chuun ta cáchí a ja: “Tá tándaha in dataa xihin ñájíhí da ta tá xíhi da ta coo jahyi da cácu ja quea ndítahan nuú ñani da tándaha dá xihin ña cuáan nacandoo cán. Ta ja ná coo jahyi da cán xihin yuhú nuú ñani da”, cáchí ley Moisés.

25 Ta viti cuni joho ndó ná cacu nde in quiahva nu ndó. Tañu mé nde yóho nasandu usa ñani. Ta da nu cuítí cán natandaha dá xihin in ñañaha. Tá nandihi ja naxihi da. Joo sahá ña coo jahyi da nacacu xihin ñájíhí da sahá ña cán quea nandiquehe ñani da, da chí ivi jata dá ña cuáan cán.

26 Ta quiahva ja nandoho ri da chí ivi cán jáchi naxihi da ta coo jahyi da nacacu xihin ña. Ta janda

ndíh<sub>u</sub>s<sub>a</sub> ñani cán ñatandaha xihín ña ta ndíh<sub>u</sub>s<sub>a</sub> da naxihí ta ni in da coó ñacacu jahyi xihín ña.

27 Ta tá nu ndíhí naxihí ri ñáñáha cán va.

28 Ta viti cachi ndó xihín nde tá ná xinu quiví nditacu tucu ndji, ndá da cacuu ndusa yí ñá cán jáchi ndíh<sub>u</sub>s<sub>a</sub> ñani cán ñatandaha xihín ñá ñuyiví yóho —ñacachi na saduceo cán xihín Jesús.

29 Anda já ñacachi Jesús já:

—A váha toho cáhán ndo jáchi co xini ndó ndaja cáhan tūhun Ndióxi ta ni co xini ndó ndá quiahva cáhnu cúu nde Ndióxi.

30 Jáchi mé quiví tá ná nditacu tucu ndji a tándaha ga ná ta ni a quiahva na jahyi jíhí na tandaha ná. Cacuu na tátūhun tátō Ndióxi ndúu indiví ta co tándaha na cán.

31 Joo sa xini yo ña nditacu tucu ndji. Á a ñáha cahvi ndó tūhun Ndióxi nu cáhí a já:

32 “Yehe cúu Ndióxi ña cája cáhnu Abraham ta yehe cúu Ndióxi ña cája cáhnu Isaac ta yehe cúu Ndióxi ña cája cáhnu Jacob viti”, ñacachi a. Ta ña yóho cuni cachi a ña tácu yij va Abraham xihín Isaac xihín Jacob vatí sa naxihí yiquí cuñu na —ñacachi Jesús.

33 Tá naxini johó ñayivi ndúu cán ña yóho já ñacatóntó na xihín ña jánaha Jesús nu ná.

*Tá cáhan Jesús ndá ley quéa cáhnu chága  
(Mr: 12:28-34)*

34 Tá ñañehé na fariseo tūhun ña ñaquee vaha Jesús ñasahnu a nuú na saduceo já ñanditútú ndihi na.

<sup>35</sup> Ta in táhan mé da cán, da jánaḥa ley Moisés nandaca tuhún da Jesús jáchi cúní da coto ndojó da mé á. Já nācachi da já:

<sup>36</sup> —Maestro, ndíá cúú ña cáhnu chága sáhná ley Moisés caja í —nācachi da cán xihín Jesús.

<sup>37</sup> Já nācachi Jesús já xihín dá:

—Ña cáhnu chága nu ley Moisés cúú ña yóho: “Ndítahan quihvi ini ndó Ndióxi, xitoho ndó xihín tóco ndihi ínimá ndó ta xihín ndinuhu ini ndó ta xihín tóco ndihí xíní túní ndo.”

<sup>38</sup> Ña yóho cúú ley nu cuítí ta cúú á ña cáhnu chága nu tóco ndihi ley.

<sup>39</sup> Ta tá quiahva ín ña nu cuítí yóho quiahva já ín ri ña chí ivi va ta cáchí a já: “Xíní ñuhú quihvi ini ndó ñani táhan ndó tá quiahva quihvi ini ndó mé ndó.”

<sup>40</sup> Ta jata ndíví ña yóho tín tóco ndihi ley Moisés xihín ña najánaḥa na profeta sanahá —nācachi Jesús xihín na fariseo cán.

*Ndáca tuhún na Jesús ndáchí naquixi a  
(Mr. 12:35-37; Lc. 20:41-44)*

<sup>41</sup> Ta nani nanditútú ndihi na fariseo ndúu na nu Jesús cán já nandaca tuhún a na.

<sup>42</sup> Já nācachi a já xihín ná:

—Ndíá cáhvi ini ndó saḥa Cristo. Ndá chichi cáhán ndo vaxi a —nācachi Jesús xihín ná.

Já nācachi na cán já:

—Vaxi a chichi David, da naṣacuu rey sanahá —nācachi na cán xihín Jesús.

<sup>43</sup> Andá já nācachi tucu Jesús já xihín ná:

—Tá ta mé a ndaa vaxi Cristo chichi David ndá cuéntá quéa nācachi da ña cúú á xitoho da. Jáchi

naçhutú ndaa ínima David xihín ínima yii Ndióxi tá naçahyí da já:

44 Já naçachi Ndióxi xihín xitoho i:

“Cacoo xoo cuáha i yóho

janda quiahva ná caja i ña ná cacomún cuéntá sahá na co cúní yohó”, naçachi Ndióxi, naçachi David.

45 Ndávaha cáhí na ña vaxi Cristo chichi David tá ta sa mé David naçachi da ña cúú á xitoho da — naçachi Jesús.

46 Ta chí ni in na coó naçuu caja nducú ñehe na tuhun nu á. Ta janda mé quivi já ni in ga na coó naçahan ndeé ini ndaça tuhún chága na mé á.

## 23

*Chíqaan Jesús cuachi jatá na fariseo xihín jatá na jánaħa ley Moisés*

(Mr. 12:38-40; Lc. 11:37-54; 20:45-47)

1 Anda já naçachi Jesús já xihín tóco ndihi ñayivi ta xihín na xíca tuun xihín á cán já:

2 —Na jánaħa ley xihín na fariseo cúú ná na ndítahan nuu ndicani na ña cúní cachi ley Moisés.

3 Ña cán quéa xíní ñúhú caja ndó tóco ndihi ña jánaħa na nu ndo. Joo a cája toho ndó tá quiahva cája mé ná jáchi co cája na ña jánaħa mé va na.

4 Jáchi cája na ña ná coo ihvi ndivaha ley janda quiahva co ndeé ini ñayivi cája na ña. Joo mé ná ni loho tíin co chíndeé ñahá na.

5 Ta cája na tóco ndihi ñaha ña ná cuni ñayivi na jáchi cátóo na candico listoni náħnu jini ná xihín jico ndáħa ná nu ndaa tuhun Ndióxi. Ta cátóo na

coo lándā chága yuhú jáhma ná a juú ga java ga ñayivi.

<sup>6</sup> Ta tá cahañ nā víco cátóo nā coo na nuú vaha cuití va. Ta tá quíhvi na veñuñhu cátóo nā cacoo na nu sácco nā ín chága saha.

<sup>7</sup> Ta cátóo nā ña ná cahañ toní ñúhú ndivaha ñayivi xihín ná tá xíca nuu na nuú yahvi. Ta chí a juú quiahva cátóo nā ña ná cachi ñayivi 'maestro' xihín ná.

<sup>8</sup> 'Joo ndóhó co ndítahan nu ndó nducú ndó ña ná cahañ ñayivi 'maestro' xihín ndo. Jáchi in ñani cúu ndihi ndó ta in túhún cúu maestro ndo, mé á cúu Cristo.

<sup>9</sup> Ta a cahañ ndo tátá cáhnu xihín ni in ñayivi ñuyíví yóho jáchi in túhún Ndióxi cúu á tátá ndo ta mé á ín a indiví.

<sup>10</sup> Ta a nducú ndo ña ná cahañ ñayivi 'jefe' xihín ndó jáchi in túhún laá va cúu jefe ndo, mé a cúu Cristo.

<sup>11</sup> Ndá da cúu da cáhnu chága tañu ndó xíní ñúhú da cája chúun da sahá ndihi ndó.

<sup>12</sup> Jáchi ndá nā ndíñehe jícó mé, jánuu ndáha Ndióxi nā. Joo ndá nā jánuu ndáha mé nu Ndióxi, jándíñehe jícó mé á nā.

<sup>13</sup> 'Ndáhví naucu ndó, nā jánañha ley Moisés xihín nā fariseo jáchi co cúu ndó tá quiahva ndáa ndó. Jáchi sáji nuu ndó nuú ñayivi já ná a cúu cacomí Ndióxi cuéntá saha ná. Ta ni ndóhó co ndiquiahva ndó mé ndó ndáha Ndióxi ná cacomí a cuéntá saha ndo. Ta cája ndó ña ná a cúu candaa ini ñayivi ndaja caja na ndiquiahva na mé ná ndáha Ndióxi.

<sup>14</sup> Ndáhví nahá naucu ndó, nā jánañha ley Moisés xihín nā fariseo jáchi co cúu ndó tá quiahva ndáa

ndó. Jáchí cándaa ndó vehe najihí cuáan ta tá nandihí cuahá ndivaha xíca tahví ndo nu Ndióxi jáchi cúni ndó jájahvi ndó nuú ña núu cája ndó. Sahá ña cán queá cáchí i xihín ndó ña ndóhó cacuu ndó na ndoho chága ini, caja Ndióxi.

<sup>15</sup> Ndáhví nahá nacuu ndó, na jánaha ley Moisés xihín na fariseo jáchi co cúu ndó tá quiahva ndaa ndó. Jáchí a juú quiahva xíca nuu ndó ndúcú ndo in talaá ñayivi ña ná candico na ña jánaha ndo. Ta tá sa nandaja ndó na cuéntá mé ndó já cája chága na cuachi janda cáni a nu ná ndoho chága ini na indayá a juú ga mé ndó.

<sup>16</sup> Ndáhví nahá nacuu ndó jáchi cúu ndó tátuhun na cuaá ndaca inga na cuaá. Jáchí jánaha ndó ñayivi ña tá sáhan na tuhun na nuú inga ñayivi nani tává na quivi veñuhu cáhnu já queá co ndúsa jáxinu coo na tuhun na. Joo cáchí ndo ña tá tává na quivi jihun cuáan ndacaan veñuhu cáhnu já queá ndúsa jáxinu coo na tuhun na, já cáchí ndo.

<sup>17</sup> Joo tóntó ndivaha ndó ta cúu ndó tátuhun na cuaá viti. Jáchí co cándaa ini ndó ña ín chága sahá veñuhu cáhnu a juú ga sahá jihun cuáan jáchi mé jihun cuáan cúu á cuéntá Ndióxi sahá ña ndacaan ini veñuhu cáhnu ña cúu cuéntá mé á.

<sup>18</sup> Ta inga tucu ña jánaha ndó nuú ñayivi cúu ña yóho: Tá sáhan in na tuhun na nuú ñayivi nani tává na quivi nu náa Ndióxi já queá co ndúsa jáxinu coo na tuhun na. Joo cáchí ndo ña tá tává ñayivi quivi ña sájoco na cánuu nu náa cán já queá ndúsa jáxinu coo na tuhun na, já cáchí ndo.

<sup>19</sup> Joo tóntó ndivaha ndó ta cúu ndó tátuhun na cuaá. Jáchí ín chága sahá nu náa cán a juú ga sahá ña sájoco na cánuu nu náa jáchi ña sájoco na cán cúu

á cuéntá Ndióxi sahá ña cánúu a nu náa cuéntá mé á.

<sup>20</sup> Sahá ña cán quéa ndá na tává quiivi nu náa já quéa tává ndihi ri na quiivi tóco ndihi ña sájoco na cánúu nu náa cán.

<sup>21</sup> Ta ndá na tává quiivi veñuhu cáhnu já quéa tává ri na quiivi Ndióxi jáchi cán ín mé á.

<sup>22</sup> Ta ndá na tává quiivi indivi já quéa tává ri na quiivi Ndióxi xihín quiivi nu sácco a sáhdá a chuun.

<sup>23</sup> Ndáhví nahá nacuu ndó, na jánaha ley Moisés xihín na fariseo jáchi co cúu ndó tá quiahva ndáa ndó. Mé ndó cávaha ndó uxu táhdá ña jáquee ndó ñundáhyi ndo ta sáhan ndó in táhdá ña nu Ndióxi. Já cája ndó anda yucu válí ña támi sáhan tátuhun menta xihín anís xihín comino. Joo co cája ndó ña ín chága saha ña sáhdá ley Moisés. Jáchi co cája ndó ña ndaa ta co cándáhví ini ndó ñayivi ta co cándeé ini ndó Ndióxi tá quiahva sáhdá ley caja ndó. Mé a ndaa xíní ñúhú cája ndó tóco ndihi ña yóho joo a jándacoo ndó ña jóco ndó nu Ndióxi in táhdá nuú uxu táhdá ña ñéhe ndó.

<sup>24</sup> Mé ndó cúu ndó tátuhun na cuaá ndáca inga na cuaá. Jáchi ndinuhu ini ndó cája ndó ña coo cuahá saha cuéntá ley Moisés joo sácú xoo ndó ña ín chága saha nu Ndióxi caja ndó. Cúu ndó tátuhun in da ndíhi ini da tavá da in ndicama loho ndácaan tásá da ná a cóco da ri. Joo co íhvi toho nu dá cóco da in camello.

<sup>25</sup> Ndáhví nahá nacuu ndó, na jánaha ley Moisés xihín na fariseo jáchi co cúu ndó tá quiahva ndáa ndó. Jáchi ndíhi ini ndó caja ndó costumbre ña ndícata ndó jata vaso xihín jata cohó joo ña ñúhu ini

a cán najátaca cuíhná ndo sahá ña ndiáva ndivaha ini ndó ña núu.

<sup>26</sup> Ndáhví nahá nacuu ndó, na fariseo jáchi cúu ndó tátuhun na cuáá. Ña ndítahan caja ndó nu cuítí quéa ndaja vií ndó ínimá ndó já cacuu ndó tátuhun in vaso á in cohó sa nandicata vaha na jáchi nandivií ini a xihín jatá viti.

<sup>27</sup> Ndáhví nahá nacuu ndó, na jánaha ley Moisés xihín na fariseo jáchi co cúu ndó tá quiahva ndáa ndó. Cúu ndó tátuhun vehe válí ndíta camasanto nu táán na ndii. Ndató jándicuchu na jatá joo chí ini a a juú quiahva quini sáhan jáchi ndinuhu lásá ndii ñúhu ini a.

<sup>28</sup> Quiahva já cúu mé ndó jáchi ndáa ndó tátuhun ñayivi vaha ndivaha. Joo mé a ndaa co cúu ndó tá quiahva ndáa ndó jáchi ndinuhu ña núu ndácaan ínimá ndo.

<sup>29</sup> Ndáhví nahá nacuu ndó, na jánaha ley Moisés xihín na fariseo jáchi co cúu ndó tá quiahva ndáa ndó. Cávaha ndó vehe válí ndíta camasanto nuú cañuhu lásá na nasacuu profeta sanahá ta jácacutú ndó nuú nanduxu na nacaja ndaa.

<sup>30</sup> Ta cáchí ndo já: “Ta tá nasanduu nde tiempo nasanduu tásáhnú jícó yo sanahá ta chí a chindeé toho nde na nasahní profeta, na nasanduu sanahá”, cáchí ndo.

<sup>31</sup> Ta xihín ña yóho náha táhyí a ña naquixi ndó chichi na nasahní profeta sanahá.

<sup>32</sup> Cuáhán ndo jáxinu coo ndó mé cuachi nacasáhá cája tásáhnú jícó ndo sanahá.

<sup>33</sup> Mé ndó cúu ndó tátuhun coo jáchi cája ndó tá quiahva cája coo. A cuú cacu ndaa ínimá ndó ta chí



tandaa quiv̄i cuh̄un ndó indayá nu ndoho ndivaha ini ndó.

<sup>34</sup> Sahá ña cán quéa yehe chindahá i java profeta nu ndo xihín java na ndichí xihín java na jánaha tuhun Ndióxi nu ndo. Joo java na cahní ndó na ta java na cata caa ndó na ndica crúxu ta java na cani ndó na ini veñuhu ta java na taxí ndó na tá ñuu tá ñuu.

<sup>35</sup> Ña cán quéa caça Ndióxi cuéntá nu ndó saha tóco ndihi ñayivi ndaa, na nasahní ndo sanahá. Caça mé á cuéntá saha Abel, da nasacuu da ndaa janda quiahva naxinu coo a nuú caça mé á cuéntá sahá Zacarías, da nasacuu jahyi Berequías. Mé da yóho nasahní ndó ini veñuhu tañu nu náa xihín nuú yii ndivaha.

<sup>36</sup> Mé a ndaa ná cahan i xihin ndo ña caça Ndióxi cuéntá saha tóco ndihi ndii jan nuú ñayivi ndúu tiempo viti.

*Tá sácu Jesús sahá ñayivi ndúu ñuu Jerusalén  
(Lc. 13:34-35)*

<sup>37</sup> 'Ndáhví nahá nacuu ndó, na ndúu ñuu Jerusalén. Jáchi sáhní ndó na profeta. Ta ndicuíta ndó cáni ndó na xihín yuu na nachindahá Ndióxi nu ndó. Cuahá ndivaha tañu cuni jándataca ndihi i ndohó joo coo naxeen ndó cuni johó ndó. Cúu á tá quiahva cája nduxú tá játaca rí jahyi válí ri tixi ndixi rí.

<sup>38</sup> Ta viti cuni johó ndó ña cáhan i xihin ndo. Vaxi quiv̄i tá janí ndáha mé vehe ndó candoo a.

<sup>39</sup> Ta mé a ndaa ná cahan i xihin ndó ña a cúní ga ndó yehe janda quiahva ná xinú coo quiv̄i cachi ndó: “Cáhnú nahá ná cacuu da vaxi cuéntá Ndióxi, xitoho í”, cachi ndó —nacachi Jesús xihín na cán.

## 24

*Cáxi tuhun Jesús ña vaxi quiví ndihi sahá veñuhu cáhnu ndácaan ñuu Jerusalén*

*(Mr. 13:1-2; Lc. 21:5-6)*

<sup>1</sup> Ta tá sa ñaquee Jesús veñuhu cáhnu Jerusalén cán cuahān já ñacativi ña xíca tuun xihín á nu á ta ñacasáhá ña cáhān ña xihín á ndá quiahva cáa veñuhu cán.

<sup>2</sup> Joo ñanducú ñehe Jesús tuhun nu ná já ñacachi a já:

—Mé a ndaa ná cahan i xihín ndo ña janda ni in yuu yóho a cándoo jatá inga yuu jáchi vaxi quiví tá nditaní ndihi ña yóho —ñacachi Jesús xihín ña xíca tuun xihín á cán.

*Ña coo tá sa ñacayati quiví ndihi saha ñuyiví*  
*(Mr. 13:3-23; Lc. 21:7-24; 17:22-24)*

<sup>3</sup> Anda já ñaquee Jesús cuahān chí yúcu nu cáa yitó olivo xihín ña xíca tuun xihín á. Ta nani ndúu ña cán ñacativi ña xíca tuun xihín á nu ín coo a cán já ñacasáhá ndáca tuhún xóo ña a já ñacachi na já xihín á:

—Cúni nde ña ná caxi tuhun ndó xihín nde ndá ama coo tóco ndihi ña yóho. Ta ndaja coo tá ná xinu coo quiví quixi tucu ndó ñuyiví yóho. Ta ndaja coo tá ná ndihi saha ñuyiví —ñacachi ña xihín Jesús.

<sup>4</sup> Já ñacachi Jesús já:

—Cuéntá coo ndó ná a jándahvi ni in na ndohó.

<sup>5</sup> Jáchi cuahá ndivaha na quixi na cuéntá mí i ta cahan ña ña tuhún tá cachi na já xihín ndo: “Yehe cúu Cristo, ña ñachindahá Ndióxi cacomí cuéntá

sahá ñayivi”, cachi na. Ta xihín ña yóho cuahá ndivaha ñayivi jándahvi na.

<sup>6</sup> Ta jandá johó ñehe ndó tuhun ña ndicuïta ñayivi caní táhan na yóho á cáa. Joo a cáyihví toho ndó jáchi já ndítahan coo. Joo ña yóho co cúní cachi a ña naxinu coo quiví nu ndíhí.

<sup>7</sup> Jáchi ñayivi ndúu in nación ndicuïta na caní táhan na xihín na ndúu inga nación. Ta quixi tama ta quixi cuehe ta ndaja táhan quixi a táan.

<sup>8</sup> Ta ña yóho cacuu a tondóhó ña casahá jihna ñuhú vaxi nuú ñayivi jáchi cámaní xinu coo nuú ndoho chága ini na.

<sup>9</sup> Anda já tiin na ndohó ta ndiquiahva na ndohó ndahá na co cúní ndohó já ná caja xíxi na xihín ndo. Ta cahní na ndohó ta tóco ndihi ñayivi ndúu ñuyiví candají na ndohó sahá yehe.

<sup>10</sup> Ta mé tañu já cuaha ná jándacoo na ña candeé ini na yehe ta ndaja táhan mé ná candají táhan na ta ndaja mé ná jicó túhún táhan na.

<sup>11</sup> Ta quixi cuahá ndivaha na tuhún ta cachi na cúu ná profeta cuéntá Ndióxi joo jándahvi na cuahá ndivaha ñayivi.

<sup>12</sup> Ta sahá ña ndicuahá ndivaha ña núu ñuyiví yóho sahá ña cán queá jándacoo cuahá ñayivi ña quíhvi ini táhan na.

<sup>13</sup> Joo ndá na ná candico tuun íchi mí i janda ná xinu quiví quivi na, na cán cacuu na cacu ndaa ínima.

<sup>14</sup> Ta níi cúu ñuyiví ndicuïta nuu tuhun vaha cahan sahá yehe já ná candaa ini ñayivi ndá quiahva cacomí Ndióxi cuéntá saha ná. Anda jáví ndihi saha ñuyiví.

15 'Nā cáhvi tutu ná candaā ini na ñā cáhan. Sanahá naçahyí profeta Daniel sahá in ñā quini ñā jātíví ñahá. Tá ná cuni ndó ñā xínū cōo ñā yóho nuú yíi cuéntá Ndióxi

16 já quéa ndá na ndúu estado Judea xíní ñúhú cunu na cūhun na chí yúcu.

17 Ta ndá na cándójó jīni véhe, cō ndítahan nuu na tavá na ndá ñaha vehe na.

18 Ta ndá na ndúu yúcu, ná a ndícó cōo na vehe na ndiquehe na jáhma ná.

19 Ndáhví naçuu najihí, na ñúhu jahyi mé quiví já. Ta ndáhví naçuu najihí na néhe ndaa na valí táhan ñā chíchí yíi.

20 Caçā taħví ndo nu Ndióxi ñā ná a cácuu a tiempo vixi tá ná cunu ndó cūhun ndo. Ta caçā taħví ndo nu á ñā ná a cácuu a quiví ndíquehe ndée ná.

21 Jáchi quiví ndoho ndivaha ini ñayivi cacuu a cán. Jáchi janda tá naçava sáhá saha ñuyíví cōo nandoho ini na tá quiahva ndoho ini na mé quiví já. Ta tá ná yaha ñā jan, a ndícó cōo ga ñā ndoho ini na quiahva já.

22 Ta tá ná a ndája cuítí Ndióxi tiempo cán ni in ñayivi a cúu cacu ndaa. Joo sahá na sa naçaxi mé á sahá na cán ndaja cuítí mé á tiempo cán.

23 "Ta tá ná cachi in na xihin ndó: "Candehé ndo. Yóho ín Cristo, da naçindahá Ndióxi cacomí a cuéntá sahá ñayivi." Á tá ná cachi na: "Candehé ndo. Caa ín da", cachi na, já quéa a cándúsa toho ndó na.

24 Jáchi quixi cuaha na jándahvi ndohó ta ndaja na mé ná tátuhun Cristo. Joo a juú Cristo cúu ná. Ta quixi cuaha ná ta cachi na çahan na cuéntá

Ndióxi ta jári caja na cuahá ndivaha ña náhnu xihín ña xitúhún ña ná jándahvi na ñayivi. Ta janda na sa naçaxi Ndióxi jándahvi na tá ná cuu caja na ña.

<sup>25</sup> Candehé ndo jáchi sa naçaxi tuhun yachi ndihi i ña yóho xihin ndo.

<sup>26</sup> Ña cán quéa tá ná cachi na xihin ndo: “Candehé ndo. Yucú íchí cáa ín Cristo.” Já quéa a cühun ndó jan. Á tá ná cachi na xihin ndo: “Candehé ndo. Ini vehe yóho ndácaan da cúu Cristo.” A cándúsa ndó na.

<sup>27</sup> Jáchi tá quiahva yehe tása quéta xoo nu cána candii ta xójo cava indivi quiahva já queta yehe, da nachindahá Ndióxi nduu ñayivi.

<sup>28</sup> Mé nu candúhu yiquí cuñu ndii cán cacuu nuú ndicutú tiyocó canduu rí.

*Ndá quiahva coo tá ná quixi tucu Jesucristo  
(Mr. 13:24-37; Lc. 21:25-33; 17:26-30, 34-36)*

<sup>29</sup> Ta ivi laá tá jacá nayaha quivi ndoho nahá ini na cán já canaá nuú candii ta ni a ndíyehe ga yoo ta janda indivi quee quimi cuyu rí nu ñúhu ta janda indivi ña naçavaha Ndióxi ndiquiji nuu.

<sup>30</sup> Anda já ndaca náha ña xitúhún indivi já canaá ini ñayivi ña vaxi yehe, da nachindahá Ndióxi nduu ñayivi. Ta ndaja táhan ñayivi ndúu ní cúu sahá ñuyivi ndahyi cóhó na ta já cuni na yehe quixi i tañu vico indivi xihin tóco ndihi ndeé e ta cuni na ndá quiahva cáhnu cúu yehe.

<sup>31</sup> Ta já chindahá i táto mí i ña ná tiví cóhó na trompeta já ná nditaca tóco ndihi na naçaxi i tañu tóco ndihi ñuu janda ní cúu saha ñuyivi ta janda ní cúu sahá indivi.

<sup>32</sup> Jácua<sub>h</sub> ndó ñ<sub>a</sub> cúni cachi mé quiahva sácú u nu ndó sahá yító tító ñuhú. Jách<sub>i</sub> tá yúta ndáha dó cán ta já vaxi núma válí do já candaa ini ndó ñ<sub>a</sub> sa nacayati tiempo ihní.

<sup>33</sup> Quiahva já cuu candaa ini ndó ñ<sub>a</sub> tá ná cuni ndó ñ<sub>a</sub> sa cúu tóco ndihi ñ<sub>a</sub> nacachi i xihín ndo yóho já cuu candaa cáxí ini ndó ñ<sub>a</sub> sa nacayati tiempo quixi tucu yehe ñuyívi yóho.

<sup>34</sup> Mé a ndaa ná cahan i xihín ndo ñ<sub>a</sub> yaha tóco ndihi ñ<sub>a</sub> yóho ta anda jáví quivi na ndúu tiempo viti.

<sup>35</sup> Ta ndihi saha indiví xihín ñuyívi joo a ndíhi toho sahá tuhun nacahan i xihín ndo yóho jáchi coo tá coo tá quiahva nacachi i yóho.

<sup>36</sup> Joo ni in túhún toho ñayivi co xini na ndá quivi á ndá hora yaha ñ<sub>a</sub> yóho. Ni mé tátó Ndióxi ndúu indiví co xini na ndá quivi coo ñ<sub>a</sub> yóho. Ta ni yehe, da cúu in túhún jini já jahyi Ndióxi co xini ndá quivi coo ñ<sub>a</sub> yóho. In túhún Ndióxi, tátá i quea xini a.

<sup>37</sup> Tá quiahva nayaha tiempo tá nasahin Noé sanahá quiahva já yaha ri tá ná tandaa quivi quixi tucu yehe, da nachindahá Ndióxi nduu ñayivi.

<sup>38</sup> Jách<sub>i</sub> mé tiempo cán tá cámaní cuun javi quini cán já cáxixi ñayivi ta cáxihí na ta tándaha ná ndúu na janda quiahva naquihvi Noé ini barco cáhnu cán.

<sup>39</sup> Ta cóo naquehe na cuénta janda quiahva naxinu coo javi quini cán ta najánaá dó sahá ndihi na. Quiahva já a quehe na cuénta saha ndá quivi quixi yehe, da nachindahá Ndióxi nduu ñayivi.

<sup>40</sup> Mé tiempo já canduu ivi dataa xútu da ta in da ndindita cuhun xihín i ta inga da candoo va.

41 Ta canduu ivi najihí ndíco na ta in ñá ndindita cuhun xihín i ta inga ñá candoo va.

42 Xíní ñúhú coo tiahva vaha ndó jáchi co xíni ndó ndá quiv*i* quixi tucu xitoho ndó.

43 Xíní ñúhú candaa vaha ini ndó ña tá xíni in dataa ndá hora cúni quihvi taa cuihná vehe da já quea a cúju toho da jáchi candaa vaha da vehe da já ná a quihvi da cuihná vehe da.

44 Sahá ña cán quea ndítahan canduu tiahva ri ndóhó va. Jáchi xínu coo yehe, da nachindahá Ndióxi nduu ñayivi mé hora tá co cáhán ndo xínu coo i nu ndo.

*Dá cája chúun vaha ta dá cō cája chúun vaha  
(Lc. 12:41-48)*

45 Mé ndó ndítahan nu ndó cacuu ndó tátuhun in da ndíchi jíni, da cája chúun vaha nuú xitoho da. Ta najándacoo xitoho da chuun ndáha dá ña ná quiahva da cuxu na java ga cúú mozo xihín da cán. Anda já naquee xitoho da cuahan da.

46 Tahví nacuu mé mozo cán tá xínu coo xitoho da ta ndítahan da cája chuun yii va da ña nacandoo nu dá caja da.

47 Mé a ndaa ná cahan i xihin ndo ña quiahva xitoho da cán chuun nu dá ña ná cacomí da cuéntá saha tócó ndihi ñaha cómí xitoho da.

48 Joo tá cásáhá da cája núu da ta cáhán da ña cayáncá ndivaha xitoho da ndicó coo da.

49 Ta sahá ña cán quea cásáhá da cája xíxi da xihín java ga na cúú mozo xihin dá. Ta já cáa ga da cásáhá xíxi da ta xíhi da ta já xíni da.

50 Ta ndaja coo xínu coo xitoho mozo cán mé quiv*i* co cáhán da ña xínu coo da.

<sup>51</sup> Anda jáví jándoho quini xitoho da cán ini da jáchi co cúú dá tá quiahva cáa da. Ta ndítahan ndoho da tá quiahva ndoho tóco ndihi na cája já mé nuú cuacu ndivaha na janda quiahva cáhñá nuhu ná –nacachi Jesús.

## 25

*Sácú Jesús quiahva sahá ña nacaja uxu najihí, na tacú*

<sup>1</sup> Já cáchi tucu Jesús já:

–Tá ná xinu coo quiví cacomí Ndióxi cuéntá sahá ñayivi já cacuu a tá quiahva nayaha xihín uxu najihí, na tacú tá nasahan na vicó tándaha. Tá naquehe na candil ña ñúhu síti ini já cuahan na ndique táhan na xihín da tándaha cán.

<sup>2</sup> Uahun táhan na tacú cán cúú ná na tácu ini ta uahun na cán cúú ná na co tácu toho ini.

<sup>3</sup> Ndíhuhun na co tácu ini cán natiin na candil ñaha na cuahan na joo coo naquehe chága na síti ña jácutú tucu na candil tá sa cúni ndahva ña.

<sup>4</sup> Joo na tácu ini cán ñéhe na candil ñaha na ta ñéhe ri na yúyú síti cuahan na ña jácutú na candil tá sa cúni ndahva ña.

<sup>5</sup> Ta ndaja coo nacasáhá cáyancá mé da tándaha cán sahá ña cán quéa nanaá ini ndihi na ta naquiji va na.

<sup>6</sup> Joo tá nacuu yati java ñuú já tácu cáyuhú java na já cáchi na já: “Candehé ndo. Sa vaxi da tándaha. Cuáhán queta ndó ndiquehe ndó da”, cáchi na cáyuhú na cán.

<sup>7</sup> Já nandacoo tóco ndihi na tacú cán ta nacasáhá na cája ndíví na candil ñaha na.



<sup>8</sup> Anda já nacasáhá ndíhuhun na cọ tácu ini cán cáhan na xihín ndíhuhun na tácu ini cán já cáchí na já xihín ná: “Caja ndó ñamaní quiahva loho ndó sítí ndo nuú nde jáchí sa nandihí sítí nde ta jalóho cúni ndahva candil ñaha nde”, cáchí na cọ tácu ini cán.

<sup>9</sup> Já nanducú ñehe ndíhuhun na tácu ini cán tuhun nu ná já cáchí na já: “A cúu toho caja nde quiahva nde sítí nu ndó jáchí tiahva náá ndimaní dó nu mé nde. Vaha chága cuahán mé ndó nu cáyahvi dó cueen ndó do”, nacachi na tácu ini cán xihín ná. Já naquee na cọ tácu toho ini cán cuahan na.

<sup>10</sup> Joo nani naquee ndíhuhun na cọ tácu ini cán cuahan na cueen na sítí na já naxinu da tándaha cán ta nandihvi ndíhuhun najihí tácu ini cán ini vehe nu ín vicó tándaha cán ta nandaji yéhe.

<sup>11</sup> Tá nandihí já nandai cúu ndíhuhun na nasahan naxeen sítí cán já cáti ndaha ná yéhe ta cáyuhú na já cáchí na já: “Cuná loho ndó yéhe nuú nde, xitoho”, cáchí na cáyuhú na ndíta na jata véhe.

<sup>12</sup> Anda já nanducú ñehe da tándaha cán tuhun nu ná já cáchí da já xihín ná: “Cọ xini toho i yo cúu ndóhó”, nacachi da cán xihín ná —nacachi Jesús.

<sup>13</sup> Já nacachi tucu Jesús já:

—Sahá ña cán queá xini ñúhú cuénta vaha coo ri ndóhó va jáchí cọ xini ndó ndá hora xinu cọ quivi cacomí Ndióxi cuénta saha ndo —cáchí Jesús.

*Ña nacaja in taa xihín jiuhún da  
(Lc. 19:11-27)*

<sup>14</sup> Ta já cáchí tucu Jesús já:

—Tá ná x̄inu c̄oo quiví cacomí Ndióxi cuéntá sahá ñayivi já cacuu a tátuhun ña nayaha x̄ihín in d̄ataa. Tá nax̄inu c̄oo quiví quee da c̄uhun x̄icá da já ñacana da java da cája chúun x̄ihín dá. Ta já n̄andiquiahva da jiuhún da ndahá da cán ña ná candaa da ña.

<sup>15</sup> Ta tá quiahva tiahva in in da cañehe da jiuhún quiahva já ñasahan xitoho da nu dá. In táhan da cán ñasahan xitoho da uhun mil nu dá ña ná candaa da ña. Ta inga da cán ñañehe ivi mil. Ta inga da cán ñañehe in mil. Anda já ñaquee xitoho da cuahan x̄icá da.

<sup>16</sup> Ta ndaja coo da n̄andiquiahva xitoho uhun mil ndaha cán ñacaja da ndahvi x̄ihín jiuhún xitoho da ta já ñañehe dá inga uhun mil ch̄aga jatá.

<sup>17</sup> Ta jári da ñasahan xitoho ivi mil nu cán ñacaja da ndahvi x̄ihín jiuhún cán ta ñañehe dá inga ivi mil jatá.

<sup>18</sup> Joo da ñasahan xitoho in mil nu cán ñatiin da jiuhún xitoho da ta já ñasahan da ñacaan da in yávi ta já najánduxu da ña.

<sup>19</sup> Ta tá sa nayaha cuaha tiempo já n̄andicó c̄oo xitoho mozo cán. Ta já ñacasáhá cája vií da cuéntá x̄ihín da cán.

<sup>20</sup> Ta já nax̄inu da ñañehe uhun mil cán nuú xitoho da ta já n̄andiquiahva da inga uhun mil ña ñañehe dá jatá jiuhún cán nuú xitoho da. Ta já cáchí da já x̄ihín xitoho da: “Candehé ndo uhun mil ñasahan ndó nuú i. Joo yóho ín inga uhun mil ñañehé e jatá”, ñacachi da x̄ihín xitoho da.

<sup>21</sup> Anda já ñacachi xitoho da já x̄ihín dá: “Vaha ndivaha ñacajún. Mozo vaha ndivaha cúu yóhó jáchi chá va ñasahan i nuun ta vaha ñacaja chúun

ñā. Sahá ñā cán quéa caja i ñā ná cacomún cuéntá sahá cuaḥa chága ñaha. Ta viti cuu coún xihín i ta já ná cajii chága inún”, ñacachi xitoho da.

<sup>22</sup> Tá ñandihi já ñaxinu coo ri da ñandiquehe ivi mil cán nuú xitoho da. Já ñacachi da já xihín xitoho da: “Ivi mil ñasahan ndó nuú i joo yóho ín inga ivi mil ñañehé e jatá”, ñacachi da xihín xitoho da.

<sup>23</sup> Anda já ñacachi xitoho da já xihín dá: “Vaḥa ndivaḥa ñacajún. Mozo vaḥa cúu yóho jáchi chá va ñasahan i nuun ta ñacaja chúun vaḥún ñā. Sahá ñā cán quéa caja i ñā ná cacomún cuéntá sahá cuaḥa chága ñaha. Ta viti cuu coún xihín i ta já ná cajii chága inún”, ñacachi xitoho da.

<sup>24</sup> Joo tá ñaxinu coo ri da ñañehé in mil ndahá xitoho cán já ñacasáhá cáchi da já xihín xitoho da: “Candehé ndo, xitoho i. Sa cándaḥa vaḥa ini i ñā cúu ndó in ta ndacú ndivaḥa tuhun. Ta vatí co xútu ndó nuú in ñúhu joo jáquee tá jáquee ndó nu á. Ta jataca ndó ñā nuú coo ñaxutu ndó ñā.

<sup>25</sup> Sahá ñā cán quéa ñayihví vi ta ñasahan i najánduxu u jiuḥún ñasahan ndó nuú i tixi ñúhu. Joo yóho ín jiuḥún ndo ndiquehe ndó ñā”, ñacachi da cán xihín xitoho da.

<sup>26</sup> Anda já ñacachi xitoho da já xihín dá: “Co cúun in mozo vaḥa nuú i. Cúun da júsa ndivaḥa. Sa cándaḥa vaḥa inún ñā jáquee e nu ñúhu ñā co xútu u,

<sup>27</sup> ñā cán quéa ndá cuéntá quéa coo ñasahan tóun jiuḥún i banco já ná ndiquehe e jiqui á nuú ñā cán tá ná ndicó coo i, nduu”, ñacachi xitoho da cán xihín dá.

<sup>28</sup> Anda já ñacachi da xihín java ñā ndúu cán:

“Candaa ndó in mil jan ndahá da jan ta quiahva ndó ña nuú da sa cómí uxu mil jan.

<sup>29</sup> Jáchi da cája chúun vaha ñehe chága ví da ñaha já quea ná coo cuahá chága nu dá. Joo da co cája chúun vaha janda ña chá cómí da ndindaa ndáha dá.

<sup>30</sup> Ta mozo a váha toho jan tiin ndó da jácana ndó da nuú naá jata véhe jan. Cán cúu nu ndáhyi ndaa ñayivi janda quiahva cáhña nuhu ná sahá ña ndóho ndivaha ini na”, ñacachi xitoho da, — ñacachi Jesús.

### *Tá ná cavií sahá ñayivi nu Ndióxi*

<sup>31</sup> Já ñacachi tucu Jesús já:

—Tá ná xinu quiví quixi yehe, da ñachindahá Ndióxi nduu ñayivi ta quixi i xihin tóco ndihi na cúu tát Ndióxi. Anda já cacoo i nu sacoo na sáhná chuun ta já ndicáhnu ndivaha i.

<sup>32</sup> Ta nditaca ñayivi ndúu ndíjái ñuyiví nuú i. Ta já casáhá i ndicahnda java táhan i na tá quiahva cája in da ndáá ndicachi tá sáhná java da ndicachi xihín tijúhu ña ná a cáva táhan rí.

<sup>33</sup> Ta já chinduu u ñayivi cuéntá mí i, na cúu tátuhun ndicachi cán xoo cuáha i. Ta xoo íti i chinduu u na co cúu cuéntá mí i, na cúu tátuhun tijúhu cán.

<sup>34</sup> Ta sahá ña cúu u da cómí cuéntá sahá ñayivi sahá ña cán quea cachi i já xihin na ndúu xoo cuáha i cán já: “Cuáyaha ndó ná cacomí Ndióxi, tát i cuéntá saha ndo jáchi cúu ndó na ñacaja cuahá mé á ñamaní xihin. Jáchi janda tá camaní cava sahá saha ñuyiví sa ñasacu tiahva mé á nuú canduu ndó ña cacomí a cuéntá saha ndo.

35 Jáchí nasaḥan ndó naxixi i tá naçuico i. Ta nasaḥan ndó ticuú nuú i tá nahichí ini i. Ta nandiquehe vaḥa ndó yeḥe tá nasacuu u da tóho naxinu i nu ndo.

36 Ta najasá ndo jáhma nuú i tá co ñéhé e ña cándixi i. Ta tá nasaquíhvi já nachindeé ndó yeḥe. Ta tá nasandacaan i vecaa já naxito nihni ndó yeḥe.”

37 Anda já ndaça tuhún java na naçaja vaḥa ta já cachi na já xihín i: “Ndá tañu quéa naxini nde ña cuíco ndó, xitoho nde ta já nasaḥan nde ña xíxi ndó. Ta ndá tañu naxini nde ña íchi ndó ticuú ta já nasaḥan nde ticuú nu ndo.

38 Ta ndá tañu nasacuu ndó da tóho ta nandiquehe vaḥa nde ndohó. Ta ndá tañu naxini nde ña cámaní jáhma candixi ndó ta najasá nde ña nu ndo.

39 Ta ndá tañu quéa naxini nde ña quíhvi ndo ta nachindeé nde ndohó. Ta ndá tañu nasandacaan ndó vecaa ta naxito nihni nde ndohó.”

40 Anda já cachi yeḥe, da cómí cuéntá sahá ñayivi já xihín ná: “Mé a ndaa ná çahan i xihín ndó ña tá naçaja ndó a xihín na cúú cuéntá mí i, na coó saḥa nuú ñayivi ñuyíví já cúú á tátuhun naçaja ndó a xihín mí i”, cachi i xihín na ndúu xoo cuáha i.

41 Anda já casahá cachi i já xihín na ndúu xoo íti i cán já: “Caxoo ndó nuú i jáchi cúú ndó na naçatavi cháhan ta çuhun ndó indayá cañuhu ndó anda ama cáa quívi. Jáchi ña jan cúú ña nasacu tiaḥva Ndióxi ndacaan tiñáhá sacuaḥa xihín tátó mé rí.

42 Jáchí coó nasaḥan ndó ña xíxi i tá naçuico i ta ni coó nasaḥan ndó ticuú nuú i coho i tá nahichí ini i.

<sup>43</sup> Da tóhō cúú u naxinu coo i tañu ndó ta coó nandiquehe vaha ndó yehe. Ta nandimani i ña candixi i ta coó nasahan ndó in jáhma loho nuú i. Nasaquíhvi ta nasandacaan i vecaa ta coó naxito nihni ndó yehe”, cachi i xihín na ndúu xoo íti i cán.

<sup>44</sup> Anda já nducú ñehe ri na cán tuhun nuú i já cachi na já xihín i: “Ndá tañu quea naxini nde ña cuíco ndó ta ndá tañu quea naxini nde ña íchi ini ndó ticuí ta ndá tañu nasacuu ndó da tóhō ta ndá tañu nandimani jáhma ndo ta ndá tañu nasahin quíhvi ndo ta ndá tañu nasandacaan ndó vecaa ta coó nachindee nde ndohó”, cachi na ndúu xoo íti i cán xihín i.

<sup>45</sup> Anda já cachi i já xihín na coo cúú cuéntá mí i já: “Mé a ndaa ná cahan i xihin ndo ña tá ta coó nacaja ndó xihín ñani táhan ndó, na coó saha nuú ñayivi ñuyivi já quea coó nacaja ndó ña xihín yehe”, cachi i xihín na coo cúú cuéntá mí i.

<sup>46</sup> Ta já yaha ndihi na cán cuhun ná indayá anda ama cáa quivi. Ta na nacaja vaha cán yaha na nu Ndióxi catacu na anda ama cáa quivi —cáchi Jesús.

## 26

### *Nditúhún jehé na tiin na Jesús*

*(Mr. 14:1-2; Lc. 22:1-2; Jn. 11:45-53)*

<sup>1</sup> Tá nandihí nacahan Jesús tóco ndihi ña yóho xihín ñayivi cán já nacachi a xihín na xíca tuun xihin á cán já:

<sup>2</sup> —Sa cánda ini ndó ña tixi ivi quivi coo vicó pascua ta já ndiquiahva na yehe, da nachindahá Ndióxi nduu ñayivi ndahá na cata caa yehe ndica crúxu —nacachi Jesús xihín na xíca tuun xihin á cán.

<sup>3</sup> Anda já na sacuaḥa nuú jutū xihín na jánaḥa ley Moisés xihín na sacuaḥa veñuhu nandique táhan na yéhe Caifás, da cúu sacuaḥa chága nu ndíhi jutū cán.

<sup>4</sup> Ta najándique táhan tuhun na ndá quiahva caja na tiin jehé na Jesús ña ná cahní ñahá na.

<sup>5</sup> Já cáchi xihín táhan na já:

—Joo a tীন toho í da tañu mé víco jáchi tiaḥva náá ndivaḗ ñayivi —naçachi na.

*Tá naçhojo in ñáñáḥa perfume jini Jesús  
(Mr. 14:3-9; Jn. 12:1-8)*

<sup>6</sup> Ta ndaja coo íin Jesús ñuu Betania vehe Simón, da cáhan na xihín: ta nandoho cueḥe táhyi.

<sup>7</sup> Já naxinu in ñáñáḥa nu á ta cáñee in yúyú ña alabastro ndáḥa ña. Ta ini mé yúyú cán ñuhu perfume, dó yaḥvi ndivaḥa. Ta já naxinu ña najácuyu ñá do jini Jesús nani íin coo a nu mesa cán.

<sup>8</sup> Tá naçini na xica tuun xihín Jesús cán ña yóho já naçasáḥa na xójo ini na já cáchi na já:

—Ndá cuénta quea tívi uun perfume yaḥvi ndivaḥa yóho.

<sup>9</sup> Jáchi cuu jicó yó do ta já quehé cuahá jiuhún saḥa do, nduu ta já cuu jasá yo jiuhún cán nuú na ndahví —naçachi na cán.

<sup>10</sup> Ta naçandaḗ ini Jesús ña cáhvi ini na cán ña cán quea naçasáḥa cáchi a já xihín ná:

—Ndá cuénta quea cája cueḥe ndó xihín ñáñáḥa jaḥ jáchi ña vaḥa quea naçaja ña yóho xihín i.

<sup>11</sup> Jáchi na ndahví ní tiempo canduu na tañu ndó joo yeḥe a cóo tuun toho i xihín ndo.

12 Jáchi tá najácuyu ñá perfume yiquí cuñu i já nácaja tiaḥva ñá yeḥe ná coo tiaḥva vi tá ná casaa quiví nduxu.

13 Mé a ndaa ná caḥan i xihín ndo ña níí cúú ñuyiví nuú caca nuu ñayivi caḥan na tuhun vaḥa saḥá i ndicani na ña nácaja ñá yóho xihín i já ndicuhun ini na saḥa ña –nácachi a.

*Jícó túhún Judas Jesús*

*(Mr. 14:10-11; Lc. 22:3-6)*

14 Ta ndaja coo in táhan da uxu ivi xíca tuun xihín Jesús, da naní Judas Iscariote naṣaḥan da caḥan da xihín na sacuaḥa nuú jutu.

15 Ta já cáchí da já xihín ná:

—Ndaja quiaḥva ndó nuú i tá ná ndiquiaḥva i Jesús nu ndo —nácachi Judas xihín na sacuaḥa nuú jutu cán.

Anda já naṣaḥan na oco uxu jiuhun cúxú nu dá saḥá Jesús.

16 Ta sa mé nani já nácasáḥa Judas ndúcú da ndaja cuu caja da ndiquiaḥva da Jesús ndáḥa ná.

*Tá naḥijini ndayí Jesús xihín na xíca tuun xihín á*

*(Mr. 14:12-25; Lc. 22:7-23; Jn. 13:21-30; 1 Co. 11:23-26)*

17 Mé quiví nuú vico xíxi na pan, ña co quée yusá naḥaa xihín cán já naḥinu na xíca tuun xihín Jesús cán nu á. Já nácachi na já xihín á:

—Ndáchí cúni ndó cuhun nde caja ndíví nde cajíni ndó vico pascua —nácachi na xihín á.

18 Anda já nácachi Jesús já xihín ná:

—Cuáhán ndó ñuu jan ta jan cuni ndó in dataa ta já cachi ndó já xihín dá: “Da jánaḥa ndeḥe cáchí xuhun: Cuhun i vehe ndó cajíni i vico pascua xihín



na xíca tuun xihín i jáchi sa nandindaa tiempo cūhun i viti” —ñacachi Jesús.

19 Já ñaquee na cán ñasahan na ñacaja na tá ín ñasahnda Jesús nu ná ta cán ñacaja ndívi na ña cajíni na vicó pascua.

20 Ta ndaja coo tá ñacuaá já ñasacoo Jesús nu mesa xihín ndíhuxu ivi na xíca tuun xihín a cán.

21 Ta nani xíjini na já ñacasáhá cáchí a já:

—Mé a ndaa ná cahan i xihín ndó ña in táhan ndó, na xíca tuun xihín i cacuu da jicó túhún yehe —ñacachi Jesús xihín ná.

22 Anda já ñacasáhá na cán cácuéha ndivaha ini na já ñacasáhá tá in tá in na ndáca túhún na Jesús já cáchí na já xihín á:

—Á yehe cacuu da jicó túhún ndo, xitoho i —cáchí na ndáca túhún ñahá na.

23 Anda já nanducú ñehe Jesús tuhun nu ná já ñacachi a já xihín ná:

—Da ñaquihvi ndáha ini cohó xíxi i, da cán cúu da jicó túhún yehe.

24 Yehe cúu da ñachindahá Ndióxi nduu ñayivi ta ndítahan nuú i quivi i tá ín cáchí tuhun Ndióxi. Joo ndáhví nahá ñacuu da jicó túhún yehe. Janda vaha chága ná a cácu da, nduu —ñacachi Jesús.

25 Anda já nandicahan Judas, mé da jicó túhún ñahá cán já ñacachi da já xihín Jesús:

—Xitoho i, á yehe cúu da jicó túhún ndo —ñacachi da xihín á.

—Jivi mún cúu dá —ñacachi Jesús xihín dá.

26 Ta nani xíxi na ndúu na ñatiin Jesús pan já nandiquiahva ndixahvi nu Ndióxi. Tá nandihi já

na<sub>2</sub>sa<sub>2</sub>h<sub>2</sub>nda java ñ<sub>2</sub>a ta na<sub>2</sub>ndicah<sub>2</sub>nda ñ<sub>2</sub>a nu<sub>2</sub>ú na<sub>2</sub> xíca tuun xih<sub>2</sub>in á cán. Ta já na<sub>2</sub>cachi a já xih<sub>2</sub>in ná:

—Júhun ndó jáchi ñ<sub>2</sub>a yóho cúú tátuhun yiquí cuñu i —na<sub>2</sub>cachi a.

<sup>27</sup> Tá na<sub>2</sub>ndihi já na<sub>2</sub>tiin a in vaso nu<sub>2</sub> ñúhu tó uva já na<sub>2</sub>ndiquiah<sub>2</sub>va ndixah<sub>2</sub>vi nu<sub>2</sub> Ndióxi já na<sub>2</sub>cachi a já xih<sub>2</sub>in ná xíca tuun xih<sub>2</sub>in á cán já:

—Coho ndihi ndó dó ñúhu ini vaso yóho.

<sup>28</sup> Jáchi dó yóho cúú dó tátuhun ni<sub>2</sub> i, dó cu<sub>2</sub>ita sa<sub>2</sub>há cuahá ñayivi já ná ndoo cuachi na. Tá ná cu<sub>2</sub>ita ni<sub>2</sub> i já can<sub>2</sub>aa ini ndó ñ<sub>2</sub>a najáxi<sub>2</sub>nu coo Ndióxi tuhun a na<sub>2</sub>sa<sub>2</sub>han sa<sub>2</sub>nahá.

<sup>29</sup> Mé a ndaa ná ca<sub>2</sub>han i xih<sub>2</sub>in ndo ñ<sub>2</sub>a a cóho ga i tó uva janda<sub>2</sub> quiah<sub>2</sub>va ná xi<sub>2</sub>nu coo quiví coho tucu u inga dó va<sub>2</sub>ha chága xih<sub>2</sub>in ndo tá ná xi<sub>2</sub>nu quiví cacomí Ndióxi, táta i cuénta sa<sub>2</sub>há ñayivi —na<sub>2</sub>cachi a.

*Cáxi tuhun Jesús ñ<sub>2</sub>a chijehé tuhún Pedro ñ<sub>2</sub>a xini da mé á*

*(Mr. 14:26-31; Lc. 22:31-34; Jn. 13:36-38)*

<sup>30</sup> Ta tá na<sub>2</sub>ndihi na<sub>2</sub>xita na in canto já na<sub>2</sub>quee na cuah<sub>2</sub>an na yucu yitó olivo.

<sup>31</sup> Ta já na<sub>2</sub>cachi Jesús já xih<sub>2</sub>in ná:

—Mé ñuú viti jándacoo ndihi ndó ye<sub>2</sub>he cu<sub>2</sub>hun ndó sa<sub>2</sub>há ñ<sub>2</sub>a ndoho i. Já cáchi tuhun Ndióxi já: “Cahní i da ndaa ndicachi ta xih<sub>2</sub>in ñ<sub>2</sub>a yóho ndicu<sub>2</sub>ita nuu ndicachi janá dá cu<sub>2</sub>hun ri”, cáchi tuhun Ndióxi.

<sup>32</sup> Joo tá sa<sub>2</sub> ná nditacu tucu u já cu<sub>2</sub>hun jihna ñúhú ye<sub>2</sub>he estado Galilea anda<sub>2</sub> já cu<sub>2</sub>hun mé ndó —na<sub>2</sub>cachi Jesús.

<sup>33</sup> Anda<sub>2</sub> já na<sub>2</sub>nducú ñehe Pedro tuhun nu<sub>2</sub> á já na<sub>2</sub>cachi da já xih<sub>2</sub>in á:

—Vatí ná jándacoo tóco ndihi na mé ndó sahá ña ndoho ndó joo a jándacoo toho i ndohó —ñacachi da xihin á.

<sup>34</sup> Anda já ñacachi Jesús já xihin dá:

—Mé a ndaa ná cahan i xuhun ña mé ñuú viti tá cámani cana chéle já chijehé tuhún ña xínun yehe uní táhdá —ñacachi Jesús xihin dá.

<sup>35</sup> Anda já ñacachi tucu da já:

—Vatí ná quivi i xihin ndo joo a chíjehé tuhun toho i sahá ña xini i mé ndó —ñacachi da xihin Jesús.

Ta quiahva já ñacachi tóco ndihi java ga na xica tuun xihin á cán.

*Tá xica tahví Jesús nu Ndióxi in nuú naní a Getsemani*

*(Mr. 14:32-42; Lc. 22:39-46)*

<sup>36</sup> Anda já ñaxinu coo Jesús xihin na xica tuun xihin á cán in nuú naní a Getsemani. Já ñacachi a já xihin ná:

—Yóho cacoo ndó nani ná cuhun i cáa caça tahví i nu Ndióxi —cáchi a.

<sup>37</sup> Ta ndáca Pedro xihin ndívi da cúu jahyi Zebedeo cuahan xihin á. Ta já ñacasáhá cácuéha ndivaha ini a ta a juú quiahva táhvi ini a.

<sup>38</sup> Anda já ñacachi a já:

—A juú quiahva cácuéha ini i chí quivi i cúu ini i. Yóho candati tóo ndó yehe ta coto a cúju ndo —ñacachi Jesús.

<sup>39</sup> Ta já ñaquee mé á ñasahan loho chága chí nuú já ñacaxítí a janda quiahva ñaxinu taan nu ñúhu. Ta já cáchi a já:

—Tátá Ndióxi, tá ta ná cuu caja ndó ñamani ña ná a ndóho i ña ihvi ndivaha vaxi nuú i ndoho i. Joo

na coo tá ín cúní mé ndó ta ná a cóo toho ña cúní yehe —cáchi Jesús.

<sup>40</sup> Tá nandihí já nandicó coo a nuú najándacoo a na xíca tuun xihín á cán ta já nandiñehe á na quíji na ndúu na. Anda já nacachi a já xihín Pedro:

—Á coo nacuú candita ndó ni in hora.

<sup>41</sup> Xíní ñúhú coo tiahva ndó ta caça tahví ndo nu Ndióxi já ná a cóto ndojó rí quini ndohó. Jáchi ínima ñayivi cúní a ndinducú a Ndióxi joo yiquí cuñu na co ín tiahva caja ña cúní Ndióxi —nacachi Jesús.

<sup>42</sup> Anda já naquee tucu Jesús táhndá ivi cuahan tucu a caça tahví a nu Ndióxi já cáchi a já:

—Tátá Ndióxi, tá ta a cúu va caja ndó ñamaní ná a ndóho ini i ña jan já ná coo tá ín cúní mé ndó coo —cáchi a.

<sup>43</sup> Tá nandihí já nandicó coo tucu a nu ndúu na xíca tuun xihín á cán ta nandiñehe á na quíji tucu na ndúu na jáchi naquehe a mahnú na.

<sup>44</sup> Já naquee tucu a nasahan xíca tahví a nu Ndióxi táhndá uní ta sa mé tuhún cán nacahan tucu a.

<sup>45</sup> Anda já naquixi tucu a nu ndúu na xíca tuun xihín á cán já nacachi a já xihín ná:

—Vatí cúní ndó cuju ndó ta vatí cúní ndó ndiquehe ndée ndó joo a cúu caja ndó ña viti. Jáchi sa naxinu coo hora ndiquiahva na yehe, da nachindahá Ndióxi nduu ñayivi ndahá ñayivi cája cuachi.

<sup>46</sup> Cuáhán ndacoo ndó ná cohó. Jáchi sa vaxi da jicó túhún yehe —cáchi a.

*Tá natiin na Jesús*

*(Mr. 14:43-50; Lc. 22:47-53; Jn. 18:2-11)*

47 Ta nani cáhan yii va Jesús já naxinu Judas, da cúu in táhan uxu ivi na xica tuun xihin á cán. Ta ndáca da cuahá ñayivi, ñéhe na machítí xihin yító viti. Ta na cán cúu ná na naquixi cuéntá na sacuahá nuú jutú xihin cuéntá na sacuahá veñuhu.

48 Ta mé Judas, da ndiquiahva ñahá cán sa nacandoo da xihin na cán ña tatí yuhu dá sajóho Jesús jáchi nacachi da já xihin ná:

—Ndá da ná tatí yuhú u sajóho, da cán cúu dá tiin ndó —nacachi da.

49 Chí ivi laá nacativi da nu Jesús já nacahan Ndióxi dá xihin á ta já natatí yuhu dá sajóho mé á.

50 Anda já nacachi Jesús já xihin dá:

—Cama chá cajún ña, amigo.

Anda já nacayati na nu Jesús ta natiin tuun na a.

51 Joo in táhan da xica tuun xihin Jesús cán, natavá da machítí da ta já naxituhun da in johó da cúu mozo nuú da sacuahá chága nu ndíhi jutú cán.

52 Anda já nacachi Jesús já xihin dá:

—Chicaan vaha machítí jan jáchi ndá na sáhní xihin machítí, xihin machítí quivi ri na cán va.

53 Á cō cándaq inún ña cuu caca tahví i nu Ndióxi, tátá i ña ná chindahá mé á cuahá ndivaha tátó mé á ña ná chindeé na yehe.

54 Cuu caja i ña joo xíní ñúhú yaha tá yaha ña nacahyi nuú tuhun Ndióxi ndoho i —cáchi Jesús.

55 Ta já nacachi Jesús já xihin na naxinu tiin ñahá cán:

—Cája ndó xihin i tátuhun cája na xihin taa cuíhná jáchi naqueta ndó vaxi ndó tiin ndó yehe xihin machítí ta xihin yító viti. Ta ndijáá nítí quivi

naṣahiin i xihin ndo ini veñuhu cáhnu jánaḥa i tuhun Ndióxi nu ndo ta ni in tañu coo natiin ndó yehe.

<sup>56</sup>Joo tóco ndihi ña yóho yáha ña já ná xinu coo ña naçahyí na profeta sahá i ini tuhun Ndióxi sanahá —cáchi a.

Tá nandihí já naxinu ndihi na xíca tuun xihín Jesús cán cuahan na ta najándacoo na mé á.

*Tá ñéhe na Jesús cuahan na nuú nataca ndihi na sacuaḥa*

*(Mr. 14:53-65; Lc. 22:54-55, 63-71; Jn. 18:12-14, 19-24)*

<sup>57</sup>Tá natiin na cán Jesús já ñéhe na a cuahan na nuú Caifás, da cúu sacuaḥa chága nu ndíhi jutu. Ta cán sa nanditútú na jánaḥa ley Moisés ndúu na xihín na sacuaḥa veñuhu.

<sup>58</sup>Joo ndaja coo naṣandico xíca Pedro Jesús anda quiahva naxinu da yéhe vehe da cúu sacuaḥa chága nu ndíhi jutu cán. Ta já nandihvi da naṣacoo da nu ndúu soldado cán sándehe da ndá quea caja na xihín Jesús.

<sup>59</sup>Ta na sacuaḥa nuú jutu xihín tóco ndihi na cómi cuénta sahá na Israel nataca na cán ndúcú na cuachi jácojo na jatá Jesús já ná cuu cahní ñahá na.

<sup>60</sup>Joo coo nañehe ná cuachi jíquí ña cuu chinúu na jata mé á vatí naxinu coo cuahá na naçahan ña tuhún sahá. Anda jáví naxinu coo iví ga da cahan ña tuhún sahá.

<sup>61</sup>Já naçachi da já:

—Naxini johó nde naçachi da jan já: “Jánditani i veñuhu cáhnu cán ta jácandichi tucu u ña tixi uní quiví”, cáchi da —naçachi na cán chícaan na cuachi jatá Jesús.

62 Anda já nandaca ndichi da cúu sacuahá chága nu ndíhi jutu cán já cáchi da já xihín Jesús:

—Á chí a ndúcú ñehún tuhun nuú nde sahá cuachi jácojo na jatun —ñacachi da.

63 Joo ni in tuhun coó nanducú ñehe Jesús nu dá. Anda já ñacachi da cúu sacuahá chága nu ndíhi jutu cán já xihín á:

—Tavún quivi Ndióxi, ña tácu íin indiví ta cachún xihín nde á jivi ndusa yóho cúun Cristo, da cúu in túhún jiní já jahyi Ndióxi, da ñachindahá mé á cacomí cuéntá sahá ñayivi —ñacachi da xihín Jesús.

64 Já nanducú ñehe Jesús tuhun nu dá já ñacachi a já:

—Ajan, jivi yehe cúu u da cáchi ndó jan. Ta viti ná cahan i xihín ndo ña vaxi quivi tá cuni ndó yehe, da ñachindahá Ndióxi nduu ñayivi cacoo i xoo cuáha Ndióxi, mé á íin cuaha ndée. Ta já cuni ndó yehe ndicó coo i ñuyíví yóho tañu vico tá ná quixi i chí indiví —ñacachi a.

65 Tá naxini joho da sacuahá chága nu ndíhi jutu cán ña yóho já nandatá da jáhma dá ña ná candaa ini ñayivi ña xójo ini da. Ta já ñacachi da já:

—Ndája núu da yóho Ndióxi. Coó chicuu chága yó ñayivi ná cahan na xihín yo jáchi sa naxini joho ndihí ña ñacanahá da yóho xihín Ndióxi.

66 Ta ndaja xíní ndó caja í xihín dá viti —ñacachi da.

Anda já ñacachi ndihi na cán já:

—Íin cuachi da jan ta ndítahan cuhun da quivi da —ñacachi na cán.

<sup>67</sup> Ta já naçasáhá na xíhnu ndaa na tójíí na nu á. Ta naçasáhá túxú na yíquí a. Ta java na cáni jahndá nuu á.

<sup>68</sup> Ta já cáchí na já xihin á:

—Cahan xihín nde yo nacani yohó tá ta mé a ndaa cúun Cristo, da nachindahá Ndióxi cacomí cuéntá sahá ñayivi —cáchí na xihin á.

*Tá nachijehé tuhun Pedro ña xini da Jesús*

*(Mr. 14:66-72; Lc. 22:56-62; Jn. 18:15-18, 25-27)*

<sup>69</sup> Ta ndaja coo íin coo Pedro yuhú yéhé da cúu sacuahá chága nu ndíhi jutú cán. Já nacativi in ñáñáha, ñá cája chúun mé vehe cán. Já naçasáhá cáchí ña já xihin dá:

—Yóhó cúun in táhan da xíca tuun xihín Jesús, da estado Galilea —nacachi ñá cán xihin dá.

<sup>70</sup> Joo ndaja coo nachijehé tuhun Pedro nu ndíhi na cán ña xini da Jesús. Já cáchí da já:

—Co xini toho i ndá saha cáhun —nacachi da xihin ñá cán.

<sup>71</sup> Ta tá sa naqueta da yéhé cán já naxini inga ñáñáha da já naçasáhá cáchí ña já xihin tóco ndihi na ndúu cán:

—Naxini i naxica tuun da yóho xihín Jesús, da ñuu Nazaret cán —nacachi ñá cán.

<sup>72</sup> Ta já naçasáhá tucu Pedro chíjehé tuhun da ña xini da Jesús ta natavá da quivi Ndióxi já cáchí da já:

—Co xini toho i ndá da cúu da jan —nacachi Pedro xihín na cán.

<sup>73</sup> Chá va nayaha ña yóho ta nacayati java na ndúu cán nu Pedro. Já nacachi na já xihin dá:



—Mé a ndaa táhyí jivi táhan na xíca tuun xihín Jesús cúu ri yóhó va jáchi cáhun tátuhun cáhan na cán —nacachi na xihín dá.

<sup>74</sup> Anda já nacasáhá Pedro cánahá da ta natavá da quivi Ndióxi ña co xini da Jesús. Já cáchí da já:

—Co xini toho i ndá da cúu da jan —nacachi da.

Tá nacachi da já chí ivi laá nacana chéle.

<sup>75</sup> Anda já nandicuhun ini Pedro ña nacahan Jesús xihín dá tá nacachi a xihín dá: “Tá cámaní cana chéle sa chíjehé tuhún ña xínun yehe uní tañu.” Anda já naqueta da jata véhe ta a juú quiahva sácu da jáchi cácuéha ndivaha ini da.

## 27

### *Tá nandiquiahva na Jesús ndáha Pilato*

(Mr. 15:1; Lc. 23:1-2; Jn. 18:28-32)

<sup>1</sup> Tá nativi inga quivi itaan já nandique táhan ndihi na sacuahá nuú jutú xihín na sacuahá veñuhu ña ndituhún na ndá quiahva jácojo na cuachi jata Jesús já ná cuu cahní ñahá na.

<sup>2</sup> Sahá ña cán quéa nacató na mé á ta ñéhe na a cuahan na ndiquiahva na mé á nu Pilato, da cúu gobernador ñuu cán.

### *Tá naxihi Judas*

<sup>3</sup> Ta ndaja coo naxini Judas, da najicó tuhún Jesús ña nasacu ini na cán cahní na Jesús. Já nacahvi ini da sahá ña núu nacaja da chí ndáva da cuahan da nducú ñehe da ndíhoco uxu jjuhun cúxú nuú na sacuahá nuú jutú xihín nuú na sacuahá veñuhu.

<sup>4</sup> Já nacachi da já xihín na cán:

—Cuachi cáhnu ndivaha quéa nacaja i jáchi najicó túhún i in da coó cuachi.

Já nacachi na cán já xihín dá:

—Co sáhní toho nde mé nde sahá ña yóho. Mún xini ndá quéa nacajún —nacachi na cán xihín dá.

<sup>5</sup> Anda já nacuihna Judas jiuhún cán ini veñuhu cáhnu. Ta já naqueta da nasahan da nacata caa da mé dá já nasahní da mé dá.

<sup>6</sup> Ta já najátaca na sacuahá nuú jutú jiuhún cán já nacachi xihín táhan na já:

—A váha toho ña ná chican yó jiuhún yóho ini sató nu táan na jiuhún jóco na nu Ndióxi jáchi ndii naxihí sahá ña yóho —nacachi na.

<sup>7</sup> Ta tá sa nanditúhún vaha xihín táhan na já naxeen na in ñúhu xihín jiuhún cán. Mé ñúhu cán naní a ñúhu da cávaha ñaha xihín ñundáhyi. Ta ñúhu cán cacuu a nu jánduxu na na tóho.

<sup>8</sup> Sahá ña cán quéa nasacu na quivi ñúhu cán ña cananí a yójo nuú naxita nii. Ta já naní a janda viti.

<sup>9</sup> Ta xihín ña yóho naxinu coo nuú ña nacyí profeta Jeremías sanahá tá nacachi da já sahá Jesús: “Natiin na ndíhoco uxu jiuhun cúxú jáchi ña jan nasacuu yahvi nasacu na Israel chahvi na saha dá.

<sup>10</sup> Ta xihín mé jiuhún cán naxeen na ñúhu naní a ñúhu da cávaha ñaha xihín ñundáhyi jáchi quiahva já nasahnda Ndióxi chuun nuú i caja i”, cáchí tuhun Ndióxi.

*Tá cándichi Jesús nu Pilato  
(Mr. 15:2-5; Lc. 23:3-5; Jn. 18:33-38)*

11 Ta ndaja coo cándichi Jesús nu Pilato, da cúu gobernador. Ta já nacasáhá da cán ndáca tuhún ñahá da já cáchí da já xihín á:

—Á mé a ndaa cúun in rey, da cómi cuéntá sahá na Israel.

—Ajan. Jivi ndusa cúu u tá quiahva cáchí ndó jan —nacachi Jesús xihín dá.

12 Ta na sacuahá nuú jutú xihín na sacuahá veñuhu nachicaan na cuachi jatá Jesús joo ni in tuhun coó nanducú ñehe a nu ná.

13 Anda já nacachi Pilato já xihín Jesús:

—Á co xini johó tohún ndaja cuahá nuú cuachi jácojo na jatun —nacachi da.

14 Joo ni in tuhún tuhun coó nanducú ñehe Jesús nu dá. Chí catóntó ndivaha da cúu gobernador sahá ña co cáhan Jesús.

*Sácu ini na ndaja caja na ña ná quivi Jesús  
(Mr. 15:6-20; Lc. 23:13-25; Jn. 18:38-19:16)*

15 Tañu mé víco pascua nasahiin costumbre da cúu gobernador cán sá janí da in táhan da ndácaan vecaa. Ndá da cúní ñayivi janí da, da cán cúu da jání da.

16 Mé tañu já nasandacaan in da naní Barrabás vecaa. Níí cúu naxita nuu tuhun sahá da yóho.

17 Ta tá nataca ndihi ñayivi já nandaca tuhún Pilato na já nacachi da já xihín ná:

—Yo cúní ndo ña ná janí i. Á Barrabás janí i á Jesús, da cáchí na cúu Cristo, da nachindahá Ndióxi cacomí cuéntá sahá ñayivi. Yo janí i cúní ndo —nacachi da.

18 Nacachi Pilato ña yóho xihín ná jáchi sa cándāa vaha ini da ña sahá ña cáhiv̄i ini na xihín Jesús sahá ña cán quéa nandiquiahva na mé á nu dá.

19 Ta nani lín coo da nu sácoo da sáhdá da chuun vechúun cán já nachindahá ñájihí da tuhun nu dá já nacachi ñá já: “A quíhvi ndáhun Jesús jáchi cúu dá in ta ndaa. Ñuú anda véhe nasani i nacaja Jesús ta ndicani ndivaha ini i sahá”, nacachi ñá.

20 Joo ndaja coo na sacuahá nuú jutú xihín na sacuahá veñuhu cán najácahan na ñayivi ña ná caca na nu Pilato ña ná janí da Barrabás ta ná cahní da Jesús.

21 Anda já nacachi da cúu gobernador cán já xihín ná:

—Yo cúni ndó ña ná janí i.

Anda já nacachi na cán já:

—Barrabás jan va janí ndó —nacachi na xihín dá.

22 Anda já nacachi tucu Pilato já xihín ná:

—Ndía cúni ndó caja i xihín Jesús, da cáchi ndo cúu Cristo.

Anda já nacachi tóco ndihi na cán já:

—Cata caa ndó da ndica crúxu.

23 Anda já nacachi tucu Pilato já xihín ná:

—Ndá cuachi nacaja da, vaha —nacachi da xihín ná.

Joo xihín ña yóho ví ga ví nacasáhá cáyuhú na já cáchi na já:

—Cata caa ndó da ndica crúxu.

24 Ta tá naxini Pilato ña co yaa na cán ta ví ga ví ndívāa na já natiin da ticuúí ta nandahá da nu ndíhi ñayivi cán ta já nacachi da já xihín ná:

—Xihín ña yóho jánāa i nu ndo ña coo cuachi toho ndójo i saha ndá ña ná caja ndó xihín da yóho

jáchi coó cuachi toho da yóho. Jata mé ndó ná cuhun ndihi va —nacachi da xihin ná.

<sup>25</sup> Anda já nacachi tóco ndihi na cán já:

—Vaha ná candojo nde cuachi ta janda jahyi nde viti ná candojo na cuachi sahá ña ná quivi da —nacachi na cán xihin dá.

<sup>26</sup> Anda já najaní Pilato Barrabás. Ta tá nandihí najácaxáhan na Jesús já nandiquiahva da a ndáha ná ña ná cata caa na a ndica crúxu.

<sup>27</sup> Anda já ñehe soldado cuéntá gobernador cán Jesús yuyéhe vechúun. Já najátaca soldado cán java ga táhan da ta cán nacava toyivi da mé á ndúu da.

<sup>28</sup> Tá nandihí já natavá na jáhma á. Anda já nachinúu na in jahmá cuáhá túun jatá.

<sup>29</sup> Ta já nachinúu na in tiyivi íñu jini á. Ta nachíñee na in ndoo ndahá cuáha. Ta já nacasáhá na cáxítí na nu á já sácu ndaa ichi ñahá na já cáchí na já xihin á:

—Cáhnú nahá ná cacuu yóhó, da cúu rey nuú na Israel —nacachi na.

<sup>30</sup> Ta nacasáhá xihnu ndaa na tójíi na nuu á. Ta já cándaa na ndoo cán ndáha á ta cáni na yiquí jini a xihin do.

<sup>31</sup> Ta tá sa nandihí nasacu ndaa ñahá na já nacandaa na jáhma nachinúu na jatá cán ta najácandixi tucu na a xihin jáhma mé á. Anda já ñehe na a cuahan na cata caa na a ndica crúxu.

*Tá nacata caa na Jesús ndica crúxu*

*(Mr. 15:21-32; Lc. 23:26-43; Jn. 19:17-27)*

<sup>32</sup> Ta tá ñehe na Jesús cuahan na cata caa na a já nanditahan na in da naní Simón, da ñuu Cirene.

Ta nacaja ndúsa na xihin dá ña ná ndicojo da crúxu nuú cata caa na Jesús.

<sup>33</sup> Ta naxinu coo na xiqui naní Gólgota. Tuhun yóho cúni cachi a: nu ndúu lása yiquí jini ndii.

<sup>34</sup> Mé cán nasahan na vino nu á, dó nacava táhan xihin ña ova ña ná coho a do. Joo tá naxito ndojó a do coo naxeen toho a coho a do.

<sup>35</sup> Ta tá sa nandihi nacata caa na a ndica crúxu ja naquehe na jáhma á nandicahnda nu táhan na. Joo jihna ñúhú nasajiquí na sahá ta da naquee vaha cán, da cán nandiquehe jáhma á. Xihin ña yóho naxinu coo nuú ña nacahyí profeta sanahá tá nacahyí da ja: “Nandicahnda nu táhan mé ná cotó níhnu i ta ja nasajiquí na sahá cotó maá i ta da naquee vaha cán nandiquehe da ña”, cáchí tuhun Ndióxi.

<sup>36</sup> Ta ja nasacoo soldado cán ndúu na ndaá ñahá na.

<sup>37</sup> Ta jini ndica crúxu cán nacahyí na nda saha nacata caa na a ja cáchí a ja: “Da yóho cúú Jesús, da cúú rey nuú na Israel.”

<sup>38</sup> Ta sa mé ja nacata caa ri na ivi ta cuihná xihin Jesús: in da xoo cuáha ta inga da xoo íti.

<sup>39</sup> Chí cáva jini mé ñayivi yáha cán cánahá na xihin á.

<sup>40</sup> Ta ja cáchí na ja:

—Yóhó cáchún jánditani veñuhu cáhnu cán ta tixi uni vixi quivi cáchún jácandichi tucún ña. Tá ta mé a ndaá cúún jahyi Ndióxi jácacu mún ta cuáhán nuu ndica crúxu jan —nacachi na xihin Jesús.

<sup>41</sup> Ta quiahva ja nacaja ri na sacuaha nuú jutu xihin na janaha ley Moisés xihin na sacuaha veñuhu. Sácu ndaá na a ja cáchí na ja:

42 —Najácacu da java ga ñayivi ta viti chí a cuú caja da jácacu da mé dá. Tá ta mé a ndaa cúú dá rey nuú na Israel, ná nuu da ndica crúxu viti ñuhú já ná candúsa nde da.

43 Cándéé ini da Ndióxi ta cáchí da cúú da jahyi Ndióxi já quéa ná quixi Ndióxi chindeé a da tá ta mé a ndaa quíhvi ini a da —nacachi na cán canahá na xihín Jesús.

44 Quiahva já canahá ri ndíví ta cuihná tácaa in in xoo jíin á cán xihín á.

### *Tá naxihi Jesús*

*(Mr. 15:33-41; Lc. 23:44-49; Jn. 19:28-30)*

45 Tá naxinu coo caxivi ndaa nacanaá níi cúú ñuyívi ta janda caa uní sahini já nacasáhá nandiyehé tucu.

46 Ta sa mé hora já nacayuhú cóhó Jesús já nacachi a já:

—Elí, Elí, lama sabactani —ña yóho cúni cachi a: Ndióxi mí i, Ndióxi mí i, ndávaha najándacoo ndáha ndó yehé.

47 Ta java na ndíta cán tá naxini johó na tuhun cáchí a já nacachi na já:

—Cána da profeta Elías —nacachi na cán.

48 Ivi laá xínu in da nasahan da nachindaxi da in ticoṭo ini vino iyá. Ta nacató da ña nuú in yitó ndoṭo já nachiñee da do yati yúhu Jesús ña ná coho a do.

49 Joo na java ndíta cán nacachi na já xihín dá:

—Cóho candehé yo á quixi Elías jácacu a da —nacachi na cán.

50 Anda já nacayuhú cóhó tucu Jesús já naxihi a.

<sup>51</sup> Ta ndaja coo nandatá java ndaa jahmá ndeé ñá sájí nuu nuú yíi ndivaha veñuhu cáhnu ñuu Jerusalén cán. Janda jini á ta janda sahá nandata. Ta mé hora já nataan ta ndijáá yuu tóto ndúu cán nandata.

<sup>52</sup> Ta nanuna cáva nu nasañuhu na naxihi ta cuahá ñayivi, na nasacuu cuénta Ndióxi nanditacu tucu na.

<sup>53</sup> Ta tá sa nanditacu tucu Jesús já naxinu na naqueta cáva cán ñuu Jerusalén ta cuahá ndivaha ñayivi naxini ñahá.

<sup>54</sup> Ta da cúu sacuaḥa nuú soldado cuénta Roma xihin da ndáá Jesús xihin da cán tá naxini da ña nataan ta naxini da java ga ña nayaḥa cán já nacasahá yíhví ndivaha da. Já nacachi da já:

—Mé a ndaa táhyí cúu da yóho in túhún jini já jahyi Ndióxi —nacachi da.

<sup>55</sup> Ta mé cán nasandita cuahá najihí sándeheé xicá na Jesús. Mé na cán cúu na nacaja ndívi ñahá nu Jesús tá nandico na mé á naquixi na janda estado Galilea.

<sup>56</sup> Tañu najihí cán nasandacaan María, ñá ñuu Magdala xihin María, ñá cúu náná Jacobo xihin José. Ta cán nasandacaan ri ñá cúu náná ndívi da cúu jahyi Zebedeo.

*Tá nachicaan na yiquí cuñu Jesús ini cáva  
(Mr. 15:42-47; Lc. 23:50-56; Jn. 19:38-42)*

<sup>57</sup> Ta ndaja coo nasahiin in da cuicá naní José, da ñuu Arimatea. Mé da yóho nasacuu da in táhan da nasaxica tuun xihin Jesús. Ta tá sa nacuaá já naxinu da

<sup>58</sup> nasahan da cahan ndahví da xihin Pilato ña ná ndiquiahva da yiquí cuñu Jesús nu dá. Anda já



na<sub>s</sub>ahnda Pilato chuun ña ná ndiquiahva na ña nu dá.

<sup>59</sup> Ta já n<sub>a</sub>chitiví José cán yiquí cuñu Jesús xihín in jáhma va<sub>h</sub>a ña vií.

<sup>60</sup> Ta já n<sub>a</sub>chicaan da yiquí cuñu Jesús ini in yávi ña saá ndácaan ndica cáva ña jacá nacaán da cuénta mé dá. Ta tá n<sub>a</sub>ndihi já n<sub>a</sub>chijahví da yuhú cáva cán xihín in yuu jáhnda cáhnu ta já na<sub>q</sub>uee da cuahan da.

<sup>61</sup> Ta nu yéhe mé cáva cán na<sub>s</sub>anduu coo María, ña ñuu Magdala xihín inga ña naní María cán.

### *Tá ndáa java soldado nu ndácaan Jesús*

<sup>62</sup> Ta ndaja coo sa n<sub>a</sub>ndihi n<sub>a</sub>caja ndíví na ñaha cuénta quívi ndíquehe ndée na. Ta inga quívi itaan najátaca táhan na sacua<sub>h</sub>a nuú jut<sub>u</sub> xihín na fariseo já na<sub>s</sub>ahan na nu Pilato.

<sup>63</sup> Já n<sub>a</sub>cachi na já xihín dá:

—Vaxi nde nu ndo ca<sub>a</sub> loho nde ñamaní nu ndó. Jáchi ndícu<sub>h</sub>un ini nde ña tá na<sub>s</sub>atacu Jesús, da naxica jándahvi ñayivi cán n<sub>a</sub>cachi da ña tá sa ná ya<sub>h</sub>a uní quívi já nditacu tucu da.

<sup>64</sup> Ña cúni nde quéa ná chindahá loho ndó na cu<sub>h</sub>un candaa nuú n<sub>a</sub>chicaan na yiquí cuñu da cán jánda quiahva ná ya<sub>h</sub>a uní quívi. Jáchi tia<sub>h</sub>va náá xinu coo na naxica tuun xihín dá ñuú ta caja cuíhna na yiquí cuñu da. Ta já casáhá cachi na xihín ñayivi ñuu ña n<sub>a</sub>nditacu tucu Jesús tañu na naxihí. Ta xihín ña yóho jándahvi chága na ñayivi a juú ga jihna —n<sub>a</sub>cachi na.

<sup>65</sup> Anda já n<sub>a</sub>cachi Pilato já:

—Cañehe ndó in táhndá soldado. Cuáhán ndó candaa ndó nu ndácaan da tá quiahva xini mé ndó caja ndó —cáchi Pilato xihin ná.

<sup>66</sup> Anda já naquee na cán nasahan na já nachicají vaha chága na nu ndácaan yiquí cuñu Jesús cán. Ta nasacu na sello yuu jáhndá cán ta já nasacu na soldado ña ná candaa da ña.

## 28

### *Tá nanditacu tucu Jesús*

*(Mr. 16:1-8; Lc. 24:1-12; Jn. 20:1-10)*

<sup>1</sup> Tá sa nayaha quivi ndíquehe ndée ná ta nativi inga quiví itaan já naxinu María, ña ñuu Magdala xihin inga María cán sánehé na nuú nachicaan na yiquí cuñu Jesús cán.

<sup>2</sup> In naá cuití nataan ndeé ndivaha. Nayaha ña yóho jáchi nanuu in tátō Ndióxi indiví. Ta najátiví a yuu jáhndá nasajahvi nuú nasandacaan yiquí cuñu Jesús cán. Ta já nasacōo a jatá.

<sup>3</sup> Ta yéhe mé tátō Ndióxi cán tá quiahva yéhe tasa. Ta jáhma ndíxi a cúu á jahmá yaa cachí.

<sup>4</sup> Ta a juú quiahva ná yihví soldado ndúu cán nacaja tátō Ndióxi chí nacasáhá quíji ninu da. Ta já nacuyu da nu ñuhu tátuhun ndii naxihi.

<sup>5</sup> Joo ndaja coo tátō Ndióxi cán nandicaahan xihin najihí cán já nacachi a já xihin ná:

—A cáyihví toho ndó. Sa xini vaha i ña ndínducú ndo Jesús, ña nacata caa na ndica crúxu.

<sup>6</sup> Coó toho a cán íin yóho jáchi sa nanditacu tucu a tá quiahva nacachi mé á xihin ndo. Naha ndó candehé ndo nuú nasahin a já cuni ndó ña coó ga íin nuú nasacu na ña.

<sup>7</sup> Ta cama ndó cuhun ndó caxi tuhun ndó xihín da naxica tuun xihín á ña sa nanditacu tucu Jesús tañu na sa naxihí. Ta viti cánúú mé á cuahan estado Galilea. Ta tá cuhun ndó cán já cuni ndó a. Ta ndicuhun ini ndó ña nacachi i xihín ndo — nacachi tátō Ndióxi cán.

<sup>8</sup> Anda já naqee mé najihí cán mé nuú nasandacaan yiquí cuñu Jesús. Ta vatí yíhví na joo cávatá ndivaha na ta sahá ña cán quéa xínu na cuahan na caxi tuhun na ña yóho nuú na naxica tuun xihín Jesús cán.

<sup>9</sup> Ta nani cuahan na ivi laá sa íin va Jesús xihín ná. Já nacachi a já xihín ná:

—Ndióxi ná coo xihín ndo.

Anda já nacayati na cán nu á já nanumi na sahá ta nacaja cáhnu na a.

<sup>10</sup> Anda já nacachi tucu Jesús já xihín ná:

—A cáyíhví toho ndó. Cuáhán ndo caxi tuhun ndó xihín na cúú cuéntá mí i ña ná cuhun na estado Galilea jáchi cán cuni na yehe —nacachi Jesús xihín najihí cán.

<sup>11</sup> Ta nani xínu najihí cán cuahan na já ndáva java soldado, da nasandaa nuú nasandacaan Jesús cán naxinu da ñuu Jerusalén já nacaxi tuhun da ña nacuu nuú na sacuaḥa nuú jutū.

<sup>12</sup> Anda já najátaca táhan na sacuaḥa cán xihín na sacuaḥa veñuhu já najándique táhan na tuhun na ta já nasahan cuahá ndivaha na jiuḥún nuú na soldado cán.

<sup>13</sup> Já nacachi na já xihín soldado cán:

—Coto a cáhan ndó ña nanditacu Jesús. Ña cachi ndó cúú ña yóho: “Na naxica tuun xihín á cán, na cán cúú na naquixi ñuú ta nacaja cuíhná na yiquí

cuñu a nani naquiji nde”, já cachi ndó xihín ndá na ná ndaça tuhún ndohó.

<sup>14</sup> Ta a cáyihví toho ndó tá ná candaã ini da cúu gobernador sahá ña yóho jáchí cahan mé nde xihín dá ta chindeé nde ndohó ña ná a cája da ni in ñaha xihín ndo – nacachi na sacuaħa cán xihín soldado.

<sup>15</sup> Anda já naquehe da cúu soldado cán jiuħún ta naçaja da tá quiaħva naśahnda na sacuaħa cán chuun nu dá. Ta xihín ña yóho nandicuĩta nuu tuhun sahá ña nayaha cán. Ta cáħan na Israel cán sahá ña yóho janda quiví víti.

*Tá sáħndá Jesús chuun nuú na naçica tuun xihín á*

*(Mr. 16:14-18; Lc. 24:36-49; Jn. 20:19-23)*

<sup>16</sup> Joo ndíħuxu in na naçica tuun xihín Jesús cán naśahaħ na chí Galilea. Já nandaa na in jini yucu tá quiaħva naśahnda mé Jesús chuun nu ná.

<sup>17</sup> Ta tá naçini na mé á já naçaja cáħnu na a. Joo java na cáħvi ivi joho ini na jáchí co cándusa na ña nanditacu tucu a.

<sup>18</sup> Anda já naçayati Jesús nu ná já nacachi a já xihín ná:

—Naśahaħ Ndióxi ndée nuú i caja i ña náħnu ndivaħa indivi xihín ñuyiví yóho.

<sup>19</sup> Sahá ña cán quea cuáhán ndo jánaħa ndo nuú ñayivi ndúu ndijáá ñuyiví ndaja caja na caca vaħa na íchí cuéntá mí i. Ta caja ndúta ndó na xihín quiví Ndióxi, tátá i ta xihín quiví yeħe, da cúu in tuhún jini já jahyi mé á ta xihín quiví ínima yii Ndióxi.

<sup>20</sup> Ta jánaħa ndó na ña ná caja na tóco ndihi ña naśahnda i nu ndó caja ndó. Ta mé a ndaa coo i xihín ndo ndijáá ní quiví janda quiaħva ná xinu

coo quiví ndihi saha ñuyíví. Já ná coo –nācachi  
Jesús.

**Tuhun saá ña najá<sup>ndacoo</sup> Jesucristo nu yo: El  
Nuevo Testamento en el mixteco de  
Silacayoapan  
New Testament in Mixtec, Silacayoapan  
(MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Silacayoapan

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

[clix](#)

You do not sell this work for a profit.

You do not change any of the words or punctuation of the Scriptures.  
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022

7f2d3ecf-6d15-55a5-9081-6e970474df2f